

ქენია სინარულიძე

ხალხური ფლავრები

სამ. ალკ ცენტრალური კომიტეტი
ხაბავევო და ახალგაზრდობის
ლიტერატურის განყოფილება
თბილისი 1938

ღათვი, მგელი და მელია



ათვი, მგელი¹ და მელია შეხედნენ ერთმანეთს და შესჩივლეს — ხშირად დიდის ხნობით შიმშილით კუჭი გვიხმებაო. მოდი, დავძმო-

ბილდეთ და ამიერიდან რაც მოვინადიროთ, ძმურად გავვიყოთ ხოლმეო. დაძმობილდნენ და შეჭფიცეს ერთმანეთისათვის არ ელალატნათ.

წავიდნენ სამივენი სანადიროდ. იმათ იღბალზე, დაქრილი ირმის ნუკრი ნახეს, კისერი მოუკრიბეს, ჩე ო მ. ა. მწვანეზე დასხდნენ და გაყოფას შეუდგნენ. დათვმა უბრძანა მგელს, რომელსაც შიმშილით კბილები უკაწკაწებდა, აბა, გაჰყავიო.

მგელმა თქვა: თავი, შენ, როგორც ჩვენს ბატონსა და მეთაურს, შუატანი მე და ფეხები მელიას, რომელსაც ცუნცული უყვარსო. ეს უკანასკნელი სიტყვები ჯერ არც კი გაეთავებინა მგელს, როდესაც დათვმა ისე ღონივრად ჩაჰკრა თავში წინა თათი, რომ მთებმა ბანი მისცეს. მგელი ყმულილით განზე დაჯდა.

დათვი მიუბრუნდა მელიას და უთხრა: აბა, ჩემო მელიავ, შენ გაჰყავიო.

¹ ჩერო — მცირე ჩრდილი.

ცბიერმა მელიამ მოწიწებით წარმოთქვა: თავი შენ, ვითარცა ჩვენს მეფეს, შუატანი შენ, რადგანაც შენ ჩვენზე მარად მამობრივადა ზრუნავ, და ფეხებიც შენ, ვინაიდან ჩვენ საკეთილდღეოდ არიან წარმართულნი სვლანი შენნი.

—ბარაქალა, ჩემო მელიავ, ვინ გასწავლა ეგეთი ჭკვიანური გაყოფა?—ჰკითხა მას დათვმა.

მელიამ მიუგო: შენ, რომ წედან ისე ძალიან ჩაარტყი მგელს თავში, ჰკუას როგორ ვერ ვისწავლიდიო.



რათვი და მელია



ყო ერთი გლეხიკაცი, ჰყავდა ერთი ქალი. გლეხი ცხვრის ფარას აძოვებდა, ქალი კი—ბატკნებს.

ერთ დღეს ქალმა შეჯგუფული ბატკნები ველარ გაშალა, დაჯდა და დაიწყო ტირილი. მოცუნცულდა ერთი მელია ქალთან და ჰკითხა:

- რა გატირებს, ქალო, რა დაგემართაო?
- ბატკანი შემიჯგუფდა და ვერაფერი მოვუხერხეო.
- თუ ერთ ბატკანს მაჩუქებ, მე გავშლიო.
- მოგცემო, — უთხრა ქალმა.

მელია შევარდა ბატკნებში და დაიწყო აქეთ-იქით კულის ქნევა. ბატკნები დაფრთხნენ და დაიშალნენ.

მელიამ წამოიყვანა ერთი ბატკანი, სიხარულით ფეხზე ძლივს იდგა.

მელიას ძალიან შეუყვარდა ბეკეკა, იშვილა, გაუკეთა ერთი სახლი და ჰყავდა შიგ. ბალახს მუდამ პირით უზიდავდა. სალამოზე, როცა ბრუნდებოდა პირში ბალახათ, შეყოფდა თავს კარებში და ბატკანს დაუძახებდა:

ბეკეკო, კარი გამიღე,
მე დედაშენი ვარია,
პირში ბალახი მიჭირავს,
ძუძუებში რძე არია.

ბატკანიც გაიგონებდა ამ სიტყვებს, დაინახავდა მელის პატარა თათს და გაუღებდა კარებს, შევიდოდა მელი სახლში და ეთამაშებოდა თავის პატარა ბეკეკას.

იქვე ახლოს დათვი ბუდობდა. უენიშნა მელის ბეკეკა ჰყავსო და გადაწყვიტა როგორმე შეეჭამა. დაუდარაჯა დათვმა მელიას, როცა სალამოზე შინ ბრუნდებოდა და დაიმახსოვრა ის სიტყვები, რასაც მელია ბეკეკას უძახოდა.

ერთხელ, როცა მელია სხვაგან იყო წასული, მივიდა დათვი ბატკნის სახლთან, შეყო თავისი ბანჯგვლიანი თათი და ბოხი ხმით დაიძახა:

ბეკეკო, კარი გამიღე;
მე დედაშენი ვარია,
პირში ბალახი მიჭირავს,
ძუძუებში რძე არია.

ეუცხოვა ბატკანს ხმა, შეხედა დიდ თათს, იცნო დათვი და დაუძახა:

— წადი, მე ჩემი დედობილის თათს კარგად ვიცნობ, შენ ის არა ხარ, იმას პატარა თათი აქვს და შენ დიდიო.

გაწბილებული დათვი ტყეში წავიდა. ბატკნის შეჭმის სურვილი არ ასვენებდა. ტყეში ცეცხლი დაინახა, მწყემსებს დაენტოთ. მივიდა, ამოითხუპნა ნაცარში, გაიტრუსა შათი და ისევ ბატკნისაკენ გაეშურა. მივიდა კარებთან, შეყო გატრუსული თათი ქუჭრუტანაში და წვრილი ხმით დაიძახა:

ბეკეკო, კარი გამიღე,
მე დედაშენი ვარია,
პირში ბალახი მიჭირავს,
ძუძუებში რძე არია.

ბატკანს თავისი დედობილი ეგონა და კარი გაუღო. შევიდა დათვი სახლში, მაგრამ მაშინვე არ შეჭამა ბატკანი, უნდოდა რაიმე მიზეზი ეშოვნა. გადაგორდ-გადმოგორდა ბატკნის წინ, დააბოყინა და თქვა:

— ბეკეკოს მამასაო.

— დათვის მამასაო,— უპასუხა ბატკანმა.

— სუ, ბეკეკო, თორემ შეგქამო, — დაემუქრა დათვი.

— ფეხებსაც კი ვერ მომქამო, — უპასუხა ბატკანმა.

კიდევ გადაგორდ-გადმოგორდა დათვი, დააბოყინა და თქვა:

— ბეკეკას მამასაო.

— დათვის მამასაო,— შეუბრუნა სიტყვა ბატკანმა.

— სუ, ბეკეკო, თორემ შეგქამო,— კიდევ დაემუქრა დათვმა.

— ფეხებსაც ვერ მომქამო — უთხრა ბატკანმა.

დათვმა დაიჭირა ბატკანი და ნახევარი შექამა, რადგან მელისი ეშინოდა და ნახევარი შეუნახა.

მოვიდა მელია, ნახა დათვი სახლში და მიხვდა, რაც მოხდებოდა.

— ძმისწულო, გამაჯავრა ბატკანმა და შევქამე, ნახევარი კი შენ შეგინახეო.

— მაღლობელი ვარ ბიძავ, ბატკნის ხორცს არა ვქამ, ჩემი საკმელი ქათამი და თაგვია, მეორე ნახევარიც შენ მიირთვიო, — ეშმაკურად მიუგო მელიამ.

დათვს გაეხარდა და მეორე ნახევარიც შექამა.

— ბიძავ, აქ ახლოს ქორწილია, წავიდეთ იქ, ერთი ნასუქი დეკეულია; შევიდეთ ბოსელში და მივირთვათ, მთვრალი მაყრები ვერაფერს გაიგებენ და შეგვრჩებაო, — უთხრა დათვს მელიამ.

— წავიდეთო, — მიუგო გახარებულმა დათვმა.

მართლაც წავიდნენ. შევიდნენ ბოსელში, დაკლეს ერთი მსუქანი დეკეული; მიაძღა დათვი.

მელიამ უთხრა დათვს:

— მე ხმა ჩამიწყდა, შენ ბოხი ხმა გაქვს და, მოდი, ერთი მაყრული შემოსძახეო.

დაუჯერა დათვმა და თავისებურად დაიღრიალა. მაყრებმა გაიგონეს დათვის ღრიალი, გამოცვივდნენ გარეთ. მელიამ ფხაჭა გაადინა კარების ძირიდან და თავს უშველა.

დათვი დაიჭირეს, ბევრი სცემეს და ტყავი გააძრეს. ბოლოს, როგორც იყო, გაიქცა ტყავგამძვრალი.

დათვი ძალიან გაბრაზებული იყო მელიაზე. უნდოდა ჯავრი ამოეყარა და წავიდა მის საძებრად. დაინახა ერთ გორაზე, ეკლის ჯაგთან იჯდა, და მისკენ გაეშურა. მელიამ დაინახა დათვი, თითქოს ვერ იცნო და პირი მოარიდა.

დათვმა დაუძახა:

— დამიცადე მანდ მოვიდეო.

მელიამ დაიძახა:

— ხმა ჩემი ბიძისაა, მაგრამ ეს წითელ-ყვითელი ჩასაცმელი კი მისი არ არისო.

დათვი გამოუდგა მელიას დასაჭერად. მელია ჯაგებში და ეკლების ძირში ძვრებოდა, კუდს დათვს მიუშვევდა, რომ შეეტყუებინა ჯაგებში, მიჰყვებოდა დათვიც, იკაწრებოდა, სდიოდა სისხლი და ყვიროდა. ამგვარად კარგახანს ატარა მელიამ ჯაგებში დათვი. ბოლოს დაუძახა:

— ბიძავ, ოღონდ ნუ მაწვალე და მე თითონ მოგარჩენო.

— როგორ? — შეეკითხა დათვი.

— როგორა და იმ გორაზე მწყემსებია, ისინი მიშველრან; შენ წადი, სახნის-საკვეთი მოიტანე, გავახურებ, დაგდაღავ და მორჩებიო.

დათვი წავიდა, მოიპარა სახნის-საკვეთი და მელიას მიუტანა.

მელიამ მოიყვანა მწყემსები, შეაკვრევინა ფეხები დათვისათვის და უთხრა მწყემსებს:

— არ მომიკლათ ჩემი ბიძა, უნდა დავდალო და მოვარჩინო.

გახურა სახნის-საკვეთი, დაუწყო დათვს დაღვა. დაიწყო დათვმა სიმწარისაგან ყვირილი.


კარგახანს აღრიალა მელიამ დათვი; შემდეგ გაუხსნა ფეხები და უთხრა:

— ახლა გოდორს მოვნახავ, შიგ თივა-ბუმბულს ჩაგიგებ, ჩაგაწვენ და ბეწვი ამოგივაო.

მართლაც მოიტანა გოდორი, ჩასვა შიგ დათვი, გა-
დაუხლართა თავი და გააგორა. მიაგორა მდევსთან და
დაბლა გადაუძახა. თითონ კლდის წვერზე წამოჯდა და
დაიმღერა:

ახტება და დახტება
ეს სულბოროტიანი,
დაჯდება და უცქერის
ხოსრო დოვლათიანი.





ყო და არა იყო რა, იყო ერთი ძლიერ ლატაკი კაცი. ერთი გამხდარი ხარისა და სამი ღლის მიწის მეტი ქვე-

ყანაზე აწა გააჩნდა რა. ეს მიწაც სათივედა ჰქონდა დატოვებული. ერთხელ ფიქრად მოუვიდა ღარიბ კაცს: — ეს სათივე მაქვს და ხარიცა მყავსო, მოდი ამ, სათივით გავასუქებ ამ გამხდარ ხარსა, იქნებ რიგიან თვასში გავყიდლო. ასეც მოიქცა. მიიყვანა ხარი სათივეში, ხარმა მოძოვა სამი ღლის სათივე და იმოღენა გაიზარდა, რომ სამი ღლის მიწაზეც თითქმის ვერ ეტეოდა. ამ დროს ზეციდან ჩამოუარა ორბმა, დაეცა ამ უზარმაზარ ხარს თავში და აიტაცა ჰაერში, თან მიფრინავდა და თან ჰამდა. გამოხრა ბეჭი და გაღმოაგლო ძირს. ბეჭი თვალეში ჩაუვარდა ერთ მეცხვარეს, რომელიც იქვე ცხვრებს აძოვებდა. ჯერ მეცხვარემ ვერა გაიგო რა, მაგრამ ცოტა ხნის შემდეგ თვალმა ტკივილი დაუწყო, მოისვა თვალეზე ხელი და თქვა:

— ეს რა ამბავია, მგონი, თვალში რაღაცა ჩამეარდნიაო. — დაუძახა ამხანაგს, რომელიც იქვე ცხვარს უღდა. მოვიდა ამხანაგი, ჩახედა თვალში, კარგად გაუსინჯა, ამოაცალა თვალიდან ბეჭი და გადააგლო.

ამ ბეჭზე გაშენდა საუცხოო ქალაქი, რომელსაც ბეჭა დაერქვა.

ამ ქალაქის მკვიდრთ დაიწყეს მშვიდობიანი ცხოვრება. გავიდა რამდენიმე ხანი და ამ ქალაქს უბედურება ეწვია. ყოველდღე მთელი ქალაქი ინძრეოდა. შიშით თავზარდაცემული მცხოვრებნი მთელ ღამეებს ქუჩაში ათენებდნენ, რადგან ეშინოდათ სახლები თავზე არ დაგვეგრესო. ბევრი იფიქრეს იმის შესახებ, თუ როგორ ეშველათ საქმისათვის და ბოლოს გადაწყვიტეს ელარაჯათ და გაეგოთ, თუ რა ანძრევდა ამოდენა ქალაქს.

ერთი ღამე უდარაჯეს თოფებითა და სხვა იარაღით და ნახეს: მოცუნცულდა მელია — კუდი-გრძელია, რომელიც მივარდა ბექს და გამწარებული დაუწყა ხერა. დარაჯებმა დაინახეს, რომ ამ დროს ამოდენა ქალაქი შეინძრა. მოიმარჯვეს თოფები, მელიას ზედიზედ დაახალეს და იქვე მოკლეს. მოვიდნენ და დაუწყეს გატყავება. ერთი გვერდი გაატყავეს, მეორე გვერდიც უნდა გაეტყავებინათ, მაგრამ მელია იმოდენა იყო, რომ ვერ გადააბრუნეს და თავი მიანებეს.

მელიას ნახევარი ტყავი მთელ ქალაქს ეყო. ყველამ შეიკერა ქუდები და მრავალი მისი ბეწვით მოირთო.

მკვდარ მელიასთან მოვიდა ერთი მოხდენილი ტანის ლამაზი ქალი, რომელსაც გოლიათი ერქვა. ქალმა წამოჰკრა ხელი მელიას, გადააბრუნა, გაატყავა მეორე გვერდი და შინ წაიღო. ტყავისაგან თავის პატარა ვაჟს ქუდი შეუკერა, მაგრამ ეს ტყავი არ ეყო ქუდსა: ცოტაღა დააკლდა. ადგა გოლიათი ქალი, ქუდს მაუდის ყალამა გამოაკერა და დაახურა თავის პატარა ვაჟს.

რომელი უფრო დიდი ყოფილა: ხარი, ორბი, მეცხვარე, მელა თუ გოლიათიას პატარა ვაჟი?



მელა, მამალი, ბაჭკანი და ჩიტი



ელა, მამალი და ჩიტი და-
ძმობილდნენ. გაუდგნენ
გზას. გზაზე შემოალამდათ,
დადგნენ ერთ ადგილას და
დაანთეს ცეცხლი.

მელამ უთხრა მამალს:

— აბა, მამალო, მოდი, ვიჭიდაოთო.

დაიჭიდნენ. მელიამ მოგლიჯა მამალს თავე და ჩაახ-
რამუნა. მერე ბატკანიც შეჭამა.

— მელიავ, მე ცარიელი ქონი ვარ, პირი გააღე ჩაგი-
ვარდები და შემჭამეო, — უთხრა ჩიტმა.

მელიამ გააღო პირი, ჩიტმა აიღო ერთი მუგუზალი
და შიგ პირში ჩაჰჩარა. მელიას გამოეწევა პირი და ველარ
შეჭამა ჩიტი.

ჩიტი გაფრინდა, დაინახა გზაზე — ორი კაცი ერთ
ძაღლსა ცემდა.

ჩიტი მიფრინდა და სთხოვა:

— მე მომეცით ეგ ძაღლი და რაც გინდათ იმას მოგ-
ცემთო.

კაცებმა უთხრეს:

— ოღონდ ეგ მოგვაშორე და, პირიქით, ჩვენ მოგ-
ცემთ ფულსაო.

წამოიყვანა ჩიტმა ძაღლი. ძაღლი მშიერი იყო.

ჩიტმა უთხრა:

— აი, იქ დედაკაცები რომ სხედან და მაწონს შეექცევინ, ხომ ხედავო?

— ვხედავო, — უპასუხა ძაღლმა.

— მაშ მე მივალ იმ დედაკაცებთან, დავიწყებ ნელა ფრენას, ისინი დასაქერად გამომედევნებიან, მიდი შენ და მაწონს მიაძებო.

ჩიტმა მართლა გაიტყუა დედაკაცები, და ძაღლი კარგად გაძლა.

წამოვიდნენ იქიდან, გზაზე მელიას შეხვდნენ. ჩიტმა ძაღლი დამალა და მელიას დაუძახა:

— გამარჯობა მელიავ, მოგირჩა პირი თუ არაო?

მელიამ დაუძახა:

— პირი კი მომირჩა, მაგრამ ლეში კი აღარსად მიქაზნიაო.

ჩიტმა დაუძახა:


— წამო აქ არის ლეშიო.

ძაღლს კი უთხრა:

წაწექ გზის პირზე და როდესაც მელია მოვა შესაქმელად, წამოუხტი და ტყავი გააძვრეო.

მართლაც მივიდა მელია და დასწვდა ძაღლს კუღზე. წამოხტა ძაღლი და შემოაცალა ქურქი.

ქირი იქა,
ლხინი აქა,
ქატო იქა
ფქვილი აქა.



ყო და არა იყო რა, იყო ერთი რუსილი და მელია. დაძმობილდნენ და მიდიან. ერთი წყალი შემოხვდათ.

მელიამ უთხრა რუსილს:

— ისკუპე, რუსილოო.

ისკუპა და წყალში ჩავარდა.

მელია გადახტა და წავიდა. ხორბლიანი ტომარი ზურგზე შემოიკრა. მიდის და ერთ ოჯახში დაულამდა.

— ოჯახიანო, სტუმარი არ გინდა? — დაუძახა მელიამ.

— როგორ არა, მელია, მობრძანდი, სტუმარი ღვთისა არისო.

შეიყვანეს სახლში, მძიართვეს საკმელი რაც უნდოდა და დააძინეს.

ყველამ რომ დაიძინა, ადგა მელია, გამოიპარა გარეთ, ხორბალი მოაპნია საქათმის ქვეშ და ისევ შევიდა სახლში დასაძინებლად.

ადგნენ მეორე დღით. მოიკითხა მელიამ ხორბალი. ნახეს, ქათმებს უყრია, რაღას იზამენ. დაიჩემა მელიამ ერთი მამალი:

— თუ ამას მომცემთ, მომეცით თორემ აქედან აგყრითო.

აიღეს და მისცეს მამალი.

წაიყვანა მამალი და კიდევ ერთ ოჯახთან დაუღამდა. კიდევ ისე დაუძახა:

— ოჯახიანო, სტუმარი არ გინდაო?

შეიყვანეს სახლში. როცა დაიძინეს, ადგა, გამოიყვანა თავისი მამალი, მოუგრიხა თავი და ცხვრისქვეშ ამოღო. ადგნენ მეორე დილით. მელიამ მოიკითხა მამალი. ნახეს, რომ ცხვრისქვეშ არის.

თუ მაგ ცხვარს მომცემთ, მომცემთ, თუ არა, აქედან არ წავალო, — დაიჟინა მელიამ.

აიღეს და მისცეს ცხვარი. მიჰყავს და ერთ ოჯახში კიდევ დაუღამდა. იქაც დაიძინეს.

ადგა ღამით, გამოიყვანა თავისი ცხვარი, მოუგრიხა თავი და ხარქვეშ ამოღო.

მეორე დილით მოიკითხა ცხვარი.

— ჩქარა ჩემი ცხვარი მომიყვანეთო.

ნახეს — ხარქვეშ არის.

— თუ მაგ ხარს მომცემთ, მომცემთ, თუ არა და აქედან აგყრითო, — დაემუქრა მელია მათაც.

შეშინდა ხალხი, მისცეს ხარი და წაიყვანა.

მიღის და ხედავს — ერთ ოჯახში ქორწილია. დაინახეს მელა და მიიპატიჟეს:

— მობრძანდი, მელია, მობრძანდიო.

მივიდა. დასვეს პატარძლის გვერდით. იქეიფეს იმ ღამეს. შემდეგ სულ ყველას დაეძინა. ადგა მელია, დასინჯა ყველას ჯიბეები. პატარძლის ჯიბეში დანა ყოფილიყო. ამოიღო, წაიღო და თავისი ხარი დაკლა. დაკლა და გაასისხლიანა დანა და ისევ პატარძლის ჯიბეში ჩადო.

ადგნენ მეორე დილით. მელიამ მოიკითხა ხარი. ნახეს — დაკლულია.

— აბა ვისაც სისხლიანი დანა აღმოაჩნდება, ის უნდა წავიყვანო, — დაიძახა მელიამ.

ნახეს და პატარძალს აღმოაჩინდა.

დაღონდა პატარძალი, მაგრამ რას იზამს, აშინებს მელია.

— აბა, თუ ამ პატარძალს მომცემთ, მომცემთ, თუ არა დაგხოცავთო.

მელიას ემუდარებიან, გინდა ორი ხარი წაიყვანე და პატარძალს ნუ წაიყვანო, მაგრამ არ ქნა. ჩასვა გუდაში პატარძალი და წაიყვანა.

მიდის და მღერის:

პური გავცვალე მამალზე;

მამალი, — ცხვარზე,

ცხვარი — ხარზე,

ხარი — პატარძალზე.

ბანი, პატარძლო, ი, ი, ი, ი, ი!

ლიღინებს თითონა.

გზაზე მეგუთნებმა დაინახეს და დაუძახეს:

— მობრძანდი, მელია, სადილზე დაგვეწვიეო.

— არა, გმადლობთო, — დაუძახა მელიამ.

— მობრძანდი, მობრძანდი, წყალი მაინც ამოგვიტანეო, — დაუძახეს.

მელია მიბრუნდა, მოიხსნა გუდა. მერე ცხრილი¹ მისცეს და გაგზავნეს წყალზე. ჩაჰყოფს მელია ცხრილს წყალში — აივსება, ამოიღებს — დაცალიერდება. დაუძახა მეგუთნეებს:

— ვერ ვავსებო.

მეგუთნებმა უპასუხეს:

— გაგლისე და გაავსებო.

მელია ისევ იქ არის და ყვირის:

— მაინც ვერ ვავსებო.

მეგუთნეებმა ამოსვეს გუდიდან პატარძალი და მაგივრად გუდაში ჩასვეს ერთი დიდი შავი ძაღლი, ჩაუყარეს პურის ნამტვრევები.

¹ ცხრილი-მცირენახურეტებიანი ქურქელი ხორბლის გასაცხრილად.

პატარძალს უთხრეს:

— წადი ჩქარა, სულ ირბინეო.

მელიას დაუძახეს:

— მოდი, მელიავ, მოდიო.

მელია მოვიდა და თქვა:

— რამდენი ვეწვალე და ვერ ავავეო.

— არა უშავს რა, მელია, მადლობელი ვართო, — მიუგეს მეგუთნეებმა. მელიამ აიკიდა გულა და მიდის. მიდის და მიიმღერის:

პური გავცვალე მამალზე,

მამალი — ცხვარზე,

ცხვარი — ხარზე,

ხარი — პატარძალზე.

ბანი, პატარძალო, ი, ი, ი, ი, ი!

ლიღინებს არხეინად. ძალლი დაიღრენს.

ხ — ეს რაღაც ცუდ ხმაზე იძახის, თუ არა ვნახეო. მოიხსნა გულა, მოხსნა პირი, და ამოვარდა ძალლი. ეცა მეღიას და გაგლიჯა და გამოგლიჯა.

ი პატარძალი შინ მივიდა და ძალლიც პატრონთან დაბრუნდა.



გლეხი, ღათვი და მელია



ყო და არა იყო რა, იყო ერთი გლეხი. მის ცოლს მეტი არაეინ ჰყავდა.

ერთხელ გლეხი ყანაში წავიდა სამუშაოდ. გზაზე

პანტის ძირში დათვი ნახა. დათვს იმდენი პანტა ეჭამა, რომ ველარ მოენელეზინა და იქვე ხის ქვეშ გორავდა.

გლეხმა ეს რომ დაინახა სიცილი შესკდა.

დათვმა უთხრა:

— არავისთან გამამხილო თორემ შეგჭამო.

გლეხმა უპასუხა:

— არავისთან გაგამხელო.

როცა გლეხი შინისკენ წამოვიდა, დათვიც ადგა და ჩუმად უკან გამოუდგა. გლეხი შინ რომ მივიდა, დათვი სახლის ყურეს ამოეტეუზა და ლაპარაკს ყური დაუგდო.

გლეხი მოუყვა ცოლს დათვის ამბავს.

დათვმა ყველაფერი გაიგონა და გამობრუნდა. წავიდა და გლეხის ყანაში ჩაწვა.

მეორე დღეს ისევ წავიდა გლეხი ყანაში სამუშაოდ. იქ დაწოლილი დათვი რომ დაინახა, შეშინდა.

წამოდგა დათვი და შესძახა:

ადრე გამოხნავ,

ადრე გამოგხრავ;

გვიან გამოხნავ,

გვიან გამოგხრავო.

გლები შეშინდა, გამოვიდა გზაზე და დაღონებული დაჯდა. შუადღეზე ცოლმა სადილი მოუტანა: ერთი კარგად შემწვარი დედალი, სამი ხაჭაპური და ერთი ბოთლი ღვინო.

გლებმა უთხრა ცოლს:

— რა მესადილებს, ქალო, დათვი ყანაში ჩაწოლილა და ასე მეუბნება:

ადრე გამოხნავ;

ადრე გამოგხრავ;

გვიან გამოხნავ, —

გვიან გამოგხრავო.

ცოლმა უთხრა:

— შენ რა დაუშავე მაგის ფასიო?

— წუხელი რომ ამბავი გითხარი, იმისთვის მექადნებაო.

ამ დროს სად იყო და სად არა, გაჩნდა მელია. გლები რომ შეწუხებული ნახა ჰკითხა:

— რამ დაგაღონაო?

— როგორ რამ დამაღონა, აგერ ყანაში დათვი წევს და შექმას მიპირებსო, — უპასუხა გლებმა.

მაშინ მელიამ უთხრა:

— თუ მაგ ქათამს და ხაჭაპურებს მე მაქმევ, გიშველიო.

გლებმა მიუგო:

— ოღონდ კი მიშველე და ღვინოც კი შენი ფეშქაში¹ იყოსო.

დაჯდა მელია და შეექცა გემრიელ საჭმელს.

როცა გაათავა, გლებს უთხრა:

— შენ წადი და დათვის ახლოს დაიწყე ხვნა, მე გავალ პატარა სერზე და იქიდან დაგიძახებ, შენ კი მაგიერი პასუხი მომეციო.

გლებმა ხვნა დაიწყო.

მელია გორაზე გავიდა და იქიდან გადმოიძახა:

— კაცო, შენ, ჰვი!

¹ ფეშქაში — საჩუქარი.

— რა იყო, რა!
 — სამი წლის დათვის კვალი ხომ არ გინახავს? ხელ-
 მწიფე მოდის თავისი ჯარით და მისი ნახვა უნდაო.
 დათვი შეეხვეწა გლეხს:
 — ასე უთხარი არ მინახავსო.
 — არა, არ მინახავს!—დაუძახა გლეხმა მელიას.
 — მაშე ვგ რა არის?
 გლეხი დაეკითხა დათვის:
 — რა ვუპასუხოვო?
 დათვმა უთრხა:
 — ჯირკიათქო.
 — ეს ჯირკია, ჯირკიო.
 — თუ ჯირკია ურემზე დადევო, — გადმოსძახა მე-
 ლიამ.

დათვი შეგორდა ურემზე.
 მელიამ გადმოსძახა:
 — აბა დააკარი ჯირკი ურემზედაო.
 გლეხმა დათვი ურემზე თოკით დააკრა.
 მელიამ დაიძახა:
 — აბა უცუღლისყუეო! ¹
 გლეხმა დასცხო ცუღლი დათვს და მოკლა. მელიამ
 და გლეხმა ბევრი იცინეს.
 გლეხმა დათვის ხორცი ხორცად გაჰყიდა, ქონი ქონად
 მოიხმარა და ტყავი ტყავად.
 ელასა, მელასა,
 ჭიქა მეკიდა ყელასა,
 მთქმელსა და გამგონებელსა.
 თითო სტაქანი ყველასა.

¹ ცუღლისყუება—ხალხური გამოთქმაა, ყუით ცემა.



ყო და არა იყო რა, იყო ერთი ცოლ-ქმარი; ჰყავდათ ერთი ვაჟი. კაცი მალე დაქვრივდა, დაობლდა ვაჟი, დარჩა პატარა. ოჯახისა და შვილის მოსავლელად

ვაჟის მამამ მეორე ცოლი შეირთო. ვაჟი დედინაცვალის ხელში ჩავარდა. უდიერი დედინაცვალი ხშირად უმიზეზოდ სცემდა პატარა ვაჟს.

დედინაცვალს მეგობარი ჰყავდა. ქმარმა არ იცოდა ეს; ვაჟმა იცოდა ეს ამბავი და დედინაცვალს გულით უნდოდა გერის თავიდან მოშორება.

კაცს ერთი ხარი ჰყავდა — წიქარა. ვაჟსა და წიქარას ერთმანეთი ძალიან უყვარდათ. ვაჟს დაჰყავდა წიქარა, აძოვებდა და ამით ერთობოდა.

დედინაცვალი დროს არჩევდა ვაჟის თავიდან მოსაშორებლად. ერთხელ მოიავადმყოფა თავი და ტყუილ-უბრალოდ დაიწყო კვნესა და გმინვა.

ქმარმა ჰკითხა: —

— რა მოგივდა, რა გიშველისო?

— შენი შვილის გულ-ღვიძლის მეტი არაფერი მიშველისო.

მამა შეწუხდა ამ გაგონებაზე, მაგრამ ცოლი არჩია და შვილს დაკვლა დაუპირა.

მეორე დღით ვაჟი ხედავს, რომ მამა დანებს ლესავს და ჰკითხა:

— რად გინდა, მამავ, ეგ დანები, რომ ლესავო?

— წაიყვანე შვილო, წიქარა, წყალი დააღვეინე, უნდა დაეკლაო, ეტყვის მამა.

წაიყვანა ვაჟმა წიქარა წყალზე, ასმევს წყალს და ტირის, ტირის, რომ იმისი ცრემლები წყალს ერთვის.

— რა გატირებს ჩემო მეგობარო, რაზე ითხრი თვალებს შემოგვევლოს შენი წიქარა თავსო,— ეტყვის წიქარა.

— დაკვლას გიპირებენ, დაკვლას!— ეტყვის გულამომჯღარი ვაჟი.

— მე კი არ მკვლენ, შენ გიპირებენ ყელის გამოჭრას; წადი წამოიღე ერთი სალესავი ქვა, ერთი სავარცხელი, ერთი ბოთლი წყალი, შემაჯექ ზურგზე და წავიდეთო,— უთხრა წიქარამ ვაჟს.

წავიდა ვაჟი მოიტანა ყველაფერი, რაც წიქარამ უთხრა, შეჯდა წიქარაზე და გაქუსლა.

გაიგო ვაჟის მამამ შვილის გაქცევა, შეჯდა ერთ წყეულ ღორზე და გამოუდგა. მირბის წიქარა, მიაქროლებს პატარა მეგობარს, მისდევს ღორზე მჯდომი მამა დაღესილი დანებით. ის არის უნდა დაეწიოს, და ამ დროს წიქარა ეტყვის ვაჟს:

— რალას ელი, მეგობარო, სიკვდილი თვალწინ გვიდგას, გადაღვარე ბოთლი წყალიო.

გადაღვრის ვაჟი წყალს— და გაჩნდება სპინელი ზღვა. დელავს შავად ზღვა. აბობოქრებულთა; ტალღები სიკვდილს უქადის ყველას, მაგრამ წყეული ღორი არ უდრკება ზვირთების ცემას და მიცურავს; სანამ ღორი ზღვას გაცურავს, წიქარა და მისი მეგობარი კარგ მანძილს გაივლიან.

— წიქარა ეტყვის ვაჟს:

— თავი მიიბრუნე, ნახე, მოდის ღორი თუ არაო?

მიიბრუნებს ვაჟი თავს და ეტყვის წიქარას:

— ბუზის ოდენა ჩანს რაღაცა, მორბის და მოფრინავსო.

— ეგ ღორია და ზედ მამაშენი ზისო,— ეტყვის წიქარა და უფრო ჩქარა გააქროლებს ვაჟს.

მორბის ღორი, და მოაელვებს ვაჟის მამა გალესილ დანებს. ცოტა კიდევ--და ღორი დაეწევა წიქარას.

— გადააგდე სავარცხელიო!—შესძახა ვაჟს წიქარამ.

გადააგდო ვაჟმა სავარცხელი; უცებ ისეთი ხშირი და წვრილი ტყე აიყარა, რომ შიგ თაგვი კუდს ვერ მოიბრუნებდა. ჭრა კბილით ღორმა, ჭრა, და გავიდა.

წიქარა და ვაჟი მირბიან. კარგა მანძილი გაიარეს. მოიხედა ვაჟმა და დაინახა — შორს ბუზივით რაღაც მოჩანს.

— ღორი მოგვდევსო, — ეტყვის ვაჟს წიქარა.

ცოტა კიდევ და სადაც არის ღორი წიქარას დაეწევა, მაგრამ წიქარას რჩევით ვაჟი სალესავს გადააგდებს, და წიქარასა და ღორს შუა საშინელი თვალუწვდენელი კლდე აიშართება. ჭრის ღორი კლდეს, ჭრის რაც ძალი და ღონე აქვს, აკეთებს საკობურებს და ადის ზევით. შუა ადგილას, რომ მიადწია, ჩააჭრა კლდის ფხას ფეხი და თავის მხედრიანა უფსკრულში შთაინთქა. წაიღო ჩემიცა და თქვენნი ჭირიც.

ვაჟსა და წიქარას ხსნის იმედი მიეცათ. იარეს, იარეს და სამშვიდობოს გავიდნენ. წიქარამ გამოიყვანა ვაჟი ერთ ტრიალ მინდორზე; იქ ერთი ალვის ხე იდგა, ისეთი მაღალი, რომ იმისი წვერი ცასა წვდებოდა.

წიქარამ შესვა ვაჟი ალვის ხეზე, მისცა ორი სალამური — ერთი საჭირო, მეორე სალხინო — და უთხრა:

— მე წავალ, მარტოკა ვივლი მინდვრებში, მე ვძოვ, თავს დავირჩენ, შენ აქ იჯექ; გაგიჭირდეს, — დაუკარი საჭირო სალამური და მაშინვე აქ დავიბადები; გილხინდეს, — უკარ სალხინო სალამური, საჭმელსაც ის მოგიტანს და სასმელსაცო. გამოეთხოვა წიქარა პატარა ვაჟს და წავიდა.

ვაჟი იჯდა ალვის ხეზე და უკრავდა სალხინო სალამურს. სალამურის ხმაზე ნაირ-ნაირი პეპლები თამაშობდნენ. გაიგონა ერთმა მეცხვარემ სალამურის ხმა, ძალიან მოეწონა და გადაწყვიტა მისი ხელში ჩაგდება. მიჰყვა სა-

ლაამურის ხმას, მივიდა ალვის ხესთან და ნახა — ბიჭი ზის ხეზე, უკრავს სალაამურს; პეპლები მოგროვილან მის ირგვლივ, სალაამურის ხმაზე ირევიან ერთმანეთში და თამაშობენ. მეცხვარეს შურით თვალები დაებრიცა; ვაჟს დაუძახა:

— ჩამოდი ძირს, მაჩვენე, რისგან არის გაკეთებული სალაამურიო.

ვაჟი არ ჩავიდა, წიქარასგან იყო დარიგებული — ალვის ხიდან არ ჩამოხვიდო.

შურიანი მეცხვარე წავიდა ხელმწიფესთან და მოახსენა:

— ამა და ამ ადგილას ალვის ხეზე ერთი ვაჟი ზის და სალაამურს უკრავს; იმის ხმაზე მთელი ქვეყანა ხარობსო.

ხელმწიფემ მაშინვე დაიბარა ნაზირ-ვეზირნი და უბრძანა:

— მოიყვანეთ ის ვაჟი, ან კაცი იშოვნეთ მისი მომყვანიო:

ერთმა ბებერმა უთხრა ნაზირ-ვეზირებს:

— მე მოვიყვან იმ ვაჟსო.

ადგა ბებერი, წავიდა. წაიყვანა ერთი თხა, წაიღო სადგისი და მივიდა ალვის ხის ძირში. ზის ვაჟი ხეზე და უკრავს სალხინო სალაამურს; დგას ბებერი ხის ძირში, ჩხვლეტავს სადგისით თხას და საცოდავად აჩხავლებს. დაინახავს ვაჟი ამას და ბებერს დაუძახებს:

— რას შვრები, დედილო, რად აჩხავლებ მაგ თხასაო?

— დაკვლა მინდა და ვერ დამიკლავს; იმდენი სიკეთე მიყავი, ჩამოდი, დამიკალო.

რას მოიფიქრებდა ვაჟი, თუ ბებერს დალატი ედვა გულში, და ძირს ჩავიდა. ბებერმა დაათრო დადაძინა. ხელმწიფის კაცებმა წაიყვანეს და ცხრაკიტულში ჩასვეს.

ვაჟს გამოეღვიძა, ნახა თავისი თავი დატყვევებული და დალონდა; დაიწყო ტირილი, ინატრა თავისი სალაამურები, მაგრამ სალაამურები ალვის ხეზე იყო ოხრად დარჩენილები.

იჯღა ვაჟი ფანჯარასთან და ცას გასცქეროდა, ცხრაკილ-ტულს გვერდით ყვაემა ჩაუფრინა, დაინახა ვაჟმა და შესძახა:

— ყვაეო, ყვაეო! სად მიფრინავ, სად მიგეჩქარება? წადი, შენი შეილები მზეს, მინდვრად რომ ალვის ხე დგას, იმაზე ჩემი სალამურებია და აქ მომიტანე!

— მე რომ ლეშს ვჭამდი და. შენ ქვეს მესროდი, აღარ განსოვს? — უპასუხა ყვაემა და ფრენით განაგრძო გზა.

გააყოლა თვალი ვაჟმა და ცრემლები ჩამოყარა.

გადმოფრინდა ყორანი.

— ყორანო, ყორანო! შენი შეილები მზეს, წადი ალვის ხეზე სალამურები დარჩა და აქ მომიტანეო! გასძახა ვაჟმა ყორანს.

— მე რომ წიქარას ლეში გთხოვე, არ მომეცი, სალამურებს რად მოგიტანო?! — ჩამოსძახა ყორანმა და გასცილდა; თავისი სიშავით უფრო გააშავა ისედაც შავი და მწარე დღე პატარა ტყვისა.

გადაიარა არწივმა.

— არწივო, არწივო, მხარკვერიანო! ფრინველთ მეფე ხარ; სადაც მაღალი კლდე არის და ხე, შენი საბუდარია; წადი, მინდორში რომ ალვის ხე დგას, იქ სალამურები დამრჩა, აქ მომიტანეო! — გასძახა ვაჟმა.

— მე ჩემი საქმე მაქვს; შენგან კრავი როდის მიმიღია საჩუქრად, რომ სალამურები მოგიტანო? — უპასუხა არწივმა და ფრთების შხლარტუნით გასცდა.

გადმოფრინდა ჩიტო და ვაჟმა იმასაც შესძახა:

— ჩიტო, ჩიტო შენი ბარტყების გაზრდას, მინდორში სალამურები დამრჩა და მომიტანეო.

— შენ რომ მახეს მიგებდი და ბუდეს მიშლიდი, მე ვერ მოგიტან, სხვას სთხოვევო, - უთხრა ჩიტმა და ჟივილ-ხივილით გასცდა.

გააყოლა ვაჟმა იმასაც თვალები და ცრემლები ჩამოსცივდა.

ბოლოს მერცხალი დაინახა. ახლა იმასაც შესტირა:

— საით მიფრინავ მერცხალო,

საითკენ მიეშურები?

მინდვრად რომ ალვის ხე ხარობს,

ცივნი წყარონიც დიანო,

იქ პეპელები სხდებიან,

ტურფად ჭრელ მხრებსა შლიანო;

შაიყრებიან ჩიტებიც

ყვავილნიც შეკრბებიანო;

წიქარაც იმათთან მოდის,

იქ დაინახავ, ხეთიანო!

სალამურებიც იქ არის,

უჩემოდ დაღპებიანო;

გაფრინდი, აქ მომიტანე,

ჩემო ლამაზო მხრიანო!

გაფრინდა მერცხალი და მოუტანა სალამურები. დაუ-
კრა საჭირე სალამური ვაჟმა, დაუკრა და აატირა.

წიქარამ გაიგონა სალამურის ხმა და მაშინვე გაეშუ-
რა ვაჟისკენ. გააფთრებული ეცა რქებით ცხრაკლიტულს
და მტვრევა დაუწყო. რვა კარი გატეხა; მეცხრე კარი
ქონდა გასატეხი და რქა მოტყდა. დაღონდა წიქარა. თა-
ვის რქას ისე არა ჩიოდა, როგორც მეგობრის ტყვეობას.
რქა ინატრა. ამ დროს გამოძვრა საიდგანლაც ერთი თავგი
და წიქარას უთხრა:

— შენი ლეში მაქამე და რქას მოგაბამო.

— გაჰმევეო, — უთხრა წიქარამ.

თავმა გაუმთელა რქა.

ეცა წიქარა მეცხრე კარსაც და შეღეწა. შევიდა ვაჟ-
თან შეისვა ზურგზე და გაეშურა ალვის ხისაკენ. დატოვა
ვაჟი ალვის ხეზე და თვითონ ისევ მინდორში წავიდა.

არის ვაჟი ალვის ხეზე, უკრავს საღხინო სალამურს
და ერთობა. ერთხელ ძალიან მოუნდა წიქარას ნახვა და
საჭირე სალამური დაუკრა; დაუკრა მაგრამ წიქარა აღარ
მოვიდა. დაღონდა ვაჟი. ჩამოვიდა ძირს; კიდევ დაუკრა

საჭირე სალამური, დაუკრა და აატირა მთელი ქვეყანა; იმისი ცოდით ბალახებიც ტიროდნენ; პეპლები აღარ ფრინავდნენ და ცრემლებსა ღვრიდნენ. ხეებიც აღარ ინძრეოდნენ. უკრავდა სალამურს და შავი ყორანი კი, ლე- შით გამძღარი, სადღაც მიეშურებოდა. წავიდა ვაჟი, ეძე- ბა წიქარა და ბოლოს მინდორში მკვდარი იპოვა. შავ ყორანს და უმსგავსო სვავ-ყაჯირებს თვალები დაეთხარათ, ყვავ-კაქკაქებს გამოეხრათ. დასტირა ვაჟმა წიქარას, დას- ტირა ცხარედ; აღარ დაუკრავს სალამური, არც სალხინო და არც საჭირე...

პირი იქა,
ლხინი აქა,
ქატო იქა,
ფქვილი აქა.



ნ ა ს ი ა



ყო ერთი უღონო კაცი, სახელად ნასია. ისეთი მსუბუქი იყო, რომ ქარის შემობერვაზე ერთ ვერსზე გადავარდებოდა.

ერთხელ ნასია ქარმა სკაში ჩააგდო, თამაშობდა ფუტკრებში და იყო ასე. მოიმწყვდევდა ხელში ათას ფუტკარს და ხოცავდა.

ერთხელ ნასიამ ჩვეულებრივად მოიმწყვდია ხელში ათასი ფუტკარი და დახოცა. აილო ქალაღი და დააწერა:

„მე ვარ ბიჭი ნასია,
ცალი ხელით მომიკლავს ათასი კაცია“.

ქალაღი მინდვრად დააგდო.

მეფის ვეზირებმა იპოვეს მინდვრად დაგდებული ქალაღი და მიართვეს მეფეს.

მეფეს გაუკვირდა ასეთი ღონიერი კაცის არსებობა და ბრძანება გასცა — მომიძებნეთ ნასიაო.

წავიდნენ სხვადასხვა მხარეს ნასიას საძებრად. ნახეს — ერთ მინდორში კაცი გორაობს. ეს ნასია იყო, რომელიც ქარს სკიდან ამოევდო და მიწაზე გორაობდა.

ვეზირებმა აჩვენეს დაწერილი ქალაღი და ჰკითხეს, ასეთი კაცის შესახებ ხომ არა იცი რაო.

— ეს მე ვარო, — მიუგო ნასიამ.

ნასია შემოსეს ძვირფასი ტანისამოსით და ზეფეს მიჰგვარეს.

შეიტყო მეზობელმა ხელმწიფემ, ამ მეფეს ასეთი და ასეთი შესანიშნავი კაცი ჰყოლიაო, და შემოუთვალა: ეგ ვილაცაა ჩემთან გამოგზავნე საჩხუბრადო.

შეუკაზმეს ნასიას ცხენი და გაგზავნეს საომრად,

ნასიამ გაიხედა და დაინახა—ხელმწიფეს აუსხამს ურიცხვი იარაღი და მოდის მისკენ. შიშით კინაღამ გული გაუსკდა, თვალებზე ხელი მიიფარა და მტერს მიუახლოვდა.

ხელმწიფემ დაინახა—ნასია თვალებზე ხელაფარებული მიდის მისკენ, იფიქრა: ეს კაცი ან სასაცილოდ მიგდებს, ან ეს არის კარგი საომარი ხერხიო, მოდი, მეც დავხუჭავ თვალებს. მართლაც დახუჭა თვალები.

შიშისაგან აკანკალებულმა ნასიამ გამოიხედა და დაინახა, რომ მტერი თვალდახუჭულია. იძრო ხმალი, გაჰკრა ხელმწიფეს და თავი წააგდებინა.

დაბრუნდა ნასია გამარჯვებული. მეფემ თავისი ქალი მიათხოვა.

შეიტყო მეორე ხელმწიფემ ნასიას გმირობა და ახლა ამან გამოითხოვა საომრად.

ნასიამ სიმამრს მოსთხოვა:

— გამატანე ასი კაცი, თითოეულმა წამოიღოს თითო კეტი, თითო ქათამი და რაც მე გავაკეთო, იმათაც იგივე გაიმეორონო.

სიმამრმა თხოვნა შეასრულა.

გამოეთხოვა ნასია სიმამრს, ცოლს და წავიდა საომრად.

გზაში მდინარე შეხვდათ გასავლელი. ნასიამ გადვა თავისი კეტი მდინარეზე, ასმა კაცმაც ასევე ქნა და გავიდნენ ზედ, როგორც ხიდზე.

იარეს, იარეს და დაინახეს, რომ მოდის მტრის უთვალავი ჯარი.

ნასია თავისი მხლებლებით მინდორზე დაჯდა. ყველამ ქათამებს დაუწყო ჭამა. მოვარდა მტრის ძაღლი და

ერთი ქათამი მოიტაცა. წამოაწვლო ნასიამ კეტს ხელი და გამოუდგა. მას, სხვებმაც მიჰბაძეს და მისდიეს ძაღლს მტრის ბანაკამდის.


ხელმწიფემ იფიქრა ესენი ამოგვეღებენ კეტებითო და თავისი ჯარით უკან გაიქცა.

გამარჯვებული ნასია მივიდა სიმამრთან. სიმამრმა თავისი ტახტი ნასიას მისცა.

ელასა, მელასა,
ჰიქა მეკიდა ყელასა.



ს უ თ კ უ ნ ჭ უ ლ ა



ყო და არა იყო რა, იყვნენ
ცხრა ძმანი. ცხრავე ისეთი
ღარიბები იყვნენ, რომ იმა-
თას ვერც არას ცეცხლი
დაწვავდა და ვერც არას

წყალი წაიღებდა. ნახევარჯერ მშივრები იყვნენ.

ბოლოს თქვეს ძმებმა:

— წავიდეთ, ან მოჯამაგირედ დავუღვეთ ვინმეს ან
კიდევ ვიმუშაოთ. დღიური ლუკმა ვიპოვოთო.

წავიდნენ.

იარეს, იარეს და ერთ ქვეყანაში მივიდნენ. აქ ერთი
ღვეი შეხვდათ.

ღვემა ჰკითხა:

— სად მიდიხართო?

იმათ უპასუხეს:

— სამუშაოდ, ლუკმის საშოვნელად, გვინდა მოჯამა-
გირედ ვისმეს დავუღვეთო.

— მე დამიდექითო, — უთხრა ღვემა.

— კარგიო — უპასუხეს ძმებმა.

წაიყვანა ღვემა და წავიდნენ.

ღვეს ცხრა ქალი ჰყავდა, აუარებელი საქონელი, ძრო-
ხა და ცხენი. იმ ღამეს ღვემა კარგი ვახშამი აჭამა ძმებს.
დააწვინა და თითონ კი თვალი დაიჭირა როდის დაეძინე-

ბათო. რვა ძმასა ძინავს, ხუთკუნჭულა კი — უმცროსი ძმა არ იძინებს, ლოგინში წევს და დევზე უჭირავს თვალი.

— დაგეძინათო? — დაუძახებს დევი.

— არაო — უპასუხებს ხუთკუნჭულა.

— რა არ გაძინებსო? — ჰკითხავს დევი.

→ შენი ბატების ყიყინიო! — უპასუხებს ხუთკუნჭულა.

წავა მაშინვე დევი, გადაყლაპავს ბატებს და ცოტას მოიკლძის:

— დაგეძინა, თუ ისევ გღვიძავსო? — დაუძახა ისევ დევმა.

— არაო უპასუხებს ხუთკუნჭულა.

— რა არ გაძინებსო? — ჰკითხა ხელმეორედ დევმა.

— შენი ძროხების ხმაო, — უპასუხებს ხუთკუნჭულა.

წავა დევი, გადაყლაპავს ყველა ძროხას და დაბრუნდება; დაუგდებს ყურს, ყველას სძინავს ვითომ.

— დაგეძინათო? — დაუძახა ხუთკუნჭულას.

— არაო! — უპასუხებს ისევ ხუთკუნჭულა.

— რა არ გაძინებსო? — დაუძახებს გაცეცხლებული

დევი.

— შენი ცხენების კიხვინიო, — უპასუხებს ხუთკუნჭულა.

დევი ისევ წავა, ახლა ცხენების დასაქმელად. ამ დროს აღგება ხუთკუნჭულა, აიღებს დევის ქალების ტანისამოსს, ძმებს დაუწყობს, ძმებსა და თავის ტანისამოსს და ხანჯლებს კი დევის ქალებს და გაიტრუნავს სულს, თითქო დაეძინაო.

მოვა დევი, დაუვლის თავის ქალებს, ვაჟები ჰგონია, დასკრის თავებს და დაჰყრის.

ხუთკუნჭულა ჩააცმევს ძმებს ქალების ტანისამოსს, იმათ გაისტუმრებს და ეტყვის:

— თქვენ წადით და ხილს გაღითო.


თვითონ კი იქ დარჩება.

მეორე დღეს ქალად ჩაცმული ეტყვის დევს:

— იმ ვაჟების ხორცს ჩაყერი რომ დავხოცეთ და მეც ჩემ დებთან წავალ, საყდარში წავიდნენო.

— კარგი წადიო, — ეტყვის დევი.

წავიდა ხუთკუნჭულა და გავიდა ხილს.



დევი ამოიღებს და ჰამს ხორცს. ხორცში ძუძუები

ამოუჩნდება. მაშინვე იტყვის:

— ეს ხუთკუნჭულამ მიყოფო.

აგდებს ხორცს და გამოუდგება ხუთკუნჭულას. კარგა გზას გაივლის და დაუძახებს:

— ხუთკუნჭულავ გამასწარ ხილსაო?

— გაგასწარ და თვალიც მოგთხარეო! — უპასუხებს ხუთკუნჭულა

ის ხილი დევისა და ერთი ხელმწიფის საზღვარზე იდო. იმ ხილს დევი ვერ გავიდოდა და ძალიანაც ეშინოდა, ამიტომ რაკი ხილს გავიდა ხუთკუნჭულა, სამშვიდობოს იყო გასული. დაბრუნდა დევი შინ კბილები კრაჭუნით.

ძმები კი წავიდნენ და მივიდნენ ერთ ხელმწიფესთან. ახლა იმას დაუდგნენ მოჯამაგირედ. ძმები აუხირდნენ ხუთკუნჭულას, მოინდომეს იმისი მოკვლა და ხელმწიფეს უთხრეს:

— ერთ დევს ერთი თხა ჰყავს, ის თხა გულთმისანია და რასაც ან ნახავს, ან გაიგონებს, ყველაფერს იტყვისო. ხუთკუნჭულამ ის თხა რომ მოიყვანოს, კარგი იქნებაო. ის თხა იმ დევისა იყო, ვისთანაც ძმები იყვნენ.

ხელმწიფემ დაიბარა ხუთკუნჭულა და უთხრა:

— წადი და ამა და ამ დევს რომ თხა ჰყავს, აქ მოიყვანეო, თუ არ მოიყვან, — ვერაფერი გიხსნისო.

რას იზამდა ხუთკუნჭულა, ადგა და წავიდა თხის მოსაყვანად. მივიდა დევის სახლში და დაენახვა თხას.

თხამ დაუძახა დევს:

— ხუთკუნჭულა! ხუთკუნჭულა!

გავიდა დევი გარეთ, ეძებს ხუთკუნჭულას. ხუთკუნჭულა კი კარის უკან არის დამალული. ეძებს დევი, მაგრამ ამოად.

ხუთკუნჭულა კიდევ დაენახვა თხას.

თხა კიდევ დაიძახებს:

— ხუთკუნჭულა!

კიდევ ეძებს დევი, მაინც ვერა პოულობს. ბოლოს გაბრაზებული გადისვრის თხას გარეთ.

ხუთკუნჭულა დაავლებს თხას ხელს, გაიქცევა და გავარდება ხილს.

დევი იფიქრებს: — ბიჭო იქნება ის ოხერი ხუთკუნჭულა მართლა სადმე იყვეს, თხა მომტაცოს და წაიყვანოსო, და გამოიხედა გარეთ. სადღაა თხა! იმისი კვალიც აღარ იყო. მაშინვე გამოუდგება დევი, ირბენს და მოუახლოვდება ხილს.

— ხუთკუნჭულავ, გახველ ხილს თუ არაო?

— თვალი კი არ მოგთხარეო!! — მოაძახა ხუთკუნჭულამ და წაიყვანა თხა.

დევი შინ დაბრუნდა გაბრაზებული.

ხუთკუნჭულამ მრუყვანა თხა ხელმწიფეს. ძმებს ეს რასაკვირველია, ვერაფრად ეპიტნავათ.

ხელმწიფეს უთხრეს:

— დიდებულო ხელმწიფევ, მაგ თხის პატრონს ისეთი ხალიჩა აქვს, რომ იმის ფასი დედამიწის ზურგზე არაფერი იქნებაო. თუ ხუთკუნჭულამ იმისი თხა მოიყვანა, ხალიჩასაც მოიტანსო.

ხელმწიფემ ისევ დაიბარა ხუთკუნჭულა და უთხრა.

— უნდა წახვიდე და იმ დევს რომ ერთი ხალიჩა აქვს, ის მოიტანოო.

ხუთკუნჭულას მეტი რა ღონე ჰქონდა, უნდა წასულიყო.

ხელმწიფეს მოახსენა:

— ერთი მუქა ნემს-მახათი მიბოძეთო.

მისცეს ნემს-მახათი. ადგა და წავიდა.

ბევრი იარა თუ ცოტა იარა, მივიდა დევის სახლში, შეიპარა, სადაც ხალიჩა იყო დაგებული, და დაარქო ხალიჩაში ნემსები.

მოვიდა დევი, დაჯდა ნემსებზე, — შეერქო, იქით გადიწია — იქიდან შეერქო, აქეთ გადმოიწია — აქედან შეერქო.

ჭო. ბოლოს რაკი ძალიან შეწუხდა, მოავლო ხელი ხალიჩას და გარეთ გადაუძახა.

დაავლო ხელი ხალიჩას ხუთკუნჭულამ, გააქცია და გავარდა ხიღს.

დეგმა იფიქრა: — ის ეშმაკი ხუთკუნჭულა კი არ იყვეს სადმე და ის ხალიჩა არ წაიღოსო. გამოიხედა, მაგრამ სადღაა ხალიჩა!

დარჩა ხახაცარიელი დევი. გამოეკიდა ხუთკუნჭულას და დაუძახა:

— ხიღს გახველი, ხუთკუნჭულავ, თუ არაო?

— გაველი და თვალიც მოგთხარეო! — უპასუხა ხუთკუნჭულამ.

მივიდა ხუთკუნჭულა ხელმწიფესთან და მიუტანა ხალიჩაც.

ძმებს უფრო აერიათ გული: ხელმწიფეს მოახსენეს:

— ხუთკუნჭულამ მაგ თხისა და ხალიჩის პატრონიც რომ მოიყვანოს, ძალიან კარგი რამ სახილველი იქნებაო.

ხელმწიფემ ისევ დაიბარა ხუთკუნჭულა და უთხრა:

— უნდა წახვიდე და ამ ხალიჩის პატრონიც აქ მოიყვანო.

— კარგო, ოღონდ ერთი ხელი იმერული ტანისამოსი და ხუროს იარაღები რაც რამ არის მიშოვეთო, — მოახსენა ხუთკუნჭულამ.

ხელმწიფემ უშოვა. ჩაიცვა ხუთკუნჭულამ, აიღო ხელში ხერხი, ეჩო, ხუსტარა,¹ შალაშინი და სხვა და გასწია.

ბევრი იარა თუ ცოტა იარა, მივიდა დევის საბრძანებელში. უცებ დევის შეხვდა ტყეში.

— ოჰ, შენ არა ხარ ხუთკუნჭულაო? — დაუძახა დეგმა,

— აი ასე და ასე მოუვიდეს ხუთკუნჭულას და ჩემი ცოდო ნუ დაუღიოს ღმერთმა, იმ ვერანას ვშველოდი, იმერელი ვარ, არაფერი მომცა და გამომაგდო.

დეგმა მართლა დაუჯერა.

¹ ხუსტარა — საღურგლო ხელსაწყოა.

— თუ იმერელი ხარ, მაშ შენ კარგი ხელობა გეცოდინება, რას გააკეთებ საკვირველსაო?—ჰკითხა დევმა.

— მე ისეთ კილობანს გავაკეთებ, რომ შიგ ჩაჯდეს და ფიცარიც ვერ გააგდებინოვო, — უთხრა ხუთკუნჭულამ.

— აბა გააკეთეო, — უთხრა დევმა.

საჩქაროდ გააკეთა კილობანი ხუთკუნჭულამ და უთხრა დევს:

— აბა, ჩადი, ნახე, ძირს გააგდებინებ თუ ვერაო.

ჩაჯდა დევი, ჰკრა წიხლი და გააგდებინა.

გააკეთა მეორედ, ჩასვა და უთხრა:

— აბა ახლა გააგდებინეო?

დევმა მართლაც ველარ გააგდებინა ფიცარი. ხუთკუნჭულამ დალურსმა და უთხრა:

— ფეხით არ იარო, ზურგზე აგიკიდებ და შენს სახლში ისე მიგიტანო.

— კარგიო, — უთხრა დევმა.

მოიკიდა ხუთკუნჭულამ დევიანი კილობანი და გასწია ხელმწიფისაკენ. ხიღს რომ გავიდა, დევს გულმა გაუგო:

— აი, გადაიყვანე, განა ხიღსაო! — უთხრა ხუთკუნჭულას და ღონივრად გაექანა, მაგრამ სად წავიდოდა.

ხუთკუნჭულამ დევი ხელმწიფეს მიუყვანა.

შეიკრიბა მთელი ჯარი, ნაზირ-ვეზირი, ხელმწიფე და სხვა დიდებულნი დევის სანახავად, უნდოდათ გაეხსნათ და ენახათ.

ხუთკუნჭულა კი გაიქცა, წაიღო ერთი მარილის ქვა და ავიდა ერთ მაღალ ჰადარზე. იქიდან უცქერის სეირს.

ახადეს კილობანს, ამოვარდა იქიდან გაგიჟებული დევი, დაერია ხალხს და ყველა ერთად თავის ხელმწიფითა და რვა ძმით გადასანსლა, რაკი ყველა მიყლაპ-მოყლაპა, ხუთკუნჭულას დაუწყო ძებნა და მერე ჰადარზე შეიხედა, იქ მჯდომი ხუთკუნჭულა დაინახა და დაუძახა:

— ხუთკუნჭულავ, მასწავლე, მანდ როგორ ახველო?

— ამ მარილის ქვას ხომ ხედავ, ეს მარილის ქვა გულზე დავიდევ, ამოვფრინდი და ამოველო, — დაუძახა ხუთკუნჭულამ დევს.

— სად ვიშოვო მაგისტანა ქვაო?—ჰკითხა დევმა.

— მე ჩამოუშვებ, გულზე დაგეცემა და ამოხტებიო,—
დაუძახა ხუთკუნჭულამ.

დაწვა დევი გულადმა. ჩამოაგდო ხუთკუნჭულამ, მარ-
ილის ქვა, დაეცა დევს და იქვე მოკლა.

ამრიგად მოიშორა ხუთკუნჭულამ დევი თავიდან. ჩა-
მოვიდა ხიდან.

იმოდენა ქონება მას დარჩა. ასე დიდი სიმდიდრისა და
შეძლების პატრონი, ქვეყნის ხელმწიფეც გახდა.



მ ე ნ ა ხ ი რ ა



რთხელ მამამ თავისი უმცროსი შვილი წაიყვანა შორს მთაზე, სადღაც დაებნა და თვითონ დაღონებული შინ წამოვიდა. ამ ქედზე გველფ-

შაჰი ცხოვრობდა, გადაიხარა, დაინახა ბიჭი და ჩამოსძახა.
— ეი, შენ, ადამიანის შვილო, არ გინდა გაგზარდო ჩემ ძმადლო?

ბიჭმა თანხმობა გამოუცხადა.

გველაშაპმა აიყვანა ბიჭი მაღალ ქედზე და უთხრა:

— აქედან პირდაპირ ჩადი. ერთი ალვის ხე დგას, იქ ნახავ ჩემ დედ-მამას და უთხარი: თქვენს მზეს, ამაღამ შემინახეთ-თქო, ისინი დაგაყენებენ; დილით უთხარი: თქვენი შვილის მზეს, ამ ალვის ხის ნაფოტი მომეცით-თქო, მამაჩემი უარს გეტყვის, მაგრამ დედაჩემი მოგცემსო.

ყმაწვილი ჩავიდა ალვის ხესთან. იქ ერთი კაცი და დედაკაცი ცხოვრობდნენ. ბიჭმა სთხოვა:

— თქვენს მზეს, ამაღამ შემინახეთო.

მისცეს ბინა.

დილით სთხოვა:

— თქვენი შვილის მზეს, ამ ალვის ხის ნაფოტი მომეცითო.

კაცი არა შვრებოდა, მაგრამ ქალმა მისცა და თან დაარია:

— რასაც ინატრებ, მოგცემს ეს ნაფოტი, მხოლოდ უთხარი:

ნაფოტო, შენს მზესა, შენი გამომცემის მზესა, ესა და ეს ამისრულე-თქო.

ბიჭმა წაიღო ნაფოტი და წავიდა. იარა, იარა და მივიდა ერთ ქვეყანაში. იქ ერთ დედაკაცს სთხოვა:

— დედი, პური მშია, მაჭამეო.

დედაკაცს ორი პური ჰქონდა და ერთი მისცა ბიჭს. ბიჭმა შეჭამა, დედაკაცმა მეორე პურის ნახევარიც მისცა, ისიც შეჭამა, ნარჩენი ნატყეხიც მისცა, ბიჭმა ისიც შეჭამა. ბიჭი დანაყრდა და დედაკაცს უთხრა:

— დედი, შენი შვილი ვიქნებო.

— მე შვილი არა მყავს და შენ იყავი ჩემი შვილიო,— მიუგო დედაკაცმა.

ბიჭმა უთხრა:

— წამიყვანე სადმე, მოჯამაგირედ დამაყენეო.

დედაკაცმა წაიყვანა სოფელში და ერთი წლის ჯადით მებატედ დააყენა; მეორე წელიწადს მელორედ დააყენა; მესამე წელიწადს—სოფლის მენახირედ.

იქაურ ხელმწიფის ქალს ორი ძროხა ჰყავდა და თითონ წველავედა. ერთხელ, როცა ქალი ძროხას წველავედა, მენახირემ საქონელი ჩაატარა. დაინახა ხელმწიფის ქალი, ამოიღო ნაფოტი და დაელაპარაკა:

— ნაფოტო, შენსა მზესა, შენი გამომცემის მზესა, ამ ქალს მე ნუ ამაცდენ, ჩემი გახადეო.

შუადღისას მენახირემ ნახირი წყალზე მირეკა. ხელმწიფის ქალიც იქ იყო. დაინახა ქალმა მენახირე და შეიყვარა, ხვდებოდნენ ერთმანეთს. ქალი დაორსულდა, შვილი შეეძინა.

ერთ დღეს ხელმწიფემ გაიგონა ბავშვის ტირილი და გაუკვირდა:

— ჩემ ქალს როდის, საიდან ან ვისგან გაუჩნდა შვილი, ეს რა ამბავია ჩემს თავსაო?

შეყარა ჯარი-ჯარამათი. უნდოდა გაეგო, ვინ იყო ბავშვის მამა.

ბავშვი გაიძახოდა:

— დედა აქა მყავს და მამა არაო.

ხელმწიფემ იკითხა:

— კიდევ აკლია ვინმეო?

— არავინ არ აკლია მენახირის მეტეო, — უთხრეს ხელმწიფეს.

მოიყვანეს მენახირე; ზოგი თავში სცემდა, ზოგი დასციინოდა:

— ხელმწიფის ქალი სწორედ შენ გიკადრებდა, რომ ბავშვმა მამა შენ დაგიძახოსო.

დანიხა ბავშვმა მენახირე და მოყვა ძახილს:

— დედა აქა მყავს, მამაც მოვიდა, დედა აქა მყავს, მამაც მოვიდაო.

ხელმწიფე მიხვდა რაშიაც იყო საქმე: გადევნა ქალი და სიძე; თითონ ჯავრისაგან ავად გახდა. დაიბარა უფროსი სიძეები და უთხრა:

— უკვდავების წყალს თუ მომიტანთ, მოვრჩები, თუ არა და არაო.

მენახირის ცოლმა გაიგო მამის სურვილი, მივიდა მამასთან და უთხრა:

— ჩემ ქმარს გავგზავნი უკვდავების წყლის მოსატანადო.

მამა გაუწყრა:

— წადი, თვალით არ დამენახო, თქვენი მიზეზითა ვარ ავადო.

გააგდო ქალი. სიძეები წავიდნენ უკვდავების წყლისათვის.

მენახირემ ამოიღო ნაფოტი და ინატრა:

— აბა, ნაფოტო, შენსა მზესა, შენი გამომცემის მზესა, ერთი კარგი შეკაზმული ცხენი და ტანისამოსი მომეციო.

გაჩნდა შეკაზმული ცხენი და კარგი ტანისამოსი. მორთო მენახირე, შეაჯდა ცხენს და მიაქროლა წყალთან.

უფროსი სიძეები მისულიყვნენ წყალთან. მენახირემ დაუყვირა:

— ვინა ხართ, რისთვის მოსულხართ აქაო?

სიძეებს წყლის პატრონი ეგონათ და მიუგეს:

— წყალი გვინდა ვიყიდოთო.

— არა ვყიდიო, — უთხრა მენახირემ:

— მაშ რა ვქნათ, უწყლოდ როგორ წავიდეთ, ხელმწიფე კვდებაო, — შეწუხდნენ სიძეები.

— წყალს არა ვყიდი, მაგრამ რადგან ასეა საქმე მოგყიდით, მაგრამ ფასად ყურის ბიბილოებს მოგაჰქრითო.

მოაჰრევინეს სიძეებმა ყურის ბიბილოები და წაიღეს წყალი.

ხელმწიფე მაინც არ განიკურნა. ისევ დაიბარა სიძეები და უთხრა:

— უკვდავების ყურძენი მომიტანეთ, იქნებ მარგოსო.

მენახირის ცოლმა კიდევ სთხოვა მამას:

— ჩემი ქმარიც გავგზავნე უკვდავების ყურძენის მოსატანადო. ხელმწიფემ დაითხოვა თავისი ქალი, ქმარს ნუ ახსენებო.

მენახირემ სიძეებს მიასწრო უკვდავების ყურძენთან.

მივიდნენ სიძეები და თხოვეს მენახირეს:

— უკვდავების ყურძენი მოგვეყიდე, სიმამრი გვეყავს ავადაო.

— ყურძენს არ ვყიდი, მაგრამ თუ ჩემ ცხენს თითო წიხლს მიაკრევინებთ, მოგყიდით თუ არა და არაო, — მიუგო მენახირემ.

რას იზამდნენ სიძეები, მიაკრევინეს ცხენს წიხლები, წაიღეს ყურძენი. ხელმწიფეს ვერც ყურძენმა უშველა რაიმე. ისევ დაიბარა სიძეები და უთხრა:

— ირმის რძე მომიტანეთ, თუ მარგებს ის მარგებსო.

მენახირემ ახლაც გაასწრო სიძეებს, ამოიღო ნაფოტი და დაიკვილა:

— ნაფოტო, შენსა მზესა, შენი გამომცემის მზესა, რაც ირმები არიან, სულ აქ მოგროვდნენო.

მოცვიდნენ ყოველი მხრიდან ირმები და ერთ ადგილას მოგროვდნენ.

ქვისლები მივიდნენ მენახირესთან და სთხოვეს:

— ირმის რძე მოგვყიდეთ.

— თუ თითო შოლტ ტყავს ამაძრობინებთ, მაშინ მოგყიდითო,— მიუგო მენახირემ.

რას იზამდნენ ქვისლები, ააძრობინეს თითო შოლტი ტყავი. მენახირემ მისცა ირმის რძე და მიუტანეს სიმამრს. ხელმწიფე მორჩა, დიდი მეჯლისი გამართა. მენახირემ კარგად ჩაიკვა და ხალხში გაერია. ხელმწიფის სიძეებმა დაინახეს მენახირე და უთხრეს სიმამრს:

— აი ის კაცი გვაძლევდა უკვდავების წყალს, უკვდავების ყურძენს და ირმის რძესაო.

ხელმწიფემ ახლო მიიწვია უცხო სტუმარი, გვერდით მოისვა და ჰკითხა:

— ვინ ბრძანდები, სადაური ხარო?

მენახირემ არაფერი უპასუხა ამაზე და ჰკითხა:

— უფროსი ქალები თუ დაპატიჟეთ მეჯლისზე, რატომ უმცროსი ქალი არა გყავთ დაპატიჟებულთა?

— უმცროს ქალს ცოცხლებში აღარ ვთვლი, ისეთი მსხარა მენახირე ქმარი შეირთო, რომ საქვეყნოდ თავი მომქრაო,— მიუგო ხელმწიფემ.

— მენახირე სიძე მე გახლავარ, რით მჯობიან სხვა სიძეები, ჩემგან მოჰქონდათ უკვდავების წყალი, უკვდავების ყურძენი და ირმის რძე; აი მაგათი ყურის ბიბილოები, საშოლტე ტყავები, გახადეთ შარვლები, თუ ჩემი ცხენის ნალის კვანძები არ ამჩნევიათო,— თქვა მენახირემ და გამოხსნა ხელსახოცში გახვეული ყურის ბიბილოები და ტყავები.

ხელმწიფე დარწმუნდა მენახირე სიძე სჯობნებია სხვა სიძეებსო, პატიება სთხოვა და თავისი სახელმწიფო ჩააბარა.

ყოფილმა მენახირემ დაპატიჟა ძმობილი გველეშაპი, მამა და ძმები. სანამ გამოეცნაურებოდა მამას ჰკითხა:

— შვილი ხომ არა გყავს დაკარგულიო?

— მგონი ერთ ღროს დავკარგე პატარა შვილი, კარგად არ მახსოვსო, — მიუგო მამამ.

გველეშაპს გული მოუვიდა და თქვა:

— მეც უდიერ მამისაგან ვარ დაკარგული და გველის ტყავში გავიზარდეო.

შვილი გამოეცნაურა მამას და თავის სახელმწიფოში ცხოვრობდა ბედნიერად.



გველის ნიშანი



ხოვრობდა ღარიბი ცოლ-
ქმარი. ცოლმა დაამზადა
ძაფის გორგალი და ქმარს
გაატანა გასაყიდად.

კაცმა გზაში ნახა, რომ
ბავშვებს ხელში ჩაეგდოთ გველის წიწილი და აწვალეზდნენ.
შეეცოდა პატარა გველი, ბავშვებს ძაფის გორგალი მისცა
და გველის წიწილი შინ წამოიყვანა.

ცოლი გაუწყრა ქმარს:

— რად გვინდა გველის წიწილი, ძაფის გორგალი
ამაში როგორ დაკარგე, წაიყვანე, გადააგდე, მომაშორეო!

— ამალამ სად უნდა წავიყვანო, იყოს აქ და ხვალ
თავის დედ-მამას მივგვრიო, — მიუგო ქმარმა.

მეორე დღეს მართლაც წაიყვანა გველი. გზაში ერთი
მეცხვარე შეხვდა.

— ეს გველის წიწილი მინდა თავის დედ-მამას ჩავა-
ბარო, არ ვიცი სად იქნებიან, იქნებ შენ იცი და მასწავ-
ლეო, — სთხოვა მეცხვარეს კაცმა.

— მე ვიცი იმათი ბინა, ამა და ამ ალაგას არიან; როცა
დაგინახავენ, უამრავ თვალ-მარგალიტს, ოქრო-ვერცხლს
შემოგაძლევენ, იცოდე, არ აიღო; იმათ ერთი ძველი
სუფრა აქვთ, ის სუფრა ნატურის სუფრა არის — რომ გაშლი,
'რასაც ინატრებ, ყველაფერი მოგერთმევა, ის სთხოვე და
წამოიღეო, — უთხრა მეცხვარემ.

გაუდგა კაცი გზას. მივიდა იქ სადაც მეცხვარემ ასწავლა. მიიყვანა გველის წიწილი, გველებს ძალიან გაეხარდათ დაკარგული შვილის ნახვა. მიიპატიჟეს კაცი, გაუშალეს ოქრო-ვერცხლი, თვალ-მარგალიტი და სთხოვეს—რამდენიც უნდოდა აერჩია და წაეღო.

კაცმა თვალ-მარგალიტი არ აიღო, მხოლოდ ძველი სუფრა ითხოვა. გველებმა დაუნანებლად, სიხარულით მისცეს.

წამოვიდა კაცი შინ, წამოიღო ნატვრის სუფრა.

ცოლი გაუწყრა:

— რად გინდა ეს ძველი სუფრა ხომ ჩვენცა გვაქვს, რატომ ოქრო-ვერცხლი და თვალ-მარგალიტი არ გამოართვიო?!

კაცმა აიღო სუფრა, გაშალა და თქვა:

— სუფრავ, სუფრავ, შენსა მზესა, ჩემსა მზესა, შენი გამოცემის მზესა: რაც ამ საწყალ ხალხს გვეკადრებოდეს, აქ მოგვერთვასო.

სუფრა აივსო ნაირ-ნაირ სასმელ-საჭმელით.

რასაც ინატრებდნენ, ყველაფერს აჩენდა სუფრა.

ცოლ-ქმარი გამდიდრდა.

ცოლმა უთხრა ქმარს:

— ხელმწიფე მოვიწვიოთო,

ქმარს არ უნდოდა ხელმწიფის დაპატიჟება, მაგრამ ბოლოს დათანხმდა.

მოიწვიეს ხელმწიფე თავის ნაზირ-ვეზირებით.

გაშალეს სუფრა, აივსო იქაურობა ნაირ-ნაირ სასმელ-საჭმელით.

ხელმწიფეს გაუკვირდა, მოსამსახურეები არსადა ჩანდნენ, სხვადასხვა საჭმელი-კი მოდიოდა.

ბოლოს მიხვდა ხელმწიფე, რაშია იყო საქმე. დაამთავრა თუ არა სადილი, აიღო სუფრა, დაკეცა, მისცა ვეზირს წასაღებად და წავიდა.

დაჯონდა ცოლ-ქმარი.

კაცი წავიდა ისევ გველებთან. გზაში ისევ ის მეცხვარე შეხვდა და შესჩივლა:

— ხელმწიფე დავაპტიე, მოეწონა სუფრა და წამართვაო.

მეცხვარემ უთხრა:

— გველები კიდევ შეგთავაზებენ ბევრ ოქრო-ვერცხლსა და თვალ-მარგალიტს, მაგრამ არ აიღო. კარებს უკან ერთი რაში ჰყავთ, რამდენსაც დაიფრუტუნებს, ცალ ნესტოდან ოქროსა ყრის, ცალიდან ვერცხლს; თითო დაფრუტუნებაზე თოფრას ავსებს; ის მოითხოვე და მოგცემენო.

კაცი მივიდა გველებთან. დაინახა თუ არა წიწილმა, მაშინვე იცნო, გახარებული გაექანა და ყელზე შემოესკვნა. გველებიც მიეგებნენ; გაუშალეს თვალ-მარგალიტი, ოქრო-ვერცხლი. კაცმა არ აიღო, რაში სთხოვა. გველებმა ისიც დაუნანებლად მისცეს.

წამოიყვანა შინ რაში. რამდენსაც დაიფრუტუნებდა თოფრა ოქრო-ვერცხლით ივსებოდა. ისევ გამდიდრდნენ.

ერთ დღეს ცოლმა აიხირა, აბანოში რაშით უნდა წავიდეთ. წავიდა. შევიდა აბანოში. იმ დროს ხელმწიფის ცოლიც იქ ბანაობდა. გამოვიდა და ნახა მშვენიერი რაში.

ხელმწიფის ცოლს შეშურდა, ვიღაცა დედაკაცს უნდა ჰყავდეს ამისთანა რაში და მე უბრალო ცხენიო? აუშვა რაში, შეჰდა და გააქროლა. თავისი ცხენი იქ დატოვა.

დედაკაცი გამოვიდა აბანოდან, შეჰდა ცხენზე და წავიდა; ვერ გაიგო, რომ რაში შეუცვალეს. მივიდა შინ და ქმარს უთხრა:

— ხედავ, კაცო, როგორ იცვალა ფერი ჩვენმა რაშმა? ცხენს ნესტოებიდან ოქრო-ვერცხლი არ ჩამოსდიოდა. მიხვდნენ, რომ ხელმწიფის ცოლმა წაიყვანა რაში.

კაცი ახლა კიდევ გველებთან წავიდა.

გზაში ისევ ის მეცხვარე შეხვდა, შესჩივლა: ,

— რაში ხელმწიფის ცოლმა წამართვაო.

მეცხვარემ დაარიგა:

— გველები კიდევ დიდი სიხარულით მიგიღებენ, გა-

გიშლიან თვალ-მარგალიტს, ოქრო-ვერცხლს, მაგრამ არც ახლა აიღო. იქ იქნება ერთი გოგრა, ისა სთხოვე და მოგცემენო. წამოიღე გოგრა, მიიტანე ხელმწიფესთან, მოსთხოვე შენი სუფრა და რაში; თუ უარს გეტყვის, გოგრა იფეთქებს, გასკდება, ხელმწიფის სახლს, არემარეს გადაწვავს; სუფრა, რაში და მთელი სახელმწიფოც შენ დაგრჩებაო.

კაცი მივიდა გველებთან. გველები ისევ სიხარულით, წივილ-სისინით მიეხვივნენ, გაუფინეს ოქრო-ვერცხლი, თვალ-მარგალიტი. კაცმა არ აიღო, მადლობა გადაუხადა ბევრი პატივცემისათვის და გოგრა სთხოვა.

გველებმა გოგრაც უშურველად მისთავაზეს.

კაცმა წამოიღო გოგრა, მიიტანა ხელმწიფესთან და თავისი სუფრა და რაში მოსთხოვა.

ხელმწიფე გარისხდა სუფრისა და რაშის მოთხოვნა როგორ გაბედაო. უბრძანა კარის კაცებს ცემით გაეგდოთ.

მივარდნენ კაცს საცემრად კარისკაცები. ამ დროს იფეთქა გოგრამ, და ხელმწიფის სახლკარი, არემარე ცეცხლის ალში გაეხვია.

რაში, სუფრა და მთელი სამეფო კაცს დარჩა.

ჭირი იქა,
ლხინი აქა.



ცხუ და მართალი



ყო ორი ამხანაგი. ერთი იყო ცრუ და მეორე მართალი. ცრუს თავის ღღეში სიმართლე არ ეთქვა და მართალს — სიცრუე.

ერთხელ ცრუმ უთხრა მართალს:

— გავაკეთოთ საგზალი პური და მჭადი, წავიდეთ ბედის საძებნელად, იქნება ხეირს შევეყაროთო.

— კარგიო— მიუგო მართალმა.

გამოაცხვეს პურები, მქადები და გაუღვნენ გზას. საგზალი ცრუმ წამოიკიდა ზურგზე.

იარეს, იარეს, მოშივდა მართალს და შეეხვეწა ცრუს:

— ცოტა თუ არ მაჭამე, შიმშილისაგან დავსუსტდი, სიარული აღარ შემიძლიაო.

ცრუმ უარი უთხრა:

— რა ღროს ჰამაა, ფეხი გამოადგი ჩქარაო.

რას იზამდა მართალი კაცი, განაგრძო სიარული, მაგრამ უარესად დასუსტდა და ისევ შეევედრა ამხანაგს:

— ცოტა მაინც მაჭამეო.

ცრუ ამხანაგმა უთხრა:

— თუ მარჯვენა თვალს ამოიგლეჯ, გაჭმევო.

რაღა უნდა ექნა მართალს, შიმშილით კუჭი ეწოდა, ამოითხარა მარჯვენა თვალი და ლუკმისათვის ხელი გაიშვირა.

ცრუმ ჩვეულებრივად იცრუა და უთხრა ამხანაგს:

— ჯერ ცოტა კიდევ იარე და მერე გაქმევო.

ძლივსძლივობით კიდევ განაგრძო მართალმა გზა, მაგრამ შიმშილმა ძლიერ შეაწუხა და ისევ სთხოვა ამხანაგს პატარა მქადი.

ცრუმ უთხრა:

— სანამ მეორე თვალს არ მოითხრი, არას გაქმევო.

მართალს მეტი გზა აღარ ჰქონდა, ამოითხარა მარცხენა თვალიც და მქადისათვის ცრუს ხელი გაუშვირა.

ცრუმ მქადის ნაცვლად ბრმას ხელში ქვა ჩაუდვა და სადღაც გაეპარა.

დარჩა მართალი თვალებდათხრილი მარტო, უდაბურ ტყეში. შეწუხდა საწყალი, მაგრამ რას იზამდა. გადადგა ორი ნაბიჯი და ხეს დაეჯახა. ბოლოს იფიქრა, ძირს რომ დავრჩე, ნადირი შემქამსო და დიდი გაკირვებით ხეზე აცოცდა. მოუსვა ხელები აქეთ-იქით და ხელში მწიფე მსხალი მოჰყვა—ხეს თურმე მსხალი ესხა ბლომად; დაიწყო ბრმამ ჭამა და ძალზე გაძღა.

გავიდა ცოტა ხანი და ბრმას ხის ძირიდან რაღაც ხმა შემოესმა. თურმე სამი ქაჯი მოსულა და ერთიმეორეს რაღაცას ელაპარაკებინ.

ქაჯებმა თქვეს: ვთქვათ, ვინც რა ვიცითო. ერთმა დაიწყო:

— მე ის ვიცი, რომ აქ ერთი წყალია და ზევით ხეზე რომ ბრმა ზის, ის რომ იმ წყლით თვალს ამოირეცხდეს, მაშინვე აეხილებაო.

მეორემ თქვა:

— ამა და ამ ქვეყანაში ფულის ქესატობაა¹, იქ ერთი დიდი ჰადრის ხეა, მის ძირში აუარებელი ფულია; ვინც ჰადარს მოთხრის, ფულიც მისი იქნებაო.

მესამემ თქვა.

— ამა და ამ მეფეს ერთადერთი ქალიშვილი ჰყავს და

¹ ქესატობა—ფულის ნაკლებობა.

უკვდება, ვერავინ ვერ უშველა და არც მორჩება, თუ არ მოკლეს ის ბაყაყი, რომელიც ქალის ტახტის ქვეშაა.

ბრმამ გაიგონა ქაჯების ნალაპარაკები.

ქაჯები წავიდნენ. ბრმა ჩამოცოცდა ძირს, როგორც იქნა მოძებნა წყალი, ამოიბანა თვალები და მორჩა, აეხილა თვალები.

წავიდა ქადრის ხის საძებრად და იმასაც მიაგნო. მივიდა იქაურ მეფესთან და მოახსენა:

— რას მარგებ, იმდენი ფული რომ აღმოვაჩინო, შენს სახელმწიფოში ყველას ეყოსო.

მეფემ უპასუხა.

— ოღონდ აღმოაჩინე და რამდენიც გენებოს, მიირთვიო.

წავიდა მართალი კაცი, წაიყვანა მეფის კაცები, მივიდა ქადართან, მოთხარა, ამოიღო უამრავი ფული და მეფეს მიუტანა. ერთი ჯორკიდებული თითონ აიღო და მეფეს მიაბარა.

მართალი კაცი წავიდა მეორე სახელმწიფოში, მივიდა იქაურ მეფესთან და მოახსენა:

— მეფევ, რას მიბოძებ გასამრჯელოდ, შენი ქალი რომ მოვირჩინო?

მეფე დაჰპირდა: ყველაფერს მოგცემ, რასაც ისურვებ, თუ კი ქალს მომიჩინო.

შევიდა მართალი ქალის ოთახში, გამორეკა ყველა გარეთ, მონახა ტახტქვეშ ბაყაყი, მოკლა — და ქალიც მორჩა.

გახარებულმა მეფემ უხვად დაასაჩუქრა ეს ექიმი, გამრიტანა ჯორკიდებულები და გამოისტუმრა.

მართალმა კაცმა გამოიარა პირველ მეფესთან, გამოართვა მიბარებული ფული და წამოვიდა სამშობლოში. იწყო მდიდრული ცხოვრება.

გაიგო ცრუმ მართალი ამხანაგის გამდიდრება, მოვიდა და ჰკითხა:

— რამ გაგამდიდრაო?

მართალმა ყველაფერი სიმართლით უამბო.

ცრუმ იფიქრა: გაკეთდა ჩემი საქმე, თუ ასე აღვიღლად შეიძლება გამდიდრებაო, წავიდა ტყეში, მონახა ის მსხლის ხე და აცოცდა ზედ. ღამით მოვიდნენ ქაჯები ხის ძირში და დაიწყეს ლაპარაკი.

გახარებული ცრუ სმენად გადაიქცა.

ერთმა ქაჯმა თქვა:

— ამ ხეზე ცრუ კაცი ზის, ჩამოვიყვან ძირს და ერთს რჯულზე მივბეგვავო.

მეორემ დაუმატა:

— მე სულ მოგვკლავო.

მესამემაც დაურთო:

— ეს მოღესილი დანა რად მინდა? მე სულ ლუკმა-ლუკმად ვაქცევო.

ქაჯებმა შეასრულეს თავიანთი ნათქვამი: ერთმა ძირს ჩამოიყვანა ცრუ და მიბეგვა, მეორემ სულ მოკლა, მესამემ გაღესილი დანით ლუკმა-ლუკმად აკუნწა.

ასე გათავდა ცრუს დღე-ბედი.





ყო და არა იყო რა, იყო
ორი კაცი. ერთი ქოთან
ლობიო ჰქონდათ მოსა-
ხარში, მაგრამ მარილი
არ მოეპოვებოდათ. შე-

დგეს შექამალი; ერთმა უთხრა მეორეს:

— მარილი არა გვაქვს შექამალისთვის, წადი ქალაქში
და იყიდე მუჭანახევი მარილიო.

— მუჭანახევი დამავიწყდება, როგორ დავიხსო-
ვმო?—უპასუხა მეორე კაცმა.

— გზაზე იძახე სულ მუჭანახევი, მუჭანახევი და
არ დაგავიწყდებაო,—დაარიგა პირველმა.

მიდის ეს კაცი ქალაქისაკენ და გაიძახის:

— მუჭანახევი, მუჭანახევიო.

— ამ დროს ერთ კაცს მოეხსნა მამული, პურსა თესდა
და გაიძახოდა:

— ერთი—ათასად, ერთი—ათასადო!

ჩამოიარა ქალაქში მიმავალმა კაცმა და დაიძახა:

— მუჭანახევი, მუჭანახევიო.

მთესველს ბრაზი მოუვიდა: მე ერთი-ათასად მიღდა
მომივიდეს და ეს-კი მუჭანახევი იძახისო. დაიჭირა კაცი,
დასცხო და დასცხო; კარგად რომ იჯერა გული, თავი
დაანება.

კაცმა უთხრა:

— რაღა მცემე, რა დაგიშავე, რომ კინაღამ მომკალიო?

— იმიტომ გცემე, რომ მე ვიძახი ერთი—ათასად მომივიდეს მეთქი და შენ-კი მუქანახევარს გაიძახიო,—უპასუხა მთესველმა.

— მაშ როგორ უნდა მეთქვაო?

— როგორ და „ერთი—ათასად, ერთი—ათასად“ და მაღლობას გეტყოდით.

მიდის მარილის მყიდველი. მივიდა ერთ სოფელში. იქ ვილაცა მომკვდარა და მიაქვთ დასამარხავად. გაუარა გვერდით და დაუძახა:

— ერთი—ათასად, ერთი—ათასადო.

გამოუხტნენ მიცვალებულის პატრონები, მიატყეს და მიაყოლეს. გული რომ მოიჯერეს, თავი დაანებეს.

— რაზე მკლავთ, რას მერჩითო?—შეეკითხა მარილის მყიდველი.

— ერთის სიკვდილი გვიმძიმს და შენ-კი ათასის სიკვდილს გვისურვებო,—მიუგეს ქირისუფლებმა.

— მაშ რა მექნა, როგორ უნდა მეთქვაო?

— როგორა და უნდა მოსულიყავ, ქუდი მოგეხადა და გეთქვა: ეგ ამბავი პირველი და უკანასკნელი იყოს თქვენს ოჯახშიო. მაშინ პატივს გცემდით და ისე გაგისტუმრებდითო.

წავიდა მუქანახევარა და ერთ ალაგას მაყრიონ-ნეფიონს შეხვდა. მოიხადა ქუდი, დადგა და დაიძახა:

— თქვენს ოჯახში ეგ ამბავი პირველი და უკანასკნელი იყოსო.

გადმოუხტნენ მაყრები მუქანახევარას; დადეს და აიღეს; მიატყეს და მოაყოლეს, იმდენი სცემეს, რომ რაც სიგრძე ჰქონდა, ის სიგანე მისცეს; როცა გული იჯერეს, თავი დაანებეს.

მუქანახევარამ ძლივს მოიბრუნა სული და მაყრებს უთხრა:

— რაზე მკლავთ, რა დაგიშავეთ, მე აგრე მასწავლეს, მაშ როგორ უნდა მეთქვაო?

— უნდა მოგეხადა ქუდი, მოსულიყავ და გეყვირა: ნეფიონს გაუმარჯოსო.

მუქანახევარას ამდენი ცემისაგან გვერდები სტკიოდა. ისევ განაგრძო გზა. გზაზე სულ იმას ფიქრობდა, — რა უნდა ვთქვა, კიდევ რომ შემხვდეს ვინმეო? დაინახა ერთი მონადირე. შეუყვებია თოფის ჩახმახი და მტრედებს ეპარება. მუქანახევარამ მაშინვე მოიხადა ქული, მონადირისაკენ გაექანა და დაიყვირა:

— გაუმარჯოსო!

ხმაურზე აფრთხილდნენ მტრედები და გაფრინდნენ. წამოხტა მონადირე და გაბრაზებული გაეშურა კბილების კრაჭუნით მუქანახევარასაკენ. მივიდა მასთან და თოფის კონდახი ზურგში უდო და უდო. იმდენი სცემა საწყალს, რომ კინალამ წუთისოფელს გამოასალმა. გული იჯერა ცემით და თავი დაანება.

— შებრალება აღარ იცი, კაცო? რომ მცემ, რაღა მცემ, რა დაგიშავე? მაშ როგორ უნდა მოვქცეულიყავი, რა მეთქვა, ან რა მექნაო?—ჰკითხა მუქანახევარამ.

— ხმა არ უნდა ამოგელო, უნდა დაკუზულიყავი და ისე გაგველო; მტრედები ვეღარ დაგინახავდნენ, არ გაფრინდებოდნენ და აღარც ამ კონდახებს იგემებდიო.

მიდის მუქანახევარა ისევ თავის გზაზე. მიადგა ერთ ლობეს. დაინახა ოთხი კაცი, ფულიანი ქისა დაკარგვიათ და ეძებენ. დაიკუზა მუქანახევარა და ჩუმად მიიპარება ლობის ძირზე. დაინახეს კაცებმა, რომ ვიღაც მიიპარება, ქურდი ჰგონიათ. გამოუდგნენ, სტაცეს ხელი ჩოხის ბოლოში, დაიჭირეს, ამოიდეს ფეხებქვეშ და უდეს და უდეს. თან სცემდნენ და თან ლანძღავდნენ:

— შენ არამზადა, ყაჩაღო, ქურდო, ჩვენი ქისა იპოვნე და მალაფო.

იმდენი სცემეს საწყალს, რომ უკან დაბრუნებული შინისაკენ ძლივს მიათრევდა ფეხებს.

ჭირი იქა,

ლხინი აქა,

ქატო იქა,

ფქვილი აქა.

ზ ა რ მ ა ტ ი



ყო და არა იყო რა, იყო ერთი ცოლ-ქმარი. ქმარი მეტისმეტად ზარმაცი იყო, არაფერს არ აკეთებდა, იჯდა, ჰამდა და ხან ერთ გვე-

რღზე გადაბრუნდებოდა და ხან მეორეზე. ცოლი შრომობდა, რაც ძალი და ღონე ჰქონდა, ქმარსაც კვებავდა, აცმევდა და თავისთავსაც. მაინც ღარიბად ცხოვრობდნენ. ერთი ნაჭერი მიწა ჰქონდათ საღლაც შორს, რიყეზე¹ და ქვიშაზე, ზედ ღოღო² და ჰინჭარი იღვა, არაფერი მოდიოდა.

ერთ გაზაფხულზე ცოლმა თესლი ჩამოიტხოვა. მოახვინვეინა მეზობლებს მიწა და მოათესინა. ამოვიდა ყანა, მაგრამ რა ყანა: სულ ზღვასავით ღელავდა.

მოვიდა მკათათვე. ცოლმა უთხრა ქმარს:

— კაცო, ადექი, წადი, ყანას დახედე, იქნება არაფერი მოსულა და ჩვენ ტყუილუბრალოდ იმედი გვქონდესო.

ზღაზვნით წამოდგა ზარმაცი, წავიდა ყანის სანახავად. ნახევარი გზაც არ გაუვლია, დაბრუნდა ისევ უკან და ცოლი მოატყუა:

— წავედი, ვნახე, ღოღოსა და ჰინჭრის მეტი არაფერი მოსულა, თესლი რაზე გადავყარეთ ტყუილადო.

¹ რიყე—მდინარის პირი, ქვიანი და ქვიშიანი.

² ღოღო—ერთნაირი მცენარეა.

ცოლმა იცოდა, რომ ქმარი ტყუოდა, მაგრამ არაფერი უთხრა.

როცა ყანა სამკალი გახდა, ცოლმა უთხრა ზარმაც ქმარს:

— კაცო, ან სამკალს წადი, ან შინ დარჩი და რძე შედღვიბე, კრუხ-წიწილას საკენკი დაუყარე, თვალი დაიჭირე და თანაც ფქვილი გასცერი და პური გამოაცხვეო.

ზარმაცმა შინ დარჩენა არჩია. კრუხ-წიწილა არსად წავიდესო — აილო ძაფის გორგალი, ერთმანეთს გადააბა და კალოზე გაუშვა. უცებ საიდგანლაც გაჩნდა ქორი, დააფრინდა კრუხ-წიწილას და ერთბაშად ყველა გააქანა.

წამოიკიდა ზარმაცმა ფქვილიანი გულა, სარძევე და ისე გამოუდგა ქორს. იფიქრა: კრუხ-წიწილასაც დაეაგდებინებ ქორს, ფქვილიც გაიცრება, რძეც შეიღღვიბება და ერთბაშად ყველა საქმეს გავაკეთებო.

ვერც კრუხ-წიწილა დაატოვებინა ქორს, ფქვილი დააპნია, რძეც დაღვარა და დაბრუნდა შინ.

შეფიქრიანდა ზარმაცი:

-- რაღა ვუთხრა ცოლს, საიდან ვუშოვო კრუხ-წიწილა, ან ფქვილი და რძეო?

იფიქრა, იფიქრა და მოიგონა:

— ჩემს ცოლს ხომ კვერცხები აქვს შენახული, ჩავაწყობ იმას ბუდეში, ზედ დავაჯღები და ვიდრე ჩემი ცოლი სამკალიდან დაბრუნდება, წიწილებს გამოვჩეკ კიდეცაო.

იფიქრა ეს და შეასრულა კიდევ. ჩააწყობ კვერცხები ბუდეში, ზედ თითონ დააჯდა და მოჰყვა კრუხ-კრუხს.

სალამოზე ცოლი დაბრუნდა სამკალიდან და ქმარს დაუძახა:

— კარი გამიღე.

— კრუხ-კრუხ-კრუხ! — მოესმა სახლიდან.

— კარი გამიღეო, — გაიმეორა ცოლმა.

— კრუხ-კრუხ-კრუხ! — მოესმა კიდევ.

მესამედ კიდევ დაუძახა:

— სადა ხარ, სად დაიკარგე, ჩქარა კარი გამიღეო!

მაგრამ ხმა არავინ გასცა და მარტო კრუხ-კრუხ ისმოდა სახლიდან.

ცოლმა შეამტვრია კარები, შევიდა სახლში და რას ხედავს: ქმარი ჩამჯდარა ქათმის საბუღარში და კრუხუნებს.

— რა არის, კაცო, ეს რა მოგიგონებია, რასა შერე-ბიო?! — გაუწყრა ცოლი.

— კრუხ-წიწილა ქორმა წამართვა, კვერცხებს დავა-ჯექი გამოსაჩეკადო, — უპასუხა ქმარმა.

— არ მინდა შენი გამოჩეკილი წიწილები, ამოდი ბუ-დიდანაო,! — უთხრა ცოლმა, ზარმაცი ქმარი ბუდიდან ამო-იყვანა და კერაზე დასვა.

მეორე დღეს ცოლმა ისევ ჰკითხა ზარმაცს:

— რას იზამ: ისევ შინ დარჩები და სახლს მოუვლი, თუ სამკალში წახვალო?

— სამკალში წავალ, მარტოკა მე მოვმკი იმ ყანას, თუ დღეში სამ ქათამს დამიკლავ: ერთს სადილად, ერთს სამ-ხრად და ერთს ვახშმადო, — უპასუხა ქმარმა.

— ოღონდ შენ ის ყანა მომკე და თუნდ ოთხ ქათამ-საც დაგიკლავო, — უთხრა ცოლმა.

წავიდა ზარმაცი ყანაში. მთელი დღე ეგდო და ეძინა. სამი ქათამი შეჭამა და სამი ძნა კი ვერ მოჭრა. ასე გავიდა სამი-ოთხი დღე. სამკალი თითქმის მიწას ერთვოდა.

ერთ დილას ადგა ზარმაცის ცოლი, ითხოვა ცხენი. კაცის ტანისამოსი, იარაღი; ჩაიცვა ტანზე, იარაღი აისხა, შეეჯდა ცხენზე და ქმრისაკენ გასწია, მიუახლოვდა ზარ-მაცს და დაუძახა:

— მომკალო, ერთი ზარმაცი კაცი ხომ არ იცი, ხელ-მწიფეს შეილი ჰყავს ავად, უკვდება; ზარმაცის ღვიძლი გვასწავლეს, ის უშეფლისო.

ზარმაცი შეშინდა და შეჭყიცა:

— აი ეს ერთი საათია, რაც მკა დავიწყე და მეტს როგორ მოვმკილიო.

— თუ საღამომდის არ მოგიმკია ეგ ყანა, მოვალ, ვნახავ, თავს მოგჭრი, ღვიძლს ამოგაცლი და ხელმწიფეს წავუღებო. ეს თქვა, გასცდა და წავიდა.

ეცა ზარმაცე ყანას, დატრიალდა, საღამომდის ბოლი აადინა, სულ მომკა. საშინლად მოიქანცა, დაჯდა და დაიწყა ქშენა.

საღამოზე ცოლმა ვახშამი მოუტანა, მაგრამ ზარმაცს ქამის თავი აღარა ჰქონდა, იჯდა და კვნესოდა.

ცოლი შეეკითხა:

— რამ დაგღალა ასეო?

ზარმაცმა უამბო:

— დილით ერთმა ხელმწიფის კაცმა გამოიარა და დამემუქრა: თუ საღამომდის არ მომკი ყანას, მოვალ, თავს მოგჭრი, ღვიძლს ამოგაცლი და წავიღებო.

— მერე, შენ რისი გეშინია, ყანა მოგიმკია, ის შენ არაფერს გეტყვისო, — გაუკეთა გული ცოლმა.

ცოლმა და ქმარმა მოაგროვეს ძნები, გაღეწეს, ჩაყარეს მარცვლები და შინ წამოვიდნენ.

ზარმაცს ერთი ღორი ჰყავდა; რაც რამე ებადა, იმას აქმევდა.

ცოლმა უთხრა:

— კაცო, ჩვენთვის არაფერი გვაქვს რომ ვჭამოთ, და შენ ყველაფერს ღორს აქმევ, მოვიშოროთ, დავკლათო.

— სანამ სიმსუქნისაგან ქონი გარეთ არ გამოუვა, არ დავკლავო, — უპასუხა ქმარმა.

ერთ დღეს ცოლმა გაათბო ერბო, მიასხა ღორს, მიიყვანა ქმართან, აჩვენა და უთხრა:

— შეხედე, ისე გასუქებულია, რომ ქონი გამოსდისო.

დაიჯერა მცონარამ, დაკლა თავისი საყვარელი ღორი, რადგანაც მუცელი უფრო უყვარდა. ღორის ხორცი მალე შეჭამა, მხოლოდ ერთი ბარკალი-და დარჩა, რომელიც მისმა ცოლმა გადამალა.

შეიტყო, ცოლს ღორის ბარკალი დაუმაღლავსო, და გადაეკიდა — მომეციო.

ცოლმა უარი უთხრა.

— თუ არ მომცემ, მოვკვდებიო, — უთხრა ზარმაცმა.

— მოკვდი, თუ მოკვდები, ვის დააკლდებიო, — მიუგო ცოლმა.

ზარმაცი გაიშოტა ტახტზე, დახუკა თვალები, სული განაბა, თავი მოიმკვდარუნა. ცოლმაც დაიწყო ვითომ ტირილი. გააკეთებინა კუბო, ჩადვეს შიგ, მოიყვანეს მღვდელი და წაიღეს საყდარში.

ცოლი მივიდა ქმართან და ჩასჩურჩულა:

— გაცოცხლდი, თორემ მართლა დაგმარხავთო.

— მკვდარი ვარ, როგორ გავცოცხლდეთო,— უპასუხა ქმარმა.

— გაცოცხლდიო,— დაუყინა ცოლმა.

— გავცოცხლდები, თუ ღორის ბარკალს მომცემო,— უთხრა ქმარმა.

— არაო,— მიუგო ცოლმა.

— მაშ არც მე გავცოცხლდებიო,— უპასუხა ზარმაცმა.

დაასვენეს მცონარა ეკლესიაში და შინ წამოვიდნენ.

როცა დაღამდა, ადგა ზარმაცის ცოლი; მივიდა საყდრის კარებთან და დაიძახა:

— მკვდრებო, ახლებო და ძველებო! გაიგონეთ, ადექით, ცაში საყდარი შენდება; ვინც ახალი მკვდარი ხართ, ორას-ორასი აგური უნდა აიტანოთ, ვინც ძველი — ას-ასიო.

გაიგონა ზარმაცმა, შეშინდა: მე ხუთ აგურსაც ვერ ვზიდავ, ორასი როგორ უნდა ავიტანო ცაშიო, წამოხტა და ეკლესიიდან შინისაკენ მოუსვა.

ის დღე დაიმახსოვრა, აღარც თავი მოუმკვდარუნებია, აღარც ღორის ბარკალი მოუთხოვნია და აღარც გვერდზე უგორავნია, მუდამ შრომობდა და ცხოვრობდნენ მდიდრად და ტკბილად.

ყლასა—მელასა


ჭიქა მეკიდა ყელასა,

მთქმელს და გამგონებელს,

ჭირი გაშოროთ ყველასა.



ოსტატი და შვილი



ყო ერთი ღარიბი გლეხი,
ჰყავდა ერთი ვაჟიშვილი.
წაიყვანა შვილი და აღსა-
ზრდელად ერთქუდიანს,

თვალთმაქც ოსტატს მიაბარა.

ოსტატმა გლეხს პირობა დაუდო:

— ჩემს ხელობას შევასწავლი, მოდი შემდეგ და თუ
შენი შვილი ვერ იცნო, ჩემი იყოსო.

გლეხი დაეთანხმა.

ერთი თვის განმავლობაში შეგირდმა იმდენი რამ ის-
წავლა, რომ ოსტატს გადააჭარბა თავის ხელობაში.

წამოვიდა გლეხი შვილის სანახავად. შვილი გზაში
შეხვდა, მაგრამ ვერ იცნო.

შვილი გამოეცნაურა მამას და დაარიგა:

— სადილად რომ დავჯდებით, მე ღვინოს დავასხამ;
ოსტატი რომ გკითხავს რომელია შენი შვილიო, შენ
მიუგე, ღვინოს რომ ასხამს ის არის-თქო.

გლეხიც ასე მოიქცა და წამოიყვანა თავისი შვილი.
გზაში შვილი ფეხმოტეხილ-ჩხიკვად გადაიქცა. მამამ
სდია, სდია, ვერ დაიჭირა.

ჩხიკვმა დაუარა თავი და უკან დასკუპდა.

მამამ მოიხედა უკან, შვილი დაინახა და საყვედურით
მიმართა:

— შვილო, უკან რომ არ ჩამორჩენილიყავ, იმ ჩხიკვს დავიქვრდითო.

— ის ჩხიკვი მე ვიყავიო,— მიუგო შვილმა.¹

მამას გაუკვირდა ძალიან, ეს რა უსწავლია ჩემს შვილსო.

ცოტა ხნის შემდეგ ვაჟი ფეხმოტეხილ კურდღლად გადაიქცა და მამას წინ ვადაუარა.

გამოეკიდა მამა, სდია, სდია, ვერ დაიქირა. მოიხედა და უკან ჩამორჩენილი შვილი დაინახა. საყვედურებით აავსო:

— შვილო, რომ მომყოლოდი, იმ კურდღელს არ გავუშვებდიო.

ის კურდღელიც მე ვიყავიო,— მიუგო ვაჟმა.

მამას ახლა უფრო გაუკვირდა.

მესამეთ ვაჟი ჯორად იქცა, შეისვა მამა ზურგზე, შინ მიიყვანა და ისევ ვაჟად გადაიქცა.

გლეხი ძალიან ღარიბად ცხოვრობდა. ერთხელ შვილმა ურჩია მამას:

— მე ჯორად ვიქცევი, შენ წამიყვანე, გამყიდე, მხოლოდ ჩემს ოსტატს არამც და არამც არ მიმყიდოო.

ვაჟი იქცა ჯორად. წამიყვანა გლეხმა გასაყიდად. გზაში ხილთან ოსტატი შეხვდა. შეევაჭრა ოსტატი, მაგრამ გლეხმა უარი უთხრა, არ მიჰყიდა.

ოსტატმა სამას თუმნამდე ასწია ფასი, შეაცდინა გლეხი და იყიდა ჯორი. მიიყვანა შინ, დააბა თავლაში და ცოლ-შვილს უთხრა:

— მე სხვაგან მივდივარ, არამც და არამც ჯორი გარეთ არ გამოიყვანოთო. წყალი თუ მრუნდეს, შიგ თავლაში ასვითო.

ოსტატი წავიდა. მეორე დღეს მივიდნენ შვილები ჯორთან. შეკუნტრუშდა ჯორი. შვილებმა თქვეს:

— გავლა უნდა, მოდი, წყალზე წავიყვანოთო.

წამიყვანეს. მიუახლოვდა თუ არა ჯორი მდინარეს, იქცა თევზად და წყალში შეცურა.

დაბრუნდა ოსტატი შინ, იკითხა ჯორი. გადგო რაც მოხდა, იქცა ბადედ და დაიქირა თევზი.

თევზი თავად იქცა და გაიქცა.

გადაიქცა ოსტატი კატად და გაედევნა თავგს.

თავგმა იმდენი ირბინა, რომ მზეთუნახავის კალთაში ჩახტა და ვაშლად იქცა.

კატა იქცა მათხოვრად, მივიდა მზეთუნახავთან და ვაშლი ითხოვა.

მზეთუნახავმა ვაშლი გადმოუგდო, მაგრამ ვაშლი ფეტვად იქცა და ძირს გაიპნა.


მათხოვარი წიწილებიან კრუხად იქცა, დაეხვივნენ მარცვლებს და დაუწყეს კენკვა.

ერთი მარცვალი ჭერში შეხტა, იქცა ნემსად და იქ შეერკო.

კრუხი ძაფად იქცა და ნემსში გაეყარა.

ნემსი ჩახტა ცეცხლში, დაწვა ძაფი, იქცა ისევ ვაჟად და მამასთან დაბრუნდა.





ყო და არა იყო რა, იყო
 ცოლი და ქმარი. ჰყავდათ
 სამი ქალი. ძალიან ლარი-
 ბად ცხოვრობდნენ; მა-

მული არა ჰქონდათ და დედული.

ერთხელ ცოლი თაროს წმენდდა; ამ დროს თაროდან
 ძირს პურის სამი მარცვალი გადმოვარდა. წაიღეს ეს მარ-
 ცვლები, გაჩიქნეს მიწა და ჩათესეს შიგ. ისეთი ყანა მოვიდა,
 რომ ავი თვალით არ შეეხედებოდა, ზღვასავით იდგა.
 თავთავების სიმძიმისაგან ყანა მიწოლილი იყო. ცოლი და
 ქმარი სიხარულით ცას ეწეოდნენ.

დამწიფდა მარცვალი, შემოვიდა ყანა და ყველანი წავი-
 დნენ სამკალად. მომკეს, შეკონეს და დადგეს უზარმაზარი
 ძნა. სალამოთი შინ წამოვიდნენ.

მეორე დღეს მამამ უფროსი ქალი ძნის სანახავად გაგ-
 ზავა. მივიდა ქალი, შეხედა და რას ხედავს: ძნას უზარმაზარი
 გველეშაპი შემოხვევია და კუდი პირში უჭირავს. ქალს
 შიშისაგან გული წაუვიდა. როცა გონს მოვიდა, წავიდა
 მამასთან და უამბო, რაც იქ ნახა.

მეორედ მამამ შუათანა ქალი გაგზავნა: — ჰკითხე, რა
 უნდა გველეშაპს, რისთვის შემოჰკვრია ძნასაო?

წავიდა ქალი, მაგრამ დაინახა თუ არა უზარმაზარი
 გველეშაპი, შიშით კინალამ გული გაუსკდა, ვერაფერი ვერ
 ჰკითხა და ისე წამოვიდა შინ.

მესამედ მამამ უმცროსი ქალი გაგზავნა. ქალი მივიდა გველეშაპთან და ჰკითხა:

— რა გინდა, რისთვის მოსულხარ, გვითხარო.

— წადი, მამაშენს უთხარი, ერთერთი ქალი მომცეს ცოლადაო, — უთხრა გველეშაპმა.

ქალი მივიდა მამასთან და გადასცა გველეშაპის დანაბარები.

მამამ უფროს ქალს ჰკითხა:

— შეილო, გველეშაპს გაჰყვები ცოლად თუ არაო?

— გველეშაპს ცოლად როგორ გავყვებიო — უპასუხა ქალმა.

შუათანა ქალმაც ასე თქვა. ჯერი უმცროსზე მიდგა. უმცროსმა ქალმა თანხმობა გამოაცხადა, — გავყვებიო.

მივიდა ქალი გველეშაპთან და გაჰყვა. წინ გველეშაპი მიცურავს და უკან ქალი მისდევს. როცა სოფელს გასცდნენ, გადაიძრო გველეშაპმა ტყავი და ისეთ ვაჟკაცად იქცა, რომ უკეთესი არ შეიძლება. ქალს ძალიან გაეხარდა.

ვაჟმა უთხრა ქალს:

— ჩვენს ქვეყანაში ქაჯურად ლაპარაკობენ; დედაჩემმა რომ გითხრას კოკა გატეხეო, შენ ადექი და მიუტანე; რომ გითხრას წყალი დაღვარეო, წყალიც მიუტანე; თონე დაამტვრიეო რომ გითხრას, — შენ გაახურე; სუფრა ააღაგეო — შენ გაშალე; ჯამები დაამტვრიეო — მიუტანე.

ამგვარად დაარიგა ვაჟმა ცოლი და მიიყვანა ქაჯების ქვეყანაში.

დედამთილმა დასაქმა პატარძალი:

— წყალი დაღვარეო.

ადგა ქალი და მიუტანა წყალი. ყველაფერს ისე ასრულებდა, როგორც ქმარმა დაარჩა. ყველას ძალიან უკვირდა: ახალი მოსული არის და საიდან იცის ყველაფერი აქაური წესი და რიგო.

ქალი ყველას მოსწონდა და უყვარდა.

გავიდა ხანი. ქალი დაორსულდა. მშობიარობის დრო რომ მოახლოვდა, სამშობიაროდ სამშობლოში წაიყვანეს. უფროს დებს შემუხრდათ მისი ცხოვრება.

ქალს ვაჟი შეეძინა. მივიდა ქმარი წასაყვანად. უფროსმა დამ მოინდომა გაჰყოლოდა დასა და სიძეს. ქალმა უთხრა: — ნუ წამოხვალ, ბოროტი დედამთილი მყავს, არ მოვასვენებსო.

არ დაიშალა უფროსმა დამ და გაჰყვა. გზაზე ცოლის-დამ უთხრა სიძეს:

— ჩემი და დაიღალა, ბავშვს მე გამოვართმევ, შენ წინ წადი და მოგეწევიტო.

წავიდა ვაჟი წინ. დები უკან მიდიან. გზაზე ერთი ვაშლის ხე შეხვდათ, უტოტო, ძალიან მაღალი და წვერში დახუნძლოული.

უფროსმა დამ უთხრა უმცროსს:

— მოდი, დაო, ჩემი ტანისამოსი ჩაიცვი, შენი არ დაგეხეს, გიშველი და ვაშლის ხეზე ადი, დაკრიფე და შენს ჩამოსვლამდის ბავშვს მე დავიჭერო.

რას იფიქრებდა საბრალო დედა, შვილი დას მისცა, დამ უშველა და ხეზე ავიდა. დაიწყო ვაშლის კრეფა. უფროსმა დამ მიატოვა ქალი ხეზე, აიყვანა ბავშვი და გაუდგა გზას. ტირის, ტირის ბავშვი, მუშტის ოდენა ცრემლები სცვივა, მაგრამ ვინ უგდებს ყურს. ვაშლის ხეზე ზის დედა და ესმის შვილის ტირილი, მაგრამ ხიდან მარტო ვერ ჩამოვიდა და დაუძახა დას:

დაო, დაო, ძუძუძაღლო,

ნუ მიტირებ წულსა¹ ყრმასა,

შემომისვი ქანდარასა,

მოვაწოვებ პატარასა.

დამ ყური არ ათხოვა და განაგრძო გზა. დაინახა სიძე და დაუძახა:

— მოიცადე, ადამიანო, რძე გამიშრა და ბავშვი მი ტირისო. დაუცადა კაცმა. კაცს თავისი ცოლი ჰგონია.

— სად არის შენი და, რომ აღარ მოდისო? — ჰკითხა კაცმა.

¹ წული — შვილი.

— მე ვუთხარი ჩემს დედამთილს ვერ გაუძლებ-მეთქი და უკან დაბრუნდაო.

მივიდნენ შინ. მიიყვანეს ბავშვიც. დედამთილი ეუბნება:

— რძალო, ლიტრა გატეხეო.

ისიც აიღებს ლიტრებს, ჩახ-ჩუხ და ამტვრევს.

— ჯამები დაამტვრიეო.

ისიც დასცხებს ჯამებს და დაამტვრევს.

— თონე გატეხეო.

აილო ცული, დასცხო და დაამტვრია. სულ ერთიანად დაამტვრია ყველაფერი. ყველას უკვირდა—რა მოსდის ამ ქალსაო?

ბავშვი ძროხის რძით იზრდებოდა. როცა მოიზარდა, წაიყვანდა ძროხას მინდორში და აძოვებდა.

ვაშლის ხეზე შერჩენილმა ბავშვის დედამ იმდენი იტირა, რომ ცრემლადა და სისხლად დაიღვარა მიწაზე. მისი ცრემლითა და სისხლით მორწყულ ადგილზე ამოვიდა ლერწმის ტყე; გაიშალა ათასნაირი ყვავილი და ბალახი.

ერთხელ პატარა ბიჭმა თავისი ძროხა საბალახოდ წაიყვანა. მივიდა იმ ვაშლთან, რომელზედაც დედამისი დატოვეს, მოტეხა ლერწამი და ფრჩხილით სტვირი გააკეთა. დაუკრა და დაუკრა.

სტვირი უკრავდა და თან იძახოდა:

— სტვირო, სტვირო,

რასა, სტვირო?

— დედაშენი ვშავდები,

ჩემი შვილი ბრძანდები!

ვაჟმა ჩაიკრა გულში სტვირი და აღარ იშორებდა. მოიტანა შინ და დაუკრა. სტვირმა ისევ ის სიტყვები დაიძახა. გაიგონა მოლალატე ქალმა და გულზე ცეცხლი მოედო. წაართვა ბავშვს სტვირი და დაუმტვრია. ბავშვმა აილო სტვირის ნამტვრევი და დაუკრა. ნამტვრევმაც დაიძახა:

— სტვირო, სტვირო,

რასა სტვირო?

— დედაშენი ვშავდები,

ჩემი შვილი ბრძანდები!

ქალმა ნამტვრევებიც წაართვა ბავშვს, თონეში ჩაყარა და დაწვა. ფერფლისაგან ქალის სახე გაკეთდა და თონეზე მისვინა.

ბავშვი სულ თონესთან იჯდა და თავის სტვირს ჩასტიროდა.

ჩაიხედა ქალმა თონეში და დაინახა ქალის სახე. გაბრაზდა, გაცეცხლდა, ამოაღებინა ნაცარი თონედან და ბანზე მოაპნია. მშვენიერი ალვის ხე ამოვიდა. ნახა კაცმა ეს ხე და საშინლად გაეხარდა; გამოატანინა თავისი ლოგინი და ალვის ხის ქვეშ დაიდგა. ღამე როცა დაეძინებოდა, დახრიდა ალვის ხე ტოტებს და მძინარე კაცს ჩაეკონებოდა. ქალი ბრაზისაგან კვდებოდა.

— ერთხელ მოიავადმყოფა ქალმა თავი და ქმარს უთბრა:

— თუ მაგ ალვის ხეს მოსჭრით, ვარცლს გააკეთებთ და შიგ მბანავებთ, მოვრჩები, თუ არა და მოვკვდებიო.

— ჯანაბას შენი თავი, თუ მოკვდები, მოკვდი და მომასვენეო, — უპასუხა ქმარმა.

ერთხელ კაცი სანადიროდ წავიდა. ქალმა მოიყვანა მუშები, მოაქრევინა ალვის ხე და ვარცლი გააკეთებინა. თითქოს საბანაოდ უნდოდა.

მოვიდა კაცი შინ, ნახა ალვის ხე მოჭრილია, ძალიან ეწყინა, გაჯავრდა, მაგრამ რას იზამდა.

ალვის ხის ერთი ნაფოტი უშვილო ბებრის ბანზე დაეცა. იპოვნა ბებერმა ნაფოტი, აიღო, შეიტანა სახლში და ქოთანს დაათარა. ბებერი რომ სახლიდან გავიდოდა, ნაფოტი ქალად იქცეოდა დაგვიდა, დაასუფთავებდა იქაურობას, დარეცხდა ჯამ-ჭურჭელს, დაალაგებდა, მერე ისევ ნაფოტად იქცეოდა და ქოთანს დაეფარებოდა.

მოვა ბებერი, ხედავს დაგვილ - დაწმენდილ სახლს, დარეცხილ - დასუფთავებულ ჭურჭელს და უკვირს. მიდის მეზობლებში და ხან ვის უხდის მადლობას, ხან ვის, რომ აგრე უვლით ჩემს სახლსაო. ყველა უარს ამბობდა, — შენს სახლში

ფეხი არ შეგვიდგამს, არც დაგვიგვია და არც დაგვისუფ-
თავებიაო. ბოლოს ერთმა მეზობელმა დაარიაგა:

— უდარაჯე, კარებს უკან დაიმა ლე დანახე ვინ არისო.
ბებერი ასეც მოიქცა. დაიმალა კარებს უკან და დაი-
წყო სახლში ცქერა. დანახა — ნათოტი იქცა ქალად, და
დაიწყო სახლის გვა. მიეპარა ბებერი, სწვდა ქალს და და-
იჭირა.

— ვაიმეო! — დაიწვილა ქალმა.

— ნუ გეშინია, შვილო, მე დედა დაშენ შვილი, მე შვი-
ლი არ მყავს და შენ იყავი ჩემი შვილიო, — უთხრა ბე-
ბერმა.

ქალს ძალიან გაეხარდა და ამასიქით ერთად ცხვრობ-
დნენ ტკბილად.

ერთხელ ქალი შეეხვეწა დედას:

— შენი ჭირიმე, ჩემო დედა, აქ რომ გველეშაპი ვაჟია,
ის თავისი ცოლითა და შვილით დავპატიჟოთო.

— დავპატიჟოთ, შვილო, ვინც გინდა და გესიამოვ-
ნებაო, — ნება დართო ბებერმა.

გამართა ქალმა სადილი, დაპატიჟა თავისი ქმარი, შვი-
ლი და და. როცა სუფრას შემოუსხდნენ და სადღეგრძე-
ლოები ჩამოარიგეს, ქალმა აივსო ჭიქა ღვინით, აიღო ხე-
ლში და დაილოცა:

— იცოცხლეთ თქვენ, ჩემო ქმარო, ჩემო შვილო და
ჩემო უფროსო დაო.

გველეშაპმა ვაჟმა იცნო თავისი ნამდვილი ცოლი და
გადაეხვია. ქალმა დაწვრილებით უამბო, თუ როგორ ულა-
ლატა უფროსმა დამ. კაცმა მოლალატე ქალი ცხენის ძუას
მოაბა და დააფლეთინა; წაიყვანა თავისი ნამდვილი ცოლი
და ცხვრობდნენ სიტკბოებით.


ელასა, მელასა,

ჭიქა მეკიდა ყელასა,

მთქმელსა და გამგონებელსა

ძილი გაამოთ ყველასა.

უბცროსი ვაჟი და მკედი



ყო ერთი ხელმწიფე და
ჰყავდა სამი შვილი.

ხელმწიფეს მთაში ბალი
ჰქონდა. ბაღში იდგა ერთი

შესანიშნავი ხე და ოქროს ნაყოფს ისხამდა. ერთი ფრინვე-
ლი შეეჩვია ბაღს, ყოველთვის მიდიოდა და მოჰქონდა ხილი.

ხელმწიფე დიდად წუხდა და უბრძანა თავის შვილებს:

— უდარაჯეთ ამ ხეს და ქურდი დაძიქ-რეთო.

პირველად სადარაჯოდ წავიდა ორი უფროსი შვილი.
მაგრამ ვერ დაიჭირეს ქურდი. მერე წავიდა უმცროსი, ავიდა
ხეზე და დაუწყა ქურდს დარაჯობა. ამ დროს მოტრინდა
ერთი უხარმაზარი ფრინველი, მოგლიჯა ნაყოფი და უნდო-
და წაეღო. ყმაწვილმა ხელი სტაცა და დაიჭირა, მაგრამ ვერ
შეიმაგრა, მხოლოდ ერთი ფრთა მოაგლიჯა. მოუტანა მა-
მას და მოახსენა:

— ჩვენი ქურდი უხარმაზარი ფრინველი ყოფილა, თი-
თონ ვერ შევიმაგრე ფრთა მოვგლიჯე და მოგიტანეო.

ხელმწიფემ მოიხმო თავისი შვილები და უთხრა:

— ჩემი შვილი ის იქნება, ვინც ამ ფრინველს მომ-
გვრისო.

პირველად ორი უფროსი ძმა წავიდა. რადგანაც დრო
ვადავიდა და აღარ დაბრუნდნენ, ადგა და უმცროსი ძმაც წა-
ვიდა. იარა, იარა და მივიდა ერთი ხის ძირას. ხის ქვეშ ერთი

ქვა იღო და ზედ ეწერა: მარჯენივ წახვალ — წყალში ჩაუარ-
დები; მარცხნივ — ცეცხლში ჩაუარდები, შუა გზაზე — მგელი
შეგქამსო: ყმაწვილმა მგლისაკენ წასვლა ირჩია. კარგახანს
იარა და გავიდა ერთ მინდორში. იქ ჩამოხტა ცხენიდან და
დაისვენა.

ამ დროს გამოვარდა მგელი, მივარდა ცხენს და შექამა.
ყმაწვილმა ტირილი დაიწყო.

მგელმა გამოჰკითხა:

— ვინა ხარ, საიდან მოდიხარ და სად მიხვალო?

ყმაწვილმა ყველაფერი უამბო.

მგელმა უთხრა:

— შემაჯექ ზურგზე და მე გიშველიო.

შეაჯდა ზურგზე ყმაწვილი, მგელმა სასახლეში მიიყვანა
და უთხრა:

— აგერ იმ ფრინველის გალია, მიდი ჩუმად, გალიას
ხელი არ ახლო, ფრინველი კი გამოიყვანეო.

ყმაწვილმა არ გაუგონა, გალიას ხელი ახლო; შეიქნა
საშინელი ზარის რეკა. გამოცვივდნენ მოსამსახურენი, დაი-
ჭირეს ყმაწყილი და მიჰვარეს ხელმწიფეს:

ხელმწიფემ ჰკითხა:

— ვინა ხარ, რომ აქ შემოსვლა გაბედე ფრინველის მო-
საპარადაო?

ყმაწვილმა თავისი ამბავი უამბო. ხელმწიფეს უნდოდა.
მოეკლა, მაგრამ ყმაწვილი შეევედრა, და ხელმწიფემ ააა-
ტია, მხოლოდ უბრძანა:

— ერთს მეფეს რომ ოქროსფაფრიანი ცხენი ჰყავს,
წადი და ის მომვარე, თორემ ჩაგიგდებ ხელშიო.

გამოვიდა დაღონებული ყმაწვილი და უამბო თავის
მგელს ეს ამბავი.

— შენ ნუ გეშინია, შემაჯექ და ახლა იქ წაგიყვანო,
უთხრა მგელმა:

შეაჯდა ზურგზე და წავიდა. იარა, იარა და მივიდა იმ
მეფისას.

მგელმა უთხრა:

— აგერ ცხენი, მაგრამ ოქროს უნაგირს ხელს ნუ მოჰკი-
დებ, მხოლოდ ცხენი წამოიყვანეო.

ყმაწვილმა არც აქ დაუჯერა, მოჰკიდა უნაგირს ხელი, საშინელი ზარის რეკა ატყდა. გამოცვივდნენ, დაიქირეს ყმაწვილი და მიუყვანეს მეფეს.

აქაც გაურისხდა მეფე.

— როგორ გაბედე ეგ საქმეო! იმ პირობით მოგიტევებ, თუ წახვალ ერთ სახელმწიფოში, სადაც ერთი მზეთუნახავი ქალი ჰყავთ, და იმ ქალს აქ მომგვრიო.

ეს ამბავიც უამბო თავის მგელს.

მგელმა ზურგზე შეისვა და წაიყვანა. იარა, იარა და მივიდა იმ სასახლეში.

აქ მგელმა უთხრა:

— ახლა კი დამიჯერე რაც გითხრა, თორემ ვეღარას გიშეუელიო. კოლოფი არ აიღო, მხოლოდ ახადე, ქალი ამოიყვანე და წამოიყვანეო.

ყმაწვილი სწორედ ისე მოიქცა და განოიყვანა მზეთუნახავი ქალი.

მაშინ მგელმა უთხრა:

— ამ მზეთუნახავ ქალს ნუ დავკარგავთ, მე გადვიტევი მაგ ქალად და მე მიმიყვანე იმ ხელმწიფესთანაო.

გადაიქცა ქალად მგელი; ყმაწვილმა მიჰგვარა ხელმწიფეს და მიიღო ოქროსფაფრიანი ცხენი.

ყმაწვილი წამოვიდა. მგელიც გამოექცა იმ ხელმწიფეს და დაუბვდა წინ ყმაწვილს.

ახლა ოქროსფაფრიან ცხენად გადიქცა; ყმაწვილმა ცხენის სამაგიეროდ მგელი მიჰგვარა ხელმწიფეს და ფრინველი მიიღო.

მგელი იქიდანაც გამოიქცა და ყმაწვილს უთხრა:

— ახლა სამივე შენია, წადი და წაიყვანე, ნულარაფრისა გეშინიაო.

ყმაწვილმა მადლობა გადაუხადა, გახარებულმა სამივე წაიყვანა და მშვიდობით მივიდა თავის მამასთან.



პრასისა და ნიახუჩის ქაღი



ყო ერთი ხელმწიფე, ჰყავდა ერთი ვაჟიშვილი.

ერთხელ ყმაწვილი თავლაში შევიდა ცხენების

დასათვალიერებლად. ერთი ბებერი ცხენი თავლის კარებში იყო დაბმული. ხელმწიფის შვილი როცა უკან ბრუნდებოდა თავლიდან, ბებერმა ცხენმა კარებში შეაყენა და უთხრა მოიცადეო.

ხელმწიფის შვილი შეკრთა: ცხენი აღამიანივით როგორ ლაპარაკობსო?

ცხენმა უთხრა:

— ნუ გიკვირს, რომ გელაპარაკები; შენი დედ-მამა ცოლის შერთვას არ გოპირებს; სთხოვე მათ ჩემი თავი, შემკაზმე, წაგიყვან და ბედს გაპოვინებ; მხოლოდ არამც და არამც არ გამცე, რომ გულთმისანი და მოლაპარაკე ცხენი ვარ, თორემ იქნება ინანოო.

ყმაწვილი მივიდა მშობლებთან და სთხოვა:

— მინდორ-ველის დათვალიერება მინდა, ნება დამრთეთ, თავლის კარებში რომ ბებერი ცხენია დაბმული, იმით წავიდეო.

მშობლებმა ნება დართეს.

ხელმწიფის შვილმა წაიყვანა ცხენი და წავიდა. ქალაქს რომ გასცდა, ცხენმა უთხრა:

— რაც შეგიძლია, ღონივრად გადამკარ მათრახი და შენ თვალები დახუჭეო.

ყმაწვილმა გადაჰკრა ცხენს მათრახი, დახუჭა თვალები და მსწრაფლ თვალუწვდენელ მინდორზე გაჩნდნენ. მინდორზე ცხრა ადლი თოვლი იდგა; შუა ადგილას ცხრა ადლი თოვლზე ხელსახოცის ოდენაზე ცხრა ადლი ბალახი იყო ამოსული; ბალახზე კიდევ ცხრა ადლი თოვლი იდგა. აფრინდა ცხენი, მივიდა ბალახთან და ყმაწვილს უთხრა:

— რამდენიც შეგიძლია, მოგლიჯე ბალახი, ჩაიდე ჯიბეში და როცა შინ მიხვალ, აჩვენე დედ-მამას; სად ნახე ეგ ბალახი, ან სად მოგლიჯე, არა თქვა, არ გაამხილოო.

ხელმწიფის შვილმა მოგლიჯა ბალახი. ცხენმა ისევ შინ მიიყვანა. ყმაწვილი მივიდა თუ არა შინ, დაიძახა:

— დედავ და მამავ, რა საკვირველება ვნახე, ამა და ამ მინდორზე ცხრა ადლი თოვლი დევს, შუა ალაგას-კი ხელსახოცის ოდენა თოვლზე ცხრა ადლი ბალახი იდგა; ბალახზე კიდევ ცხრა ადლი თოვლი იდგო.

— შენ გაგკვირვებია ეგ ამბავი, თორემ საკვირველი არაფერიო, — მიუგეს მშობლებმა.

— როგორ არ არის საკვირველი თოვლსა და თოვლს შუა ბალახი ხასხასებლეს; აბა მოიტანეთ რაიმე, დააწყუო, გაჩვენოთ ბალახი, თუ თქვენც არ გაგიკვირდეთო, — მიუგო ყმაწვილმა და დააწყუ ბალახი თეფშზე.

ბალახი მზეთუნახავ ქალად იქცა. ყველანი გაკვირდნენ. ქალს ჰკითხეს:

— რა ხარ, საიდან, როგორ გაჩნდიო?

— პრასისა და ნიანურის ქალი ვარო, — მიუგო ქალმა. ქალი მოსამსახურედ დააყენეს, ცალკე ბინა მისცეს. ხელმწიფის შვილი მოწყენილი დადიოდა. ერთხელ დედ-მამამ ჰკითხა:

— მოწყენილი რად დადიხარ, უხალისოდ რადა ხარო?

— ის მზეთუნახავი ქალი მიყვარს, მინდა მასზე გვარი დამწეროთო.

გამოიყვანეს ქალი და ჰკითხეს: რა გვარისა ხარო?

ქალმა მიუგო:

— როგორც წინათ მოგახსენეთ, პრასისა და ნიახურის ქალი გახლავარო.

ხელმწიფემ და მისმა ცოლმა უარი უთხრეს შვილს, ბალახის ქალს ვერ შეგრთავთ ცოლადაო და სხვა ხელმწიფის ქალზე დასწერეს ჯვარი.

ერთი თვის შემდეგ პრასისა და ნიახურის ქალმა სთხოვა ხელმწიფის ცოლს:

— თქვენი რძალი მაწვიეთ ჩემს სახლშიო.

ხელმწიფის რძალი ეწვია პრასისა და ნიახურის ქალს. გამოვიდნენ მინდორში. პრასისა და ნიახურის ქალმა აიშვირა ხელი მალლა, და რაც ქვეყანაზე ფრინველები იყო, სულ იქ მოფრინდნენ. შემდეგ გაქიმა აბრეშუმის შულო და ფირფიტები ფრინველებს მისცა. ფრინველები თან აბრეშუმის ძაფს ახვევდნენ, თან თავიანთ ენაზე გალობდნენ. თუ რომელიმეს დაეწეწებოდა ძაფი, პრასისა და ნიახურის ქალი ოქროს ზოდით ასწორებდა. უამრავი ხალხი მოვიდა ყოველი მხრიდან საყურებლად; ყველას უკვირდა.

ხელმწიფის რძალი მიუბრუნდა დედამთილ-მამამთილს და უთხრა:

— რა გაგკვირვებიათ. უანა მე ვერ გავასწორებ ძაფს ოქროს ზოდითო?

პრასისა და ნიახურის ქალმა გადასცა ხელმწიფის რძალს ოქროს ზოდი. პატარძალმა ჩამოართვა, მაგრამ დაიჭირა. თუ არა ხელში, ვეღარ დაიმაგრა, დაუვარდა, დაეცა მუხლებზე და ორივე მუხლი დაემტვრა. სამი დღის შემდეგ გარდაიცვალა.

ხელმწიფის შვილი ისევ ეხვეწებოდა დედ-მამას:

— პრასისა და ნიახურის ქალზე დამწერეთ ჯვარიო. მშობლებმა ისევ სხვა ხელმწიფის ქალი შერთეს.

ერთი თვის შემდეგ პრასისა და ნიახურის ქალმა ისევ სთხოვა ხელმწიფის ცოლს:

— თუ შეიძლება, თქვენი რძალი მაწვიეთო.

პატარძალი ეწვია პრასისა და ნიახურის ქალს. გავიდნენ

მინდორში. პრასისა და ნიახურის ქალმა აიშვირა ხელი მა-
ღლა — და ორმოცი ირემი მაშინვე იქ გაჩნდა: ქალმა ორმო-
ცივე ირემი თავისი ხელით დაწველა. შედგა დიდი ქვაბით-
რძე ცეცხლზე და ააღულა. წაიძრო ნეკის ბეჭედი, ჩაყო ქვა-
ბში — და რძე განელდა: ჩაჯდა ქვაბში და ბანაობა დაიწყო;
თან ბანაობდა ქალი და თან რძე ღულდა. მნახველები დიდად
გააკვირვა ამ ამბავმა.

ხელმწიფის რძალმა ქმარსა და დედამთილ - მამამთილს-
უთხრა:

— რას გიკვირთ პრასისა და ნიახურის ქალის რძეში
ბანაობა, განა მე ვერ ვიბანავებო?

პრასისა და ნიახურის ქალი ამოვიდა ქვაბიდან. მის მა-
გივრად ხელმწიფის რძალა ჩაჯდა აღულეებულ რძეში და
სულ ჩაიფუფქა.

დამარხეს ისიც.

ხელმწიფის შვილს უნდოდა გამოეცადა პრასისა და
ნიახურის ქალი ვუყვარვარ თუ არაო და დედ-მამას უთხრა:

— თავს მოვიმკვდარუნებ. კუბოთი ეკლესიაში მიმას-
ვენეთ და ვნახოთ რას იზამს პრასისა და ნიახურის ქალიო.

დედ-მამა დაეთანხმა. ერთი კვირის შემდეგ გავრცელ-
და ხმა: ხელმწიფის შვილი მოკვდაო. მიასვენეს ეკლე-
სიაში კუბოთი თუ არა, წიოკობით მივარდა პრასისა და
ნიახურის ქალი და კუბოს დაეკონა. შემდეგ დაიჩოქა კუბოს
წინ, თავი მაღლა აიღო და მუდარით წარმოთქვა:

— მზევ და მთვარევ, თქვენ ხომ ჩემი დედ-მამა ხართ,
გამიცოცხლეთ საყვარელიო.

ხელმწიფის შვილი წამოდგა. მშობლებმა ნება დართეს
მაშინვე დაეწერა ჯვარი მხისა და მთვარის შვილზე.



უმცროსი ძმა



ყო ერთი გლეხიკაცი, ჰყავდა სამი შვილი.

სიკვდილის წინ მამამ შვილებს ანდერძი დაუტოვა

— რაც არ უნდა გაგიჰირდეთ, ქოსა კაცს მოჯამაგირედ არ დაუდგეთო.

კაცი გარდაიცვალა. შვილები იძულებული გახდნენ ქოსა კაცს მოჯამაგირედ დასდგომოდნენ. პირობა დადეს, ვისაც რაიმეზე გული მოუვიდოდა, უნდა მოეკლათ.

პირველ დღეს ქოსამ უფროსი ძმა გაჯზავენა ყანაში სამუშაოდ. წაიყვანა საოები და დილიდან საღამომდის ყანას ხნავდა.

ქოსამ სადილი არ გაუგზავნა. მოშუადა უფროს ძმას და გაბრაზებული დაბრუნდა შინ.

— რა იყო, გული ხომ არ მოკვდება რამეზეო? — შეეკითხა ქოსა.

— გული მომივიდა აბა რა იქნებოდა, მთელი დღე შიმშილით მომკალითო, — მიუგო უფროსმა ძმამ.

ქოსამ შეასრულა პირობა და მოკლა უფროსი ძმა.

მეორე დღეს საშუალო ძმა გაჯზავენეს ყანის სახნავად. არც იმას გაუგზავნეს სადილი. ისიც შეაწუხა შიმშილმა და გაბრაზებული დაბრუნდა შინ.

— რა იყო, რადა ხარ აგრიე, გული ხომ არაფერზე მოგსვლიაო? — შეეკითხა ამასაც ქოსა.

— მთელი დღე შიმშილით მომკალით, გული როგორ არ მომივიდოდაო,— მიუგო საშუალომაც.

მოკლეს ისიც.

მესამე დღეს უმცროს ძმას ცხვრები გაატანეს საბალახოდ. წასვლის წინ ქოსა საუზმეს შეეწყო და უმცროსი ძმა არ მიიწვია. დაამთავრა საუზმე და შეეკითხა:

— ხომ არ გეწყინა, შენი მოწვევა საუზმეზე დამავიწყდაო.

— რა იყო საწყენი, მე არაფერი არ მწყენიაო, — მიუგო უმცროსმა ძმამ.

გარეკა ცხვრები. მინდორში როცა გავიდა, კარგი ცეცხლი დაანთო, შეარჩია ერთი მსუქანი ცხვარი, გაუყარა დანა კისერში, ააგო მწვადი და მადიანად შეექცა. საღამოს გამორეკა ცხვრები და დაბრუნდა შინ.

— გული ხომ არ მოგსვლია, ხელი შეგვეშალა, სადილი ვერ გამოგიგზავნეთო, — უთხრა ქოსამ.

ბიქმა ძიუგო:

— რა იყო გულმოსავალი, მართალია, მომშივდა, მაგრამ ავირჩიე ერთი მსუქანი ცხვარი, გავუყარე დანა კისერში, გავატყავე, ავაგე მწვადი და გადავუძახე მუცელშიო.

ქოსას ეწყინა, მაგრამ არაფერი არ უთხრა.

მეორე დღეს კიდევ გაატანეს ცხვრები საბალახოდ. დაავალეს, ისე გააძღე: ცხვრები რომ შინ წამოსვლა გაუძნელდეთ და სულ ბლავილ-ბლავილით წამოვიდნენო.

სადილი არც ახლა გაუგზავნეს.

ბიქი მთელი დღე წამოწვა ჩრდილში, არც შეუწუხებია თავი ცხვრების გასაძლომად. კიდევ აარჩია ერთი მსუქანი ცხვარი, დაკლა და მიირთვა. შინ დაბრუნებისას აიღო მუგუზალი, დაუარა ცხვრებს და ყველას სათითაოდ ტუჩი დასწვა.

საღამოს მორეკავს ცხვრებს, და ტუჩდამწვარი ცხვრებიც მოდიან ბლავილ-ბლავილით.

ქოსა მიხვდა რაშიაც იყო საქმე და მორთო ყვირილი:

— რა გიქნია ეს, ცხვრები რად მაზარალეო?

— რა იყო, კაცო, გული ხომ არ მოგსვლიაო? — შეეკითხა ბიქი.

— გული მომივიდა, აბა რა იქნებოდა, მაზარალე ამდენი ცხვარიო! — მიუგო ბრაზმორეულმა ქოსამ.

— მეც ეგ მინდოდა, გული ხომ მოგივიდაო, — უთხრა ბიჭმა.

მოკლა ქოსა, გაყიდა ცხვრები და სხვა ქონება და წავიდა ფართლეულის ვაჭრებთან.

— ამხანაგი ხომ არ გინდათ, გამიამხანაგეთო, — უთხრა ბიჭმა.

ვაჭრები დათანხმდნენ იმ პირობით, რომ გული არავის არ მოსვლოდა. ვისაც გული მოუვიდოდა, მოკლავდნენ.

— რა გქვია შენო? — ჰკითხეს ვაჭრებმა.

— არშინი ხიეო, — მიუგო ბიჭმა.

როცა მყიდველი მოვიდოდა, ბიჭი რამდენ არშინს გადაზომავდა, იმდენს გადახევდა და ისე აძლევდა მუშტარს.

— რას შვრებიო? — შეეკითხნენ ვაჭრები.

— რა ვქნა, ჩემი სახელი არშინი ხიეა და მეც ასე უნდა მოვიქცეო.

ვაჭრებმა უთხრეს:

— შენ აქ არ ივარგებო და მექურქლესთან წაიყანვეს.

იქაც ჰკითხეს:

— შენი სახელი რა არისო?

ბიჭმა მიუგო:

— ამტვრიეო.

მყიდველი მოვიდოდა თუ არა, ბიჭი დაამტვრევდა ქურქელს და ისე აძლევდა.

ვაჭრებმა ჰკითხეს:

— გული მოგდის, კაცო, თუ რაზე ამტვრევ ამ ქურქელსო?

— გული რად უნდა მომივიდეს, ჩემი სახელი „ამტვრიეა“ — და მეც ასე ვიქცევიო.


ვაჭრებმა გადაწყვიტეს ბიჭის თავიდან მოშორება. დაამზადეს თავისთვის საგზალი კილობანში. ბიჭი სახლში დაამწყვდიეს და დააპირეს მისი შიგ გამოწვა. ბიჭი გამოძვრა სახლიდან და კილობანში ჩაძვრა. ვაჭრებმა სახლს ცეცხლი წაუკიდეს, წამოიკიდეს კილობანი და გაუღდნენ გზას.

ბიკმა ნელ ნელა მიირთვა საგზალი და სულ შექამა, რაც კიღობანში სანოვაგე იყო.

ვაქრებს მოშვიდათ, დაისვენეს ერთ ალაგას, გახსნეს კიღობანი — და ბიკი გვერდით ამოუდგათ. საგზალიც აღარ არის კიღობანში. დაბრუნდნენ ისევ გაპარტახებულ კარ-მიდამოზე. გადაწყვიტეს ბანაობის დროს მაინც დაეხრათ წყალში ბიკი, მაგრამ ბიკმა ვაქრები დაახრჩო და თითონ იწყო ცხოვრება ბედნიერად.



მეფე და მსახური



ყო და არა იყო რა, იყო ერთი მეფე. მეფეს ძალიან უყვარდა ქეიფი და ღროსტარება. მეფეს ჰყავ-

და ერთი მსახური, რომელიც ჰკიცხავდა მის ასეთ საქციელს და ხშირად უსაყვედურებდა:

— მეფეს მთელი ქვეყანა აბარია, იგი თავისთავის დაკმაყოფილებაზე კი არ უნდა ზრუნავდეს მხოლოდ, არამედ ხალხის ბედზე და ავ-კარგზეო.

მეფე მაინც არ იშლიდა თავისას და ცდილობდა ჰკუის დამრიგებელი მსახური თავიდან მოეშორებია.

ერთხელ მოიხმო მეფემ მსახური თავისთან და უთხრა:

— სამ კითხვას მოგცემ და სამი ღლის ვადას გაძლევი, თუ სამი ღლის განმავლობაში სამივე არ ამიხსენი, თავს მოგჭრიო.

— ბრძანეთო, — მიუგო მსახურმა.

მეფემ დაიწყო:

— დალიე მთელი ზღვა; გაიგე რა მანძილია ცასა და დედამიწას შუა და მითხარი რას ვფიქრობ მეო.

წამოვიდა დაღონებული მსახური. არ იცის რა ქნას, ღღეს თუ ხვალ სიკვდილი მოელის.

გზაზე ბერიკაცი შეხვდა.

— გამარჯობა შენი, რას ჩაფიქრებულხარ აგრე მწარედო? — ჰკითხა ბერიკაცმა.

— ეჰ! როგორ არ ჩავფიქრდე, დღეს თუ ხვალ სიცოცხლეს უნდა გამოვესალმობო, — მიუგო მსახურმა და თანაც ბერიკაცს ყველაფერი უამბო.

— ნუ გეშინია, მაგ გაქირვებისაგან მე გიხსნი. შენ მხოლოდ მეფეს ერთი ტომარა ნართი¹ გამოართვი და სხვა მე ვიცი და ჩემმა გამოცდილებამაო, — უთხრა მოხუცმა.

მსახურს ძალიან გაუხარდა და მეფეს ერთი ტომარა ნართი სთხოვა. მეფემაც მისცა.

მოხუცმა ჩაიცვა მსახურის ტანისამოსი, ნართიანი ტომარა ზურგზე წამოიკიდა და ასე ამგვარად მეფესთან მივიდა.

— რა ჰქენი, ახსენი ჩემი კითხვები? — დაეკითხა მისვლისთანავე მეფე მოხუცს, რომელიც მას მართლა თავისი მსახური ეგონა.

— კი შენი ჰირიმე აუხსენი!

— აბა სთქვი, დალიე ზღვა?

— დავლევ, ბატონო, თუ შეაჩერებ ყველა იმაში შემავალ მდინარეს და შიგ ადარ ჩაუშვებო.

მეფემ დამარცხებულივით თავი დახარა. მაგრამ ისევ ჰკითხა:

— გაიგე, რა მანძილია ცასა და დედამიწას შუა?

— გავიგე, ბატონო, აგერ ზომაც მოგიტანეთ, აი ეს ნართი, თუ არა გჯერათ, თქვენ თითონ გაზომეთ და დარწმუნდებით, რომ მართალს ვამბობო, — მიუგო მოხუცმა.


— კარგი, ვთქვათ ეს ასეა; ახლა მითხარი, მე რასა ვფიქრობო?

— თქვენ, ბატონო, ახლა იმას ფიქრობთ, თითქოს თქვენ წინაშე მსახური იდგეს, მაგრამ მოტყუებული ბრძანდებითო. უკანასკნელ სიტყვებთან ერთად მოხუცმა მსახურის ტანისამოსი გაიხადა.

მეფე მიხვდა, რომ მოტყუვდა, შერცხვა, გაწითლდა და დამარცხებული გაშორდა მოხუცს.

¹ ნართი - ცალწევრად დართული ბამბა.

შრომის შვილი



ყო და არა იყო რა, იყო ერთი ქვრივი დედაკაცი, ჰყავდა ერთი ვაჟიშვილი. დიდი გაჭირვებით ირჩენდა თავს. შემდეგ ბიჭი

დადგა მოჯამაგირედ. მოჯამაგირეობით თავსაც ირჩენდა და დედასაც არჩენდა. შეიძინა ხარი, ურემი, გუთანი, შრომობდა და წლის სარჩოს იწევდა.

ერთხელ ზამთარში სარჩო შემოაკლდათ. დედამ უთხრა შვილს:

— შვილო, ერთი ხარი დავკლათო.

— გაზაფხულზე რით მოუხნათ და რით დავთესოთ ყანებიო? მიუგო ბიჭმა.

— გაზაფხულამდის ბევრი დრო არის, იქამდის ვიშოვით რაიმეს და ხარს ვიყიდითო. თუ ვერაფერი ვიშოვით და ვერ ვიყიდეთ, მე შევებმები. ცალი ხარის მაგივრადო, უთხრა დედამ.

გავიდა ზამთარი. ხარი ვერ შეიძინეს. გუთანში ხარის მაგივრად მართლაც დედა შეება. დაიწყეს მიწის ხვნა.

ამ დროს გამოიარა ხელმწიფემ, დაინახა გუთანში შებმული ქალი და ბიჭს დაუძახა:

— ოას შვრები კაცო, სად გაგონილა გუთანში აღამიანის შებმა და მიწის ხვნაო?!

— ცალი ხარი არა მყავს, მაშ რით მოვხნა მიწაო?—
მიუგო ბიჭმა.

ხელმწიფემ გადაწყვიტა ბიჭი მოეკლა და უთხრა;

— ერთი მოზვერი მყავს ტყეში, მოიყვანე და გყავდესო.

ხელმწიფემ იფიქრა მოზვერი მოკლავს ბიჭსო, მაგრამ ბიჭი მიხვდა რაშიაც იყო საქმე, წაიღო სიმინდი და ძალიან მაგარი თოკი. შევიდა ტყეში. დაინახა მოზვერი. ორ ხეს შუა თოკი გააბა, გაჩერდა და მოზვერს სიმინდი აჩვენა. მოზვერი გამოეჩანა სიმინდისაკენ, შეჭამა და უნდოდა ბიჭს დასჯახებოდა მაგრამ თოკში გაება. მთელი კვირა იყო მოზვერი დაბმული. ბიჭმა არაფერი აქამა, დაასუსტა. შემდეგ წამოიყვანა შინ, შეაბა გუთანში და გახედნა.

ხელმწიფემ როცა გაიგო ბიჭი მოზვერს ცოცხალი გადაურჩა და მოაშინაურა კიდევცო, ძალიან გაუკვირდა და სანახავად წამოვიდა. ნახა მოზვერი შებმული გუთანში ხნავს მიწას.

ხელმწიფემ უთხრა ბიჭს:

— ერთი ზარმაცი ქალიშვილი მყავს და შენ უნდა შეგროთო.

— კარგო, დაეთანხმა ბიჭი, მაგრამ რასაც მე გეტყვი, ქალთან ერთად ისიც უნდა გამატანო.

— აბა სთქვი, რა გინდა, თანახმა ვარო,— მიუგო ხელმწიფემ.

— გამატანე შენი ბრუციანი ცხენი, კოჭლი ძაღლი და ერთი ხანჯალიო, უთხრა ბიჭმა.

ხელმწიფე დაეთანხმა.

ბიჭმა ზარმაცი ქალი შესვა ბრუციან ცხენზე, წამოიყვანა ძაღლი, ხანჯალიც წამოიღო და წამოვიდა.

გზაში ბიჭმა დაუწყო ძაღლს ყვირილი:

— ნუ კოჭლობ, სწორად გაიარე, თორემ ხომ ხედავ ამ ხანჯალს, ზურგზე გადაგისვამო.

ძაღლი მაინც კოჭლობით მიდიოდა. ბიჭმა შემოჰკრა ხანჯალი და მოკლა. განაგრძეს გზა.

ახლა ბრუციან ცხენს აუხირდა ბიჭი:

— სწორად გაიარე, გზას ნუ უხვევ, თორემ რაღაცა დღის ვუქენი ისე გიზამ შენცო!

ცხენი სწორად ვერ მიდიოდა. ბიჭმა შემოჰკრა ხანჯალი, ცხენი დაეარდა და მოკვდა. ზარმაცი ქალი ძირს დაეარდა.

ბიჭმა არ დაუცადა ქალს და განაგრძო გზა.

— დამიცადე, მეც წამოვალო, — დაუძახა ქალმა.

— რა ნელა მოდიხარ ჩქარა იარეო! — დაუყვირა ბიჭმა. შეშინებული ქალი სირბილით აედევნა ბიჭს და მივიდნენ შინ.

მეორე დღეს ბიჭი ყანაში წავიდა სამუშაოდ. დედას დაუბარა:

— თუ არაფერი გააკეთოს ზარმაცმა ქალმა, საქმელი არ აქამოვო.

ქალს მართლა არაფერი გაუკეთებია იმ დღეს და არც არაფერი აქამეს.

დაბრუნდა ბიჭი საღამოთი და ჩაილაპარაკა:

მუშას — საქმელი, არამუშას — აფერიო.

დასხდნენ სავახშმოდ, გაშალეს სუფრა. ბიჭმა ერთი პური შექამა, დედამ — ნახევარი, ქალს კიდევ არაფერი აქამეს.

მეორე დღესაც არაფერი არ გააკეთა ზარმაცმა ქალმა. კიდევ მშიერი დატოვეს.

მესამე დღეს ცოტა დაგავა სახლი, იმ ადგილას, საცა თითონ იჯდა, და ორი ლუკმა აქამეს. მშიერი ქალი ეხვეწებოდა:

— ცოტა კიდევ მაქამეთ, ხვალ უფრო მეტს ვიმუშავებო, მაგრამ ბიჭმა არ გაუგონა.

ამის შემდეგ ქალი დედამთილს არ აცლიდა საქმის კეთებას, ყველაფერს თითონ აკეთებდა და საქმელსაც საკმარისად აძლევდნენ. დაეჩვია ქალი შრომას.

გაიგო ეს ამბავი ხელმწიფემ და წამოვიდა. ნახა მისი ქალი მართლაც შრომობს.

ქალმა უთხრა მამას:

— ცოტა რაიმე შენც გააკეთე, თორემ არაფერს არ ჯაჭმევინო.

მართლაც კარგახანს იყო ხელმწიფე მისი ამალით მშვიერი. ბოლოს გაშალეს სუფრა, მოიტანეს საჭმელი.

ხელმწიფემ უთხრა სიძეს:


— მე დღეს არაფერი გამიკეთებია და საჭმელიც არ შერჯება თურმეო.

— როგორ არა, ბატონო, თქვენ თქვენი ამალით სახლი მომიტკეპნეთ, ეს საქმის გაკეთებაა, მე ამას მთელი კვირა მოვუნდებოდიო,— მიუგო ბიჭმა

ხელმწიფეს მოეწონა სიძის გამჭრიახობა და თავისი ტახტი დაუთმო.



ლარიბი გლეხი და ღვინო



ყო ერთი საწყალი გლეხი-
არათფერი არ გააჩნდა. ერთ-
ხელ ცოლს უთხრა:

— აქ რა უნდა გავაკეთო, წავალ სადმე, იქნებ რაიმე
ვიშოვო.

წაიღო საგზალი და წავიდა. მიაღდა ერთ სახლს. სახ-
ლიდან ბებერმა გამოიხედა. გლეხმა თავშესაფარი სთხოვა:
ბებერმა მიუგო:

— აქ რომ დაგაყენო, ღვეები შეგქამენო.

— ამისთანა სიცოცხლეს სიკვდილი მიჯობსო,— მიუ-
გო გლეხმა და შევიდა სახლში.

ბებერმა გლეხი ქვაბში დამალა.

დაბრუნდა ღვეი, შევიდა სახლში თუ არა, ადამიანის
სუნი იგრძნო.

ბებერმა ჯერ უარი თქვა, არავინ შემოსულაო, მაგრამ
შემდეგ შეეხვეწა:

— ერთი საწყალი კაცი მოვიდა. და არათფერი ჰკა-
დროო.

ღვემა პირობა მისცა ბებერს, არათფერს ვავენებ კაცსაო
და ბებერმა გლეხი ქვაბიდან გამოიყვანა.

ივანშემს და დაიძინეს.

მეორე ღღეს ღვემა ჰკითხა გლეხს:

— რას მთხოვ, რომ გაჩუქო?

— ცოცხლად გაშვებასაო, -- მიუგო გლეხმა.

— თუ შენი შექმა მდოპოდა, წუხელ ვერ შეგქამდიო? მაინც რასა მთხოვო? — უთხრა დევმა.

— ცოცხლად გაშვებასო, — კიდევ უპასუხა გლეხმა.

მაშინ დევმა თითონ თავისი სურვილით აჩუქა ისეთი ძროხა, რომელიც დღეში სამჯერ იწველიდა და თითო კვირაში თითო ხბოს შობდა, ხბოც კვირაში თითოჯერ შობდა.

დევმა გლეხს პირობა დაუდო:

— ერთი წლის შემდეგ გეწვევი, კითხვებს მოგცემ, თუ მიპასუხებ, — ძროხა თავისი ნაძრავლით შენი იყოს; თუ ვერ მიპასუხებ, — ჩემი იყოს ძროხა თავისი ნაძრავლით და მთელი შენი ქონებაო.

— კარგო, — მიუგო გლეხმა და წაიყვანა ძროხა.

ძროხა ისე გამრავლდა, რომ მთელი ჯოგი გახდა. გამდიდრდა ღარიბი გლეხი. იწყო დიდკაცუოდ ცხოვრება. დაიყენა მოსამსახურეები, მაგრამ სულ იმასა ფიქრობდა და დარდობდა, ვინ იცის დევი რა კითხვებს მომცემს, ვაი თუ ვერ ვუპასუხო.

გავიდა ერთი წელი. ვილაცამ გლეხის კარებზე დააკაკუნა. გამოხედა გლეხის ვაჟმა. ორი კაცი ღამის გასათევ თავშესაფარს თხოულობდა. ბიჭმა ძამას მოახსენა ეს ამბავი. გლეხმა ოქვა:

— ხვალ დილით დევი უნდა მოვიდეს, კითხვებს მომცემს, თუ ვერ ვუპასუხებ მე შემეჭამს და მაგათაც ხომ არ შევაქმევ, სჯობს ნუ შემოვიყვანთო.

ცოლმა სთხოვა:

— მაგათთან დევი რა საქმე აქვს, დავაყენოთო. დააყენეს და ვახშამი აქამეს. გლეხი მოწყენილი იჯდა და არაფერს ჭამდა.

მგზავრებმა კითხეს გლეხს მოწყენის მიზეზი. გლეხმა ცაუხსნა.

მგზავრებმა გლეხი ანუგეშეს.

დილით გლეხის კარს მართლაც მოადგა თორმეტი დევი და სამჯერ დაიძახეს:

— ჰო, ჰო, ჰო!

— ჰე, ჰე, ჰე!—გამოსძახეს შიგნიდან მგზავრებმა.

— დილას რომ ბუზი გამოვგზავნეთ, ის სად არისო?

— იკითხეს დევებმა.

— ის აქამდის ზღვაში გავიღოდაო, — უპასუხეს შიგნიდან.

— ის პატარა ზღვა იქნებაო, — დაიძახეს დევებმა.

— პატარა როგორ იქნება, ყორანი შუამდის ვერ მიფრინდაო, იყო პასუხი.

— პატარა ყორანი იქნებოდაო!

— პატარა როგორ იქნებოდა, ექვს სოფელს ფრთებით ფარავდაო!

— ის ექვსი სახლი იქნებოდაო!

— სახლი როგორ იქნებოდა ერთის თავზე ვირმა დაიყვირა და შუამდის ვერ მიაწვდინა ჭმაო.

— ის პატარა ვირი იქნებოდაო.

— პატარა როგორ იქნებოდა, ექვს-ექვსი წისქვილი აქეთ-იქით ეკიდა და მუხლებით კურდღელს იჭერდაო.

— ის კურდღლის ბაქია იქნებოდაო.

— ბაქია როგორ იქნებოდა, დილიდან საღამომდის ცოლმა და ქმარმა ტყავი ვერ გახადესო.

შეშინდნენ დევები და გაიქცნენ. გადარჩა გლეხი განსაცდელს, დარჩა ძროხა თავისი ნამრავლით და მთელი სიმდიდრე და ცხოვრობდა ცოლ-შვილით მშვიდობით.



ყარაბოღლი



ყო ერთი უშვილო ხელმწიფე, შვილს ნატრობდა. ერთხელ სიზმარი ნახა: ამა და ამ წყლის პირას ვაშლის

ხე ღვას; მოსწყვიტე ვაშლი, შექამე და შვილი გაგიჩნდებაო.

წავიდა ხელმწიფე და მიაგნო ვაშლის ხეს; ზედ სამი ვაშლი ება. ავიდა ხეზე და დაკრიფა. ორი წყალში ჩაუვარდა, მესამე შინ წაიღო; გაქრა, ნახევარი თითონ შექამა, ნახევარი ცოლს შეაქამა. ცოლი დაორსულდა. შეეძინათ ვაჟიშვილი, დაარქვეს ყათლანი.

ყათლანი მეტად დაუდევარი ყმაწვილი იყო და სარდაფში ზრდიდნენ, კარში არ გაყავდათ. ვინც თვით იზრდებოდა, ის დღით იზრდებოდა; ვინც წლით იზრდებოდა, ის თვით იზრდებოდა. დავაჟკაცდა თითქმის ასე დამწყვდეული.

ერთხელ სარდაფში საიდგანლაც დღის სინათლემ შეაშუქა. გაუკვირდა ყათლანს:

— გარეთ რა კარგი შუქი ყოფილა, მე-კი სიბნელეში ვარ, დღე და ღამე სანათი მინთიაო.

ჰკრა წიხლი კედელს, გაანგრია, გავიდა გარეთ, მიიხედ-მოიხედა, მივიდა დედ-მამასთან და უსაყვედურა:

— რას მერჩოდით, რად მამწყვდევდით სიბნელეშიო.

დედ-მამამ ოქროს კოჭები მისცა სათამაშოდ იქნებ ამით გაერთოს და დაუდგროძლობით არაფერი გააფუქოსო. ყათლანმა დაიწყო მინდორში კოჭებით თამაში. ამ დროს კოკა შედგმულმა მოხუცმა დედაკაცმა გაიარა. ყათლანმა ესროლა კოჭი; კოჭი მოხვდა კოკას, კოკა გატყდა და წყალი დაიღვარა.

მოიხედა დედაკაცმა, დანახა ყათლანი და უთხრა:

— შეილო, დაგწყევლო — როგორ დაგწყევლო, დედის ერთა ხარ; შენამც ჩაგვარდნია ცხრა ძმა დევის დის სიყვარული; იჯდე — ფიცხლავ დგებოდე; იდგე აღარ — ჯდებოდეო.

ყათლანი 'შინ აღარ შესულა, მაშინვე დაადგა გზას ქლის საპოვნელად. ცოტა იარა თუ ბევრი იარა, მიადგა ერთ წისკვილს. 'შევიდა შიგ და მეწისკვილეს თავშესაფარი სთხოვა-

— ვინ ბრძანდებიო? — ჰკითხა მეწისკვილემ.

— ვაშლის შვილი ვარო, — მიუგო ხელმწიფის შვილმა-მეწისკვილის შვილმა თქვა:

— მეც ვაშლის შვილს მეძახიან, ვაშლით გავჩენილვარო.

მეწისკვილემ უამბო ყათლანს; მე უშვილო ვიყავი, წყალში ვიპოვე ორი ვაშლი, ერთი მე შევეჭამე, მეორე ცოლს შევაჭამე და შვილი შეგვეძინა, რომელსაც ყარაბოლლი დავარქვითო.

ყათლანმაც უამბო თავისი გაჩენის ამბავი, რომ მის მშობლებსაც ის ვაშლის ქამის საშუალებით შეეძინა.

— ჩვენ ძმები ვყოფილვართ, ერთად ვიაროთო, — უთხრა ყარაბოლლიმ.

ყათლანი მოუყვა ყარაბოლლის, — მე ცხრა ძმა დევის დის საძებრად ვარ წამოსულიო.

ყარაბოლლი და ყათლანი წავიდნენ ქალის საძებრად. იარეს, იარეს და როგორც იყო მიაგნეს ცხრა ძმა დევის ცხრასართულიან სახლს. იქვე ძირს რკინის კიბე იდო. ყარაბოლლიმ დაავლო ხელი კიბეს და სახლზე მიაყუდა. ყათ-

ლანი აგზავნა მეცხრე სართულში, სადაც დევების მზეთ-
უნახავი და იყო. ქალს ყათლანი მოეწონა და პირობა მის-
ცა ცოლად გამოეყვებო.

დევებმა გაიგეს დასთან უცხო კაცის მისვლა. მეწის-
ქვილე დევმა წისქვილის სარეკელა წამოიკიდა; მებალე მარ-
გილებით შეიარაღდა; მონადირეებმა თავთავიანთი საო-
მარი იარაღი აისხეს. მოემზადნენ საომრად და სახლში მო-
ცვივდნენ. დაინახეს — რკინის კიბე მიდგმულია სახლზე.
შეჩერდნენ.

უფროსმა ძმამ თქვა:

— დაიცადეთ, ძმებო, ჩვენ ცხრა ძმას გვიქირდა ამ
კიბის მიდგმა სახლზე, ამათ-კი ორს აუწევიათ, ერთბაშად.
არ შეგვიძლია მაგათთან შებრძოლებაო.

დაინახეს ყარაბოღლი და შესძახეს:

— კაცო, კაცო, სამტროდ მოსულხარ თუ სამოყვ-
როდო?

— სამოყვროდ მოვედითო, — მიუგო ყარაბოღლი.

ავიდნენ ყველანი მალლა. დევები სიძეს მიესალმნენ.
ისე უფრთხილდებოდნენ, ცივ ნიავს არ აკარებდნენ.

ყარაბოღლი დევებთან ერთად სანადიროდ დადიოდა-
ყათლანი შინ რჩებოდა, ქალთან. რვა ოთახში სეირნობდა-
მეცხრე ოთახში არ უშვებდნენ. ოთახის გასაღები ქალს
თმებში ჰქონდა შენახული.

ერთხელ, როდესაც ქალს ეძინა, ყათლანმა მოჰპრაგა-
საღები და გააღო მეცხრე ოთახის კარები. ოთახში უზარ-
მაზარი ცხრათავიანი თეთრი დევი ება, რომელსაც ცხრი-
ლის ოდენა თვალები ჰქონდა. იქვე შორიახლო ხმალი
იღო.

ყათლანი შეშინდა.

დევმა უთხრა:

— აი ის ხმალი მომაწოდეთო.

ყათლანი დაწვდა ხმალს, მაგრამ ადგილიდან ვერ დას-
ძრა.

დევმა ქამარი შემოიხსნა, მიაწოდა და უთხრა:

ქამრის ერთი წვერი მოაბი ხმაღს, მეორე კი მომაწოდე და მე თითონ მოვზიდავო.

ყათლანმა მოაბა ქამარი ხმაღს, ქამრის მეორე მხარე დევს მისცა, დევმა გამოსწია ქამარი, მიითრია ხმალი. აილო, გადაქრა ჯაჭვი და აეშვა. დასტაცა ხელი ყათლანს, აისროლა მალლა, მერე ისევ მიაშველა ხელი: არ მოვკლავ სიკეთე მიყოლო, და დაბნედილი ძირს დადო, მძინარე ქალი-კი გაიტაცა და წავიდა.

ყათლანი როცა გონს მოვიდა, მიიხედ-მოიხედა და ქალი ვერ დაინახა. მიხვდა რაშიაც იყო საქმე, შემოიკრა თავში ხელი, მაგრამ რას იხამდა.

სალამოს დევები და ყარაბოღლი დაბრუნდნენ სანადიროდან. გაიგეს ცხრათავიანი დევის მიერ ქალის მოტაცება. შეწუხდნენ დევები; იმის ხელიდან როგორ ვიხსნით დასაო. დევებმა უამბეს ყარაბოღლისა და ყათლანს:

— ეგ დევი დევების ხელმწიფე ყოფილა, ჩვენ მამა-პაპას დაუჭერიათ და დაუბამთ, ჩვენ ვფრთხილობდით, რომ არ გაქცეულიყო.

ყარაბოღლიმ უთხრა დევებს:

— მე წავალ ქალის გამოსახსნელად: ვადად გიდებთ სამ წელიწადს, სამ თვეს, სამ კვირას, სამ დღეს, სამ საათს და სამ წუთს; ამ ვადამდის ჩემ ძმას ხელი არ ახლოთ; თუ დანიშნულ ვადაზე არ მოვედი, მერე რაც გინდათ ის უყავითო.

გამოემშვიდობა ძმას, დევებს და გაუდგა გზას. შეხვდა მღვდელი, რომელსაც ეკლესია ზურგზე ჰქონდა წამოკიდებული; სადაც ამწვანებულ ადგილს ნახავდა, ჩამოიღებდა და შეუდგებოდა წირვა-ლოცვას.

გაკვირდა ყარაბოღლი და დაუძახა:

— მღვდელო, მე საქმელი პურის ტარებაც მეხარება, შენ მაგოდენა ეკლესია როგორ დაგაქვს ზურგითაო?

— ეგ რა საკვირველია, საკვირველი ის არის, ყარაბოღლიმ ცხრა ძმა დევის და რძლად გაიხადაო, — მიუგო მღვდელმა.

- ყარაბოღლი მე ვარო, — უთხრა ყარაბოღლიმ.
- მაშ ან მიყმე, ან მიძმეო, — შეეხვეწა მღვდელი.
- ყმა რად მინდა, ძმა იყავიო, — მიუგო ყარაბოღლიმ.

ლაძმობილდნენ. წავიდნენ. გზაში შეხვდათ გუთნისდედა. რამდენ კვალსაც გადააბრუნებდა, იმდენ ბელტს ყლაპავდა.

გაუკვირდა ყარაბოღლის და დაუძახა:

— კაცო, საგზლად წამოღებული ორიოდე პურივერ შემიკამია, შენ-კი ბელტს ბელტზე როგორ ყლაპავო?

— ეგ რა საკვირველია, საკვირველი ის არის, ყარაბოღლიმ ცხრა ძმა დევის და რძლად გაიხადაო, — მიუგო გუთნისდედამ.

— ყარაბოღლი მე თითონ ვარო, — უთხრა ყარაბოღლიმ.

— მაშ ან მიყმე ან მიძმეო, — შეეხვეწა გუთნისდედა.

— ყმა რად მინდა, ძმა იყავიო, — უპასუხა ყარაბოღლიმ.

ლაძმობილდნენ და წავიდნენ. მავიდნენ ერთ ტრიალ მინდორში. ინადირეს. ირემი მოკლეს და ცეცხლზე შედგეს. გუთნისდედა ცეცხლს მიუყენეს. ყარაბოღლი და მღვდელი სანადიროდ წავიდნენ.

ცეცხლის ახლოს ორმოდან — ცხრათავიანმა თეთრმა დევმა ამოყო თავი და გუთნისდედას დაუძახა:

— ვინა ხარ მანდ, ჩემი შიშით ცაში ფრინველი ვერ ფრინავს, ქვესკნელში ქიანქველა ვერ დადის, შენ-კი ჩემ ბანზე ცეცხლი დაგინთია და ხორცს ხარშავო!

— რა ვქნა, ბატონო, არ ვიცოდი თუ თქვენი იყო ბანი, მოვხარშავ და წავიღებო, — მიუგო შეშინებულმა გუთნისდედამ.

— სად წაიღებ, აიღე ქვაბი, ჩქარა პირში ჩამასხიო!
— დაუყვირა დევმა.

გუთნისდედამ აიღო ქვაბი და ჩაასხა დევს პირში.

ლაბრუნდნენ ძმობილები, მოიკითხეს ხორცი.

გუთნისდელამ უთხრა:

— რომელ ხორცს კითხულობთ, ზოგი ამომვლელს ჟაკამე, ზოგი ჩამომვლელს, ზოგიც მე შეევკამე და მეტი აღარ იყო.

რას იზამდნენ, დარჩნენ მშივრები.

ყარაბოღლიმ კიდევ შედგა ცეცხლზე ირმის ხორცი. ახლა მღვდელი მიუყენა ქვაბს; თითონ ის და გუთნის დე-და წავიდნენ სანადიროდ.

დევმა კიდევ ამოყო ორმოდან თავი და დაიძახა:

— ვინა ხარ მანდ, ჩემი შიშით ცაში ფრინველი ვერ ფრინავს, ქვესკნელში ჭიანჭველა ვერ დადის, შენ-კი ჩემს ბანზე ცეცხლი დაგინთია და ხორცს ხარშავო!

— არ ვიცოდი, თუ თქვენი ბანი იყო, — მიუგო შე-შინებულმა მღვდელმა.

— ჩქარა ასწიე ქვაბი, ჩამოასხი ორმოშიო! — დაიყვი-რა დევმა.

მღვდელმა შიშითა და კანკალით ასწია ქვაბი და ორ-მოში ჩაასხა.

დაბრუნდნენ ძმობილები, ქვაბი ცარიელი დახვდათ.

მღვდელმა თქვა:

— ხორცი ზოგი ამომვლელს მივაწოდე, ზოგი ჩამ-ვლელს, ზოგიც მე შეევკამე და თქვენთვის აღარ დარჩაო. დარჩნენ მშივრები.

ყარაბოღლიმ ისევ შედგა ირემი მოსახარშად და თქვა:

— ახლა მე დავრჩები ქვაბთან, ვნახო, თუ მართლა ამომვლელ-ჩამვლელს აქამეთ და ერთი ნაჭერიც აღარ დავრჩათო.

გუთნისდელა და მღვდელი წავიდნენ სანადიროდ. ყარა-ბოღლი ხორცს ხარშავდა. დევმა ისევ ამოყო თავი. დაინახა ყარაბოღლიმ, შემოკრა ხმალი და ცხრა თავი დააყრევინა.

დაბრუნდნენ ძმობილები, ყარაბოღლიმ უთხრა:

— დაჯექით, პური ვჭამოთ, თქვენ დევს შეუშინები-ხართ და ხორცი იმისათვის გიძლევიათ; განა მეც შემაში-ნებდა დევი, ცხრა თავი წავაგდებინეო.

ჩაიხედეს ორმოში, ისეთი ღრმა იყო, რომ თვალი ვერ ჩაუწვდინეს.

ყარაბოღლიმ თქვა:

— სამში ერთ-ერთი უნდა ჩავიდეთ და ქალი ამოვიყვანოთო.

ჩაგზავნეს მღვდელი, მაგრამ მოყვა ყვირილს:

— დავიწვი, დავიწვი, ამიყვანეთო!

ამოიყვანეს მღვდელი და გუთნისდედა ჩაგზავნეს. იმა-
ნაც ყვირილი მორთო:

— დავიწვი, დავიწვი, მიშველეთ, ჩქარა ამიყვანეთო!
გუთნისდედაც ამოიყვანეს.

ყარაბოღლიმ თქვა:

— მე ჩავალ ორმოში; იცოდეთ, რამდენიც დავიძახო
ვიწვიო, იმდენი უფრო ძირს ჩამიშვითო.

ჩავიდა ყარაბოღლი. ისიც მოყვა ყვირილს დავიწვიო,
მაგრამ ძმობილები მაინც ძირს უშვებდნენ.

ჩავიდა ყარაბოღლი ძირს, ნახა მოტაცებული რძალი
და ახარა:

— დევი მოვკალიო.

რძალმა უთხრა:

— ჩემს გარდა კიდევ არის სამი ქალი მოტაცებუ-
ლიო.

ყარაბოღლიმ სამივე ქალი გაანთავისუფლა და თავ-
თავისი გზით გაისტუმრა. შემდეგ რძალს უთხრა:

— შენ ზევით მოგაქცევ, მე ფეხებზე მოგკიდებ ხელს
და აგვიყვანენო.

ქალი არ ეთანხმებოდა, შენ ზევით იყავ, ფეხებზე მე
მოგკიდებ ხელსო, მაგრამ ყარაბოღლიმ არ ქნა. ქალი ზე-
ძოთ დააყენა, თითონ ფეხებზე მოჰკიდა ხელი და მღვდელ-
სა და გუთნისდედას ზევით აყავდათ. დაინახეს ქალი, მოჰ-
კიდეს ხელი, დასვეს მიწაზე, ყარაბოღლის ჰკრეს და ძირს
ჩააგდეს.

რძალმა ზევიდან ჩასძახა:

— სამი რაში გამოვა: — თეთრი, წითელი და შავი; შავზე არ შეჯდებ — ქვესკნელში ჩაგიყვანს; არც წითელს მიეკარო, თეთრზე შეჯექ, ზევით ამოგისვრისო.

ყარაბოლლი არ შეჯდა არც თეთრზე, არც წითელ-რაშზე, შავ რაშს მოახტა. შავმა რაშმა ქვესკნელში ჩაი-ტაცა. იქ შევიდა ერთ სახლში, სადაც ბებერი დედაკაცი და სამი ქალი იყო.

ყარაბოლლიმ ბებერ დედაკაცს პური სთხოვა.

— რა ვქნა, შვილო, ფქვილი მაქვს, მაგრამ წყალი არა მაქვს, რომ ცომი მოვზილო და პური გამოვაცხო; წყალი გველეშაპს უჭირავს; თითონ ხელმწიფეს დღეში სა-მი თუნგი წყალი ეძლევა და ამის საფასურად გველეშაპი ხელმწიფის ქალებსა ქამსო, — მიუგო დედაკაცმა.

ყარაბოლლიმ ჭურჭელი მოითხოვა წყლის მოსატანად. ბებერი არ აძლევდა, — გველეშაპი შეგქამსო.

ყარაბოლლი არ მოეშვა:

— ჭურჭელი მომეცით. გველეშაპი მე ვერას მიზამსო.

ქალებმა მიუტანეს კოკები. ყარაბოლლიმ კოკა კოკას შემოკრა და დაამტვრია.

— დიდრონი კოკები ან ქვევრები მომეცითო.

ბებერმა აჩვენა მიწაში ჩაფლული ქვევრები. ყარა-ბოლლიმ ამოთხარა სამ-სამკოკიანი ქვევრები, დაიჭირა აქეთ-იქით ხელში და წავიდა წყლის მოსატანად

წყლის პირას ხელმწიფის ქალი იჯდა და ტიროდა. ყარაბოლლი რომ დანახა, მოუბრუნდა და უთხრა:

— ყმაწვილო, თავი რად არ გებრალემა, რომ აქ ნე-ბით მოდიხარ, ხომ შეგქამს გველეშაპიო!

— ნუ გეშინია, მე დაღლილი ვარ, თუ დამეძინოს და გველეშაპის მოსვლა ვერ გავიგო, ერთი წვეთი ცრემლი დაშადინე და გამეღვიძებო, — უთხრა ქალს ყარაბოლლიმ, კალთაში თავი ჩაუდო და დაიძინა.

გავიდა ცოტა ხანი. ელვა-ჰეჭით მოდის გველეშაპი-დაბნელდა არემარე. გრგვინავს მთა და ბარი.

შეშინებულმა ქალმა ტირილი დაიწყო. ყარაბოღლის ლაპა-ღუპით დასდიოდა ცრემლი. გამოეღვიძა ქალს და უთხრა:

— ნუ გეშინიაო.

მოიმარჯვა მშვილდ-ისარი, ესროლა და შუა წყალში ჩააგდო გველეშაპი. წყალი სისხლის ნიაღვარივით მოდიოდა.

ქალმა დაისველა ხელები გველეშაპის სისხლში და ყარაბოღლის ბეჭებზე დაარტყა, თითონ-კი დედ-მამასთან გაიქცა.

მამას ეწყინა, ქალი რომ დაინახა, და უსაყვედურა:

— რად მოხვედი, შვილო, ხომ ყველას ამოგწვეტს გველეშაპი წყურვილითაო.

გახარებული ქალი კი გაიძახოდა:

— მამავ, გველეშაპი მოკლეს, გველეშაპი მოკლესო!

შესამოწმებლად, მართალს ამბობს ქალი თუ არაო, საქონელი გარეკეს წყალზე; მწყურვალე საქონელი დაეწაფა წყალს, ზოგი იქვე დასკდა წყლის სძით, ზოგი გზადაგზა იხოცებოდა, ზოგიც გადარჩა და ბინაზე მოვიდა.

ხელმწიფემ ახლა-კი დაიჯერა. ქალის ნათქვამი. შეყვარა ხალხი, უნდოდა გაეგო, ვინ მოკლა გველეშაპი, ვინ გაანთავისუფლა სახელმწიფო ასეთი უბედურებისაგან.

მკვლელს ვერ პოულობდნენ. ხელმწიფეს მოახსენეს:

— ამა და ამ დედაბერთან ერთი უცხო კაცი არის, იქნებ იმან მოკლა გველეშაპიო.

ყარაბოღლი მოიყვანეს. ხელმწიფის ქალმა დახედა ბეჭებზე, ნახა სისხლიანი ხელების კვალი და გახარებულმა დაიყვირა:

ეს არის გველეშაპის მკვლელიო.

ხელმწიფემ თავისთან მიიხმო ყარაბოღლი და უთხრა:

— შვილო, ჩემი სახელმწიფო შენი დახსნილია, შენ გეკუთვნის და შენთვის დამილოცნიაო.

— არაფერი მინდა. მალლიდან ვარ ჩამოვარდნილი და ამიყვანეთო, — თქვა ყარაბოღლიმ.

ხელმწიფე შეწუხდა, არ იცოდა როგორ უნდა აეყვანათ ყარაბოღლი მათგან. ბოლოს ხელმწიფეს უთხრეს:

— ჩვენ სახელმწიფოში სამი ძმა არის ათას-ათასი წლისა, თუ ეცოდინებათ, იმათ ეცოდინებათ როგორ ავიყვანოთო.

მართლაც მივიდნენ უმცროს ძმასთან. ნახეს — ზის დახვეწილი მოხუცი. დაუწყეს საყვირებით ყვირილი; ყურებთან თოფებს უცლიან; ძლივს ჩააგდეს გულისხმაში.

მოხუცმა თავი გაიქნია:

— რა დაგემართათ, რას თხოულობთ, რა გინდათო?

— მალლიდან კაცი ჩამოვარდა, უნდა ავგზავნოთ, შენ გეცოდინება როგორ ავგზავნოთ და გვასწავლეო, — უთხრეს მოხუცს.

— მე არა ვიცი რა, ჩემ შუათანა ძმასა ჰკითხეთ, იქნებ მან იცოდესო, — მიუგო მოხუცმა.

მოვიდნენ შუათანა ძმასთან. ის უფრო დახვეწილი იყო. ჩასძახიან იმასაც საყვირებით, ჰაი აქეთ, ჰაი იქით, უცლიან ყურებთან თოფებს. როგორც იყო მიახვედრეს მოხუცი, რომ იმასთან იყვნენ მისული.

მოხუცმა წყრომით თავი გაიქნია:

— რა გინდათ ჩემგან, რა საქმე გაგჩენიათო?

— მალლიდან კაცი ჩამოვარდა, აყვანას თხოულობს და იქნებ შენ იცოდე როგორ ავგზავნოთო, — უთხრეს მოხუცს.

— მე არ ვიცი, ჩემს უფროს ძმას ეცოდინებაო, — მიუგო მოხუცმა.

მივიდნენ უფროს ძმასთან, ის უარესად დახვეწილი იყო. დაიღალა ხალხი საყვირების ჩაძახებითა და თოფების სროლით. როგორც იყო გონს მოიყვანეს.

— რა ამბავია რაზე გარჯილხართო? — გაიქნია თავი მოხუცმა.

— ზეციდან კაცი ჩამოვარდნილა, შენ უნდა გვასწავლო როგორ ავგზავნოთო, — უთხრეს მოხუცს.

მოხუცმა დაიწყო:

— ამა და ამ კლდეში ფასკუნჯი¹ ბუდობს; ყოველ
თვეში შვილები უჩნდება, მაგრამ არწივი ჰყავს შეჩენილი
და შვილებს ის უჭამს; ვინც იმ არწივს მოკლავს, ფასკუნჯს
შეუძლია მისი ზევით აყვანა, თორემ სხვა ვერავინ აი-
ყვანსო.

ყარაბოლლი მივიდა იმ კლდესთან, სადაც ფასკუნჯი
ბუდობდა, და ჩაუსაფრდა არწივს. არ გასულა ბევრი დრო,
მოფრინავს არწივი. დაინახეს პატარა ფასკუნჯებმა და ატე-
ხეს ჟივილ-ხივილი. ყარაბოლლიმ მოიმარჯვა მშვილდ-ისა-
რი, ჰკრა არწივს და მოკლა. გადარჩნენ პატარა ფასკუნ-
ჯები.

ყარაბოლლი დაღლილი იყო და იქვე დაიძინა. მივი-
დნენ ფასკუნჯის ბარტყები, ერთი თავთან, მეორე შუაზე
და მესამე ბოლოს ფეხებთან, გაშალეს ფრთები და ყარა-
ბოლლი მზისაგან დაფარეს.

მოფრინდა დედა ფასკუნჯი, დაინახა მძინარე კაცი,
მტერი ეგონა და უნდოდა მოეკლა, მაგრამ შვილები შე-
მოეხვივნენ:

— არ მოკლა, ჩვენი მხსნელია, ჩვენი მტერი არწივი
ამან მოკლაო.

დედა ფასკუნჯიც მივიდა ყარაბოლლისთან, ფრთები
გაშალა და მძინარეს მზე დაუჩრდილა.

როცა გამოეღვიძა ყარაბოლლის, ფასკუნჯმა უთხრა:

— მტერი მეგონე, კინალამ მოგკალი; რადგან ასეთი
სიკეთე მიყავი, ხომ არა გიჭირს, რომ მეც გცე პატივიო.

ყარაბოლლიმ სთხოვა:

— მალლა ამიყვანეო.

— ოჰ, ნეტა ევ არ შემოგეკვეთა, ძნელია; რამდენ ფრთას
მოუუსვამ, იმდენი კოკა ღვინო, კოდი ნამცხვარი და თი-
თო ცხვარი მომინდება. თუ იშოვნის რამდენიც მომინდება,
აგიყვანო, — უთხრა ფასკუნჯმა.

ყარაბოლლი მოვიდა ხელმწიფესთან და ფასკუნჯის
ნათქვამი გადასცა. ხელმწიფემ მრავალი საგზალი მოამზა-

¹ ფასკუნჯი—ზღაპრული ფრინველი.

დებიან მისთვის. ფასკუნჯმა გაშალა ფრთები, ყარაბოლლიმ დააწყო ზედ საზრდო და თითონ ფასკუნჯს კისერზე მოექცა. რამდენ ფრთასაც მოიქნევდა ფასკუნჯი, იმდენ კოდნამცხვარს და თითო ცხვარს ჩაუდებდა პირში ყარაბოლლი და ერთ კოკა ღვინოსაც ჩაასხამდა. უკანასკნელი ფრთის მოქნევაზე ყარაბოლლის საზრდო შემოაკლდა, საჩქაროდ გამოიჭრა კუნთი და ფასკუნჯს პირში ჩაუდო.

— ო, ეს რა გემრიელი ლუკმა იყო! — დაიძახა ფასკუნჯმა და ყარაბოლლი მალლა აიყვანა.

ყარაბოლლი კოკლობდა. ფასკუნჯმა ჰკითხა:

— რად კოკლობო?

— საზრდო შემომაკლდა, კუნთი გამოვიჭერ და მოგეციო, — უპასუხა ყარაბოლლიმ.

— რომ მცოდნოდა ასეთი გემრიელი ხორცი გაქვს, შეგქამდიო, — უთხრა ფასკუნჯმა.

წასვლის წინ ფასკუნჯმა დაარიგა ყარაბოლლი:

— ქამრით ხეს მიეკარ, თორემ ჩემი ფრთების მოქნევით ამოვარდნილი ქარი ისევ ჭვესკნელში ჩაგადგებსო.

ყარაბოლლი მაგრად მიეკრა ხეს. სამი დღე და ღამე ქარი ქროდა. როცა ქარი ჩადგა, ყარაბოლლი მოეხსნა ხეს და წავიდა, ერთ ალაგას ნახა — მისი ძმობილი მღვდელი და გუთნისდგდა ცილაობენ მოტაცებულ ქალზე, ყარაბოლლის რძალზე: არა მე უნდა შევირთო, არა მეო. ყარაბოლლიმ ორივე მოკლა და რძალი წაიყვანა.

შესრულდა სამი წელიწადი, სამი თვე, სამი კვირა, სამი დღე და სამი საათი, რაც ყარაბოლლიმ დევებს ვადა დაუდო; სამი წუთი აკლდა ვადას. დევებმა დააწვინეს ყათლანი, ჯერ ოდნავ გაუსვეს დანა ყელში, მეორედ მაგრად უნდა გაესვათ, ყელი უნდა გამოექრათ, რომ ბანზე ყარაბოლლის მშვილდ-ისარი დაერქო. მაშინვე დაანებეს ყათლანს თავი და ქრილობა ხელსახოცით შეუხვიეს.

მოვიდა ყარაბოლლი რძლით. ნახა ძმას ყელზე ქრილობა აქვს და დევებს უსაყვედურა:


— რატომ სამი წუთიც არ მოიცადეთო?

ყარაბოღლიმ უამბო დევებს, რაც გადახდათ რძალ-
მაზლს.

დასწერეს ყათლანს ჯვარი და ქალი წაიყვანეს. ხელმ-
წიფე დაბერებულიყო შვილის დარდით. ძალიან გაეხარ-
და შვილის მშვიდობიანად დაბრუნება.



ღედინაცვალი და გეგი



ყო და არა იყო რა, იყო:
ერთი ქალი.

მომაკვდავმა დედამ ერთი ფინია და ერთი ძროხა

დაუტოვა. თანვე ანდერძად დაუბარა:

— ვინიცობაა, 'მვილო, მაშაშენმა მეორე ცოლი შე-
ერთოს და ძროხა დაკლას, შენ ეგ ძროხის ხორცი არ ჭა-
მო და ძვლებს კი თავი მოუყარე და ორმოში ჩაყარეო...

მამამისმა მართლა მეორე ცოლი შეერთო.

ღედინაცვალი გერს გადაეკიდა, სულ იმის ფიქრში
იყო, რა ხერხი ეხმარა, რომ დაეჩაგრა.

ადგა და ავადმყოფობა მოიგონა, ლავაშები დააცხო-
ბინა, ზედ ლოგინი გაიშალა და დაწვა. გადაბრუნდებოდა,
ლავაშებს მტვრევა გაჰქონდა, გადმობრუნდებოდა და
აგრეთვე ამტვრევდა.

ქმარმა რომ ნახა, ჰკითხა:

— ქალო, ავად რითი ხარო?

— გვერდები მტკივა და მემტვრევაო, — მიუგო ცოლმა.

— მერე რით უნდა იწამლოო? — ჰკითხა ქმარმა.

— ასე მითხრეს, სანამ თქვენი ძროხის ნაღველას არ
დალევ, არა გეშველება რაო, — უთხრა ცოლმა.

კაცმა იტირა: დედამ ერთი ძროხა დაუტოვა ფავის
ქალს და როგორ დაუყლაო.

ოადგან აღარაფერი გაეწყობოდა, ძროხა დაკლეს.

მაშინ ადგა გერი, ერთ დედაბერთან წავიდა და შესჩივლა:

— დედაჩემის დატოვებული ძროხა დამიკლესო.

— დედაშენმა რა გითხრაო ჰკითხა დედაბერმა.

ქალმა უთხრა:

— ასე მითხრა, ძროხის ხორცს ნუ სჭამ და ძვალს კი თავი მოუყარეო.

დედაბერმა დაარიგა:

-- წადი, შვილო, ბაგის ქვეშ ორმო გათხარე და ის ძვლები შიგ ჩაყარეო.

გერი დაბრუნდა, ბაგის ქვეშ ორმო გათხარა, ძროხის ძვლები, ტყავი და თავ-ფეხი შიგ ჩაყარა და ზედ ფიცრები დაასურა.

დედინაცვალმა ნაღველა დალია და მორჩა. ადგა და გერი სამწყემსურში გაგზავნა. ერთი პური გაატანა და უთხრა:

-- ეს პური გაშვლელსაც აჭამე, გამომვლელსაც, შენცა სჭამე და შინაც ბევრი მოიტანეო.

გერი წავიდა. ტყეში რომ შევიდა, მალლობზე შედგა, ტირილი დაიწყო და აბრეშუმის ოთვას მოჰყვა. მალლიდან გადმოიხედა და ერთი სახლკარი დაინახა, შიგ დედაბერი იყო. გერს კვირისტავი ჩაუვარდა და ჩასძახა:

— დედაშვილობას, ეგ კვირისტავი მომეწოდეო.

დედაბერმა ასძახა:

— აჰა, შვილო, კვირისტავიო; მეჩე უთხრა: ჩამოდი ძირს, ერთი სახლი დამიგავეო.

გერი ჩავიდა, სახლი დაუგავა, დაუწმინდა.

— ერთი ქურქელი დამირეცხეო, — უთხრა დედაბერმა. დაურეცხა, დაუსუფთავა და დაულავა.

— ერთი ქვევრებსაც დამიხედეო.

წავიდა, დახედა და მოახსენა:

— უჰ, რა კარგი და სუფთა ქვევრები გქონიაო. ბოლოს უთხრა:

— შვილო, რათა ტიროდიო?

— დედინაცვალმა ეს აბრეშუმის და ეს პური გამომატანა. პური გამვლელსაც აქამე, გამომვლელსაც, შენცა სქამე და შინაც ბევრი მოიტანეო; აბრეშუმისც დამირთეო.

დედაბერმა თავისი პური აჭამა, მისი კი უკანვე მისცა, აბრეშუმის დართვაშიაც მოეხმარა.

დაღამებისას გერი შინ დაბრუნდა.

გერი დედაბერს მიეჩვია და ყოველთვის, როცა სამწყემსურში წავიღოდა, იმას ესტუმრებოდა.

ერთხელ, გერი რომ მორჩა სახლკარის დავა-დალაგებას, დედაბერმა, თითქო მადლის გადასახდელადო უთხრა:

— წადი, შვილო, აგერ მდინარე წყალი მოდის, ნაპირას დაჯექ, თეთრმა წყალმა რომ ჩამოიაროს, არ იბანო, არც შავში, არც ვირის ფერში; ოქროსფერმა რომ ჩამოიაროს, იმაში კი თავი დაისველე და ჩემთან მოდიო.

გერმა ოქროსფერ მდინარეში თავი დაისველა და დედაბერთან მოვიდა:

ოქროს თმა გამოსვლოდა.

თავი მაგრა შეუხვია და საღამოს შინ გაისტუმრა.

გერი დედინაცვალს ემაღებოდა, ვაითუ თმა დამინახოს და მომკლასო.

მაგრამ მის თმის ბრწყინვას დედინაცვალმა თვალი მოჰკრა, მივარდა, თავს გადახადა, დახედა, გაოცდა და შურით გლეჯა დაუწყო.

მერე დაწვრილებით გამოჰკითხა და როცა გერის თავგადასავალი შეიტყო, იმის მაგივრად ახლა თავისი საკუთარი ქალი გაგზავნა სამწყემსურში, თანაც დაარიგა, როგორც უნდა მოქცეულიყო. პური და აბრეშუმ-თითისტარი გაატანა და რაც თავის გერს, ისევე იმას დააბარა:

წავიდა ქალი, ტყეში შევიდა, შედგა დედაბრის სახლის ბანზე და ხელი მიჰყო აბრეშუმის რთვას, კვირისტავი ჩაუვარდა და გადასძახა:

— შე ქოფაკო დედაბერო, ევ. კვირისტავი მომაწოდეო.

— ჩამოდი და აიღეო, — უთხრა დედაბერმა.

ქალი ჩავიდა.

— აბა ერთი სახლი დამიგავეო, — უთხრა დედაბერმა.

შვიდა სახლში და ყველაფერი მიუმტკვრ-მოუმტკვრია.

— ერთი ქურქელი დამირეცხეო.

ქურქელიც სულ დაუმტვრია.

— ერთი ქვევრებს დამიხედეო.

— ფუჰ! ფუჰ! რა მყრალი ქვევრები გქონია, უწმინდურობით არის სავსეო.

— აბა, შვილო, წადი, — უთხრა დედაბერმა, — და ამა და ამ ადგილას დაჯექი; რამდენიმე წყალი ჩამოივლის, მაგრამ თავი არ დაისველო, სანამ ვირის ფერმა წყალმა არ ჩამოიაროსო.

ქალი წავიდა, ვირის ფერ წყალში დაისველა თავი და ვირის ყურები გამოება.

ადგა და დედასთან გაეშურა ტირილით და თავისი ამბავი შესჩივლა.

დედამ რომ ნახა, თავში ხელი იცა და ბეგრი იღარდა. მაგრამ რაღას გააწყობდა.

ხანი გავიდა. დღესასწაულმა მოატანა. დედინაცვალი თავისი ქალით თემობაზე წავიდა და გერი კი შინ დასტოვა, ერთი კოდი ფეტვი დაუყარა და საცეხველი დაუდგა: ცრემლით ააგროვე ფეტვი, ისე აკრიფე, ერთი მარცვალიც არ დარჩესო.

გერმა ტირილი მორთო, წავიდა და დედაბერს შესჩივლა — ასეა ჩემი საქმე და რა ვქნაო?

— ნუ გეშინია, შვილო, მე წამოვალ და საქმეს გამოვაკეთებო.

წამოჰყვა, დაუძახა რაც ქვეყანაზე ფრინველი იყო და უთხრა:

— ეს მარცვლები აკრიფეთო.

ფრინველებმა აპკრიფეს და საბათმანოში ჩაჰყარეს; გაივსო. მერე საცეხველში წყალი ჩაასხა, მარილი ჩაყარა და უთხრა გერს:

— ადგი, შვილო, ხელ-პირი დაიბანე, წადი და საცაძროხის ძელები ჩაპყარე, იმ ორმოს ახადე და ასე სთქვი— რაშო, ყველაფრით განწყობილო, ამოდი და ჩემი ტანისამოსიც ამოინიტანეთქო.

გერი წავიდა, ორმოს თავს დადგა, ყველაფერი უთხრა, როგორც დედაბერმა დაარია.

რაში შეკაშმული ამოვიდა და გერის ტანისამოსიც ამოიტანა. ჩაიცვა გერმა და რაშზე შეჯდა, დედაბერმა უთხრა:

— წადი ახლა დღეობაში, ცალ ხელში თვალ-მარგალიტი დაიჭირე, ცალ ხელში ნაცარიო.

გერი წავიდა.

რაშიანი ქალი რომ ნახეს, გაუკვირდათ. მაშინვე თვალ-მარგალიტი მამისკენ გადაყარა, ნაცარი დედინაცვალისკენ და საჩქაროდ გამობრუნდა, რომ შინაუოებისათვის შინ მიესწრო, მაგრამ მდინარე წყალში გასვლის დროს ცალი ქოში ჩაუვარდა. შინ რომ მივიდა, ტანთ გაიხადა, ტანისამოსი შეახვია და რაშს დააკრა, ბაგაზე შეიყვანა და უთხრა:

— რაშო, ჩაბრძანდი შენი განწყობილობითაო.

რაში ჩავიდა, გერმა ორმოს თავი დახურა, შემობრუნდა შინ, ძველებურადვე მობუდნული დაჯდა კერასთან და დაიწყო ტირილი.

დედინაცვალი რომ დაბრუნდა, გერს თავში ჩაპყრა და უთხრა:

— შენმა სიცოცხლემ, სწორედ შენ გგავდა, დღეობაში რომ ქალი ვნახეო! იმ მდინარე წყალზე, სადაც გერს ქოში ჩაუვარდა, ხელმწიფის მეკინიბეებმა ცხენები ჩაიყვანეს წყლის დასალევინებლად, ცხენები დაფრთხნენ და წყალი აღარ დალიეს, რაკი შიგ ოქროს ქოში ბრწყინავდა.

ხელმწიფეს ამბავი მიუვიდა, მდინარეში რალაცა გლია, ცხენები დაფრთხნენ და წყალი არ დალიესო.

ხელმწიფემ მაშინვე მცურავები გაგზავნა. მცურავებმა ქოში ამოიღეს და ხელმწიფეს მიართვეს.

ხელმწიფემ ქოში იასაულეძს მისცა და უბრძანა:

— რკინის ქალამნები ჩაიცვით, რკინის ჯოხები დაიჭირეთ, წადით, ცისქვეშეთი დაიარეთ, სადაც ქალამანი გაგიცვლეთ და ჯოხი გაგიტყდეთ, იქ იქნება ამის ჩამცემელი ქალი და ის ქალი წამოიყვანეთო.

ქვეყანა მოვლეს, მივიღნენ იმ გლეხისას, სადაც ის ქალი იყო. ჯოხიც იქ გატყდა და ქალამნებიც იქ გაცვდა. სახლში შევევიწვიეთ უნდა დავიაროთო, — უთხრეს იასაულეებმა.

დედინაცვალმა არ შეუშვა, ხელი ჰკრეს, შეცვივდნენ და ძებნა დაუწყეს. დედინაცვალმა გერი სანქაროდ თონეში ჩააგდო, ქოლობი გადააფარა, ზედ სიმინდი დაყარა და კრუხ-წიწილს დაუძახა. მივარდა თავის ქალს, ქოშის ცემა დაუწყო, მაგრამ არ არგო. იასაულეები გავიდნენ ეზოში, ნახეს, ფინია თონეს გარშემო უბრუნდა და იძახდა:

— თეთრა ქალია თონეში, თეთრი ქალია თონეშიო!

მივიდნენ, თონეს ახადეს და მსუენიერი ქალი კი ამოიყვანეს. ქოში, რომ ნახა, თქვა ჩემიაო, ჩაიცვა და არგო. წაყვანა დააპირეს, მაგრამ გერმა მოახსენა:

— აქ მომიცადეთ და აილაგ გიხილებითო.

წავიდა, ორმოს თავს დადვა, ახადა და უთარა:

— რაშო, ყველაფრით გაწყობილი ამოდნი და ჩემი ტანისამოსიც ამომიტანეო. რაში ნაშინვე ამოვიდა. ქალმა ტანთ ჩაიცვა, მზეს დაემსგავსა, შეჯდა რაშხე და იასაულეებს წაჰყვა.

დედინაცვალის მოახლედ წაიყვანეს და მასთან მისი ქალიც.

გზაში მდინარე წყალი დახვდათ გასაფლელი.

დედინაცვალს თურმე კალათაში კატა გაეხვია. წყალს რომ მიუახლოვდნენ, კატა გაუშვა და დაიყვირა:

— არ იქა, კურდღელი კურდღელიო!

იასაულეები გამოუდგნენ. დედინაცვალი მაშინვე გერსა სწვდა, ტანთსაცმელი წაჰგლიჯა, თავის ქალს ჩააცვა და რაშხე შესვა, გერს კი ხელი ჰკრა და წყალში ჩააგდო.

გერი თევზმა ჩაყლაპა. ქალი ხელმწიფეს მიჰგვარეს. იქორწილა. ვირის ყურები რომ უხახა ქალს, არ იაძა, მაგრამ რას იზამდა.

ერთი მებადური თურმე იმ მდინარეზე თევზაობდა; ბადე ისროლა, ნახა, რომ დიდი თევზი მოედო, გამოიტანა, თევზი გამოფატრა და ცოცხალი ქალი გამოიყვანა.

მებადური თვითონ უშვილო იყო და თქვა:

— ღმერთმა შვილი მომცაო.

ქალმა უთხრა:

— რადგან წყლიდან გამოიყვანე და ქვეყნიერება დამანახვე, წამიყვანე და ბედსა გწევო.

მებადურმა ცოლს მიჰგვარა და უთხრა:

— მაინც შვილი არ გვყავდა და ახლა ღმერთმა ეს ქალი მოგვცა შვილადო.

კარგად მოუარეს, ჩააცვეს და დაახურეს. გერი თუ უწინ კარგი იყო, ეხლა ერთი-ორად უკეთესი გახდა. კარგახანს დაჰყო მებადურთან და ერთხელ უთხრა:

— მამავ! ესა და ეს ხელმწიფე დამიპატიჟეო.

— შვილო, ჩვენ რა გვაქვს მისი საკადრისი, ან რა ღირსი ვართ ხელმწიფე დავპატიჟოთო.

შვილობილმა უთხრა:

— შენ ნუ გენაღვლება, მე მხალს გავაკეთებ და იმაზე მოვიწვევო.

ხელმწიფე სანადიროდ დადიოდა. მებადური შემოეყარა და მოახსენა:

ხელმწიფევ, გთხოვ ღარიბის ოჯახში მობრძანდეო.

ხელმწიფემ თქვა: რა საქმე უნდა ჰქონდეს ჩემთან, რომ მპატიჟებსო, და ეწვია. სახლში რომ შევიდა, სკამი მიართვეს. ხელმწიფე დაბრძანდა. ქალმა მხალი, პური და ღვინო მიართვა. ქალს პირბადე ჰქონდა ჩამოფარებული.

— ჩემო ხელმწიფევ, მე ამის მეტი შეძლება არა მქონდა, რომ გაგმასპინძლებოდიო.

ხელმწიფე გაკვირდა და თქვა:

— პირახვეული რად არისო?

— სიტყვა მაქვს მოსახსენებელი, იმიტომ გავბედე და გავკადნიერდი, შენ დაპატიუებას მამაჩემი ვერ ბედავდა, მაგრამ ძალა დავატანეო.

— აბა პირს აიხადე და მითხარი, რა გაქვს სათქმელიო. ქალმა პირბადე აიხადა. ხელმწიფემ რომ შეხედა, მისი მშვენიერებით გაოცდა და ოქროს თმამ გააკვირვა.

ქალმა უამბო თავისი თავგადასავალი ყოველივე, თუ როგორ იტანჯებოდა დედინაცვლისა და მისი ქალის ხელში.

ხელმწიფემ მაშინ იასაუღლები გაგზავნა, ორივე დედაშვილი მოაყვანიდა, ცხენის კუდებს გამოაბმევინა, ორივე აათრევინა.

ქალი წაიყვანა, მეთევზე და მისი ცოლი თან გაიყოლა.

შინ რომ მივიდა, იქოოწილა და იწყეს ბედნიერი ცხოვრება: მათი ნახვა მტერსაც კი უხაროდა.

ელასა, მელასა,

ძილი გაამოთ ყველასა.

სამი ძმა



ყო ერთი ხელმწიფე, ჰყავდა სამი ვაჟი. ხელმწიფე ავად გახდა, მოიხმრა შვილები და უთხრა: შვილებო, მე

როგორც ვატყობ, ველარ მოვრჩები; აი, ეს სამი ძვირფასი თვალი შეინახეთ; მე მრავალი მტერი მყავს, — რაკი შეიტყობენ ჩემს სიკვდილს, ვიცი, საომრად მოვლენ; მაგრამ თქვენ ნუ შეშინდებით. მე ერთი მაგარი ციხე მაქვს, ანდამატის ციხეს ვეძახით; იმ ციხეში შეიხიზნებით და რაც უნდა ჯარი მოგადგეთ, ვერ შემოგივათ. თუ, ვინიცობაა, შეშინდეთ, ერთი მეგობარი ხელმწიფე მყავს, იმასთან წადით, ეს სამი თვალი მიართვით და ის დაგიფარავთო.

გარდაიცვალა ხელმწიფე და როგორც ეკადრებოდა, ისე დაასაფლავეს.

გავარდა თუ არა ხმა ხელმწიფე მოკვდაო, მაშინვე მტრები ყოველ კუთხიდან მოადგნენ იმ ქვეყანას და შვილებს შემოუთვალეს: მამათქვენი აღარ არის და ჯავრს ახლა თქვენზე ამოვიყრითო. ყმაწვილებს შიშით გული გაუსკდათ, მსწრაფლ გაიქცნენ და მივირდნენ თავიანთი მამის მეგობარ ხელმწიფესთან.

ერთს დღეს სამმა ძმამ თქვა: მამაჩვენმა რომ სამი თვალი მოგვცა, რატომ ხელმწიფეს არ მივართვითო? მაგრამ დახე უბედურებას, თვლები დაჰკარგოდათ, და სამ ძმაში რომელსა ჰქონდა, არავინ იცოდა. ერთი ამბობდა მე

არა მაქვსო, მეორე ამბობდა მე არ მინახავსო. რომ აღარ იქნა და არავინ გამოაჩინა, მოახსენეს ხელმწიფეს: ესაა ჩვენი დარდიო არ ვიცით ჩვენში რომელს აქვს ის ძვირფასი თვლები, რომელიც მამაჩვენმა თქვენთვის მოსართმევად დაგვიტოვაო.

ხელმწიფემ ბრძანა იგავი: „ერთს ხელმწიფეს ჰყავდა ქალი. გაათხოვა და მეორე ხელმწიფის შვილს მისცა, თუმცა კი ქალს ერთის ვაჭრის ვაჟი უყვარდა. ქმარმა მიიყვანა ცოლი შინა, მაგრამ მალე შეიტყო, რომ ცოლს არ უყვარდა. ჩააცვა თავის ცოლს ძალიან მდიდრულად, ბევრი ძვირფასი ნივთი აჩუქა და გაისტუმრა სამშობლოში თავის სახლიდან.

გზაზე ამ ქალს ავაზაკები დახვდნენ.

ერთმა თქვა:

— მოდი მოეკლათო;

მეორემ:

— რადაო? ერთი სუსტი არსებაა, დეე წავიდეს თავის გზასაო.

მესამემ:

— გაუძარცოთ და ისე გაუშვათო. აბა ახლა მე თქვენ გკითხავთ, რომელს უფრო კარგი უთქვამს?

უფროსმა თქვა: პირველსაო;

შუათანამ: მეორესაო.

უმცროსმა: ნივთები რო წაერთმიათ, უფრო კარგს იქმოდნენო.

— მაშ შენ გექნება დამალული თვლებიო, — უთხრა ხელმწიფემ და კიდევ გამოაჩინინა.

ორი უფროსი ძმა ხელმწიფემ სკოლაში მისცა სწავლაზე და უმცროსი კი, რადგან ძალიან პატარა იყო, შინა ჰყავდა. ერთხელ დღისით დედოფალს ეძინა. ქერიდან ჩამოვიდა გველი, მიცურდა დედოფალთან და უნდა ეკბინა. ამ დროს უმცროსმა ძმამ გველს თვალი შეასწრო, მიჰვარდა. მოკლა. გაიტანა და ხაროში ჩააგდო. შემობრუნდა, დახედა მძინარე დედოფალს და შენიშნა, რომ ერთი წვე-

თი სისხლი ზედ ჯიბის პირთან კაბაზე დასცემოდა. მივიდა და დაუწყაო წმენდა.

ამ დროს გამოელვოდა დედოფალსა, განრისხდა, ხელმწიფეს მოახსენა:

— აი ეს შენი შვილადაყვანილი რა ცუდი ყოფილა: რო მეძინა, ჯიბეში ხელს მიყოფდა და ფულსა მპარავდაო.

ხელმწიფემ უბრძანა მსახურებს ყმაწვილი წაეყვანათ და ხაროში ჩაეგდოთ.

როდესაც უფროსი ძმები სკოლიდან დაბრუნდნენ, უმცროსი ძმა მოიკითხეს. ხელმწიფემ ყველაფერი უაბო. ძმები ძალიან დაღონდნენ; მაგრამ რას იზამდნენ.

ბოლოს მოახსენეს: რატომ არა ჰკითხეთ, იქნება რა მიზეზი იყოვო?

უფროსმა ძმამ თქვა იგავი:

„იყო ერთი თავადიშვილი და ჰყავდა ერთი ქორი, რომელიც გაგიჟებით უყვარდა. ერთხელ სანადიროდ გავიდა. ბევრი იარა, მოსწყურდა და წყლის საძებნელად წავიდა. ნახა, ერთს ალაგას ცოტათი ჩამოსწვეთდა. შედგა ჭურჭელი... მინამ აივსებოდა, მოფრინდა იმისი ქორი, შემოჰკრა ფრთა და წყალი დაუღვარა. რასაკვირველია, თავადიშვილს ძალიან ეწყინა, კიდევ შეუღდა ჭურჭელი; ქორმა კიდევ დაუღვარა. თავადიშვილი ძალიან ბრაზზე მოვიდა: როგორ მწყურია წყალი და დახე, ეს ჩემი საყვარელი ქორი რა მტრობას მიმვრებაო! ადგა და ქორი მოკლა. შემდეგ შეჯდა ცხენზე და თქვა: მოდი წავალ, სათავეს ვიპოვნე, იქ უთუოდ დიდი წყალი იქნება და დავღვევო. მივიდა, ნახა, რომ სათავეში ერთი გველეშაპი გდია და ის წყალი იმის ლეშს გასდის. ბევრი იცა თავში თავადიშვილმა: ვაი, შენ ჩემო ქორო! შენ ჩემთვის სიკეთეგდომებია და მე კი რა განუკითხავად მოგკალიო! მაგრამ რაღას უშეუღლიდა...“

თქვე დალოცვილო, იქნება ჩვენს ძმასაც არა აქვს-რა დანაშაული, რატომ არ ჰკითხავთ?“ — გაათავა უფროსმა ძმამ. ხელმწიფემ უბრძანა: ტყუილად ამართლებთ თქვენს ძმას, ის დამნაშავე არისო.

შუათანა ძმამ თქვა იგავი:

„იყო ერთი ხელმწიფე; ჰყავდა ბარყუში¹ ამ ფრინველმა ლაპარაკი იცოდა და ხელმწიფეს ძალიან უყვარდა; მაგრამ იმის ვეზირს კი ეჯავრებოდა, თვალში ეკლად მიაჩნდა. ერთ დღეს ბარყუში დაეთხოვა ხელმწიფეს: ჩვენს ქვეყანაში გიანღვრებით და სანის თაღს წემღვკ დიდოს საჭურჭრით დაებრუნდები და საგანგებო ფეშქაშს მოგართმევო. ხელმწიფემ დაითხოვა. ბოროტი ვეზირი ეუბნებოდა: ნუ დაითხოვ თორემ აღარ მოვაო. წავიდა ბარყუში. გავიდა სამი თვე. ერთი საათი-ღა აკლდა ვადას, რომ შემოვიდა ვეზირი მეფესთან და მოახსენა ნიშნისგებით: აკი მოგახსენებდით აღარ დაბრუნდება მეთქი. ამ დროს კიდევ მოფრინდა ბარყუში და მიართვა ხელმწიფეს სამი თესლი უკვდავების ვაშლისა. ხელმწიფემ თავის ბაღში დაათესინა. რამდენსამეწლის უკან, როცა ვაშლი ამოვიდა და ნაყოფი მოისხა, მეფემ დაიბარა მებაღე და უთხრა: აბა, ერთი უკვდავების ვაშლი მომიტანეო. მანამ მებაღე მოიტანდა, ვეზირმა სხვა ვაშლებს შხამი წაუსვა, მებაღეს კარებში დაუხვდა და უთხრა: მოიტა, მე შევეუტან ხელმწიფესო. გამოართვა კალათა, შეცვალა ვაშლები და მერე ისევ მისცა: აჰა თითონ შენ მიართვიო. შეიტანა მებაღემ ვაშლები. ამ დროს შევიდა ვეზირიცა და მოახსენა: არ მიირთვით, მეფევ, თორემ მოჰკვდებით, შხამიანიო. ბარყუში ეფიცებოდა შხამი არა აქვსო. ვეზირმა მოახსენა: აბა საცდელად ჯერ ძაღლს ვაჭამოთო. შეაჭამეს ძაღლს და იქვე ფეხი ფეხიკა. ვეზირმა ნიშანი მოუგო ხელმწიფეს: აკი მოგახსენებდით, შხამიანი-მეთქი; მაგან უკვდავების კი არა, სასიკვდილო ვაშლი მოგართვათო. ბარყუში იმ წამსვე მოაკვლევინა ხელმწიფემ.

„იმ ქალაქში ერთი თავზე ხელაღებული ქურდი იყო. ხელმწიფემ ბრძანება გასცა უთუოდ დაეჭირათ და დაეხვრიტათ. ქურდმა იფიქრა დახვრეტას ისევ თავის თავად

¹ ბარყუში — ბაიყუში, ბუ.

სიკვდილი სჯობია; მოდი გადავიპარები ხელმწიფის ბაღში, სასიკვდილო ვაშლს შევჭამ და გამოვესალმები ამ წუთისოფელსო. გადახტა ბაღში, თან ხელმწიფის კაცებიც გადაჰყვნენ; ქურდმა შექამა ვაშლი და უცებ ახალგაზრდა ბიჭად გადაიქცა.

„კაცები იმასვე ჰკითხავდნენ: აქ ქურდი გადმოხტა, ხომ არ გინახავსო? ის ეუბნება მე ვარო.—რას ამბობ, ის შუაკაცი იყო და შენ კი თხუთმეტი წლის ბიჭი ხარო. — რას ამბობთ, ის სწორედ მე ვარო, და უამბო როგორც იყო საქმე. მაშინვე ეს ამბავი ხელმწიფეს მოახსენეს. იმას მოაგონდა საწყალი ბარყუში, ბევრი ინანა, ვეზირიც მაშინვე მოაკვლევინა, ქურდსაც აპატივა სასჯელი, მაგრამ ბარყუს ალარა ეშველა რა“

„თქვე დალოცვილო, ერთი ჰკითხეთ ჩემ ძმასაც, იქნებ სულ ცამდე მართალია, — დაუმატა შუათანა ძმამ.

დაფიქრდა ხელმწიფე და მერე ბიჭებს უბრძანა მეფის შვილი ხაროდან ამოეყვანათ. უმცროსმა ძმამ დაწვრილებით უამბო ხელმწიფეს, როგორც იყო საქმე.

— აბა ნახეთ, ხაროში მართლა გდია მოკლეული გველიო? — ბრძანა ხელმწიფემ. ნახეს და მართალი ვამოდგა. ხელმწიფემ დიდად დაასახიჯქრა მეფის შვილი და ისიც სკოლაში მისცა.

ძმები დაიხარდნენ, ისწავლეს და შემდეგ მშვიდობით დაბრუნდნენ. თავის საბრძანებელში.

ხელმწიფემ დალოცა ისინი, დიდი საჩუქრით გაისტუმრა და შებღვნიც არ აკლებდა თავის მთარეფლობს.





ყო ერთი ხელმწიფე, ჰყავდა მოჯამ-გირე, რომელიც მონადირე იყო. ეს მონადირე დადიოდა სანადიროდ

და ნანადირევი შეუყვსთან დაჰქონდა.

ერთ დღეს მონადირემ არაჩვეულებრივი ჩიტი დაინახა. იფიქრა. ცოცხლად დავიჭერო, მივიდა სტაცა ხელიდაიჭირა; ჩაისვა უბეში და გასწია შინისაკენ. მიიყვანა ჩიტი შინ და ჩაკეტა.

მეორე დღეს მონადირე ისევ სანადიროდ წავიდა. როცა შინ დაბრუნდა, ნახა რომ ჩიტი მზეთუნახავ ქალად ქცეულიყო.

მონადირე მთელი დღეებს ქალთან ატარებდა. ხელმწიფემ იფიქრა რაღაც ცუდი ამბავია ჩემი მონადირის თავსაო და გაგზავნა ორი ვეზირი. ვეზირები მივიდნენ მონადირესთან, დაინახეს მზეთუნახავი ქალი, თვალი ველარ მოაშორეს და იქ დარჩნენ.

გაუკვირდა ხელმწიფეს, რომ აღარც ვეზირები გამოჩნდნენ და კიდევ გაგზავნა ორი ვეზირი; იმათაც ისე მოუვიდათ, მზეთუნახავს თვალი ვერ მოაშორეს და იქ დარჩნენ.

შეწუხდა ხელმწიფე რაღაც კარგი ამბავი არ არისო, და ახლა უფროსი გამოცდილი ვეზირი გაგზავნა და უცხრა:

— წადი და გაიგე, რა ამბავია, რა მოუვიდათ მონადირესა და ვეზირებსაო.

ვეზირი წავიდა, ნახა ყველაფერი, დაბრუნდა მეფესთან და უთხრა:

— რა მოგაბნენო, ბატონო, მონადირეს ისეთი მზე-თუნახავი ქალი ჰყავს, რომ შენ არც დაგსიზმრებიაო.

ხელმწიფეს ეუცხოვა ეს ამბავი და თქვა:

— მონადირეს უნდა მოვუხერხო რაიმე და მზეთუნახავი წავართვაო.

რჩევა-დარიგებისათვის დაიბარა ვეზირები. ერთმა ურჩია:

— დააღალე — მთა, რომელიც დილის მზეს გიფარავს. ხვალ დილამდის აწმინდოსო.

ხელმწიფემ დაიბარა მონადირე და უთხრა:

— აი ეს მთა ხვალ დილამდის უნდა გასწმინდო, თუ არ გასწმინდ, შენი მზეთუნახავი უნდა მომცეო.

შეწუხდა მონადირე, დაბრუნდა შინ და უამბო ქალს, რაც ხელმწიფემ დაავალა.

— ეს არაფერიო, — უთხრა ქალმა, მისცა ერთი ვაშლი და დაარიგა:

— ამ ვაშლს გაჰყევი; სადაც ვაშლი გაჩერდეს, იმ ეშოში ჩადი, სატეხი და ეჩო ითხოვე და მოგცემენო.

ვაშლი გაგორდა და ერთ ეშოში გაჩერდა. ეს თურმე მზეთუნახავის მშობლების სახლი იყო. დედ-მამამ მაშინვე იცნო ვაშლი და მონადირე კარგად მიიღეს. მონადირემ სატეხი და ეჩო მოითხოვა, ამათაც მისცეს და გამოისტუმრეს.

მოვიდა ვაჟი შინ და მოიტანა სატეხი და ეჩო.

ცოლმა უთხრა:

— ამ საღამოთი დაიძინე, ხვალ ადრე ადექი, დაიჭირე ეჩო და სატეხი და იმუშავეო.

მონადირე დაწვა და დაიძინა. მეორე დილით წავიდა და ნახა, — მთა გაწმინდილი იყო. მივიდა, დაუწყო მიწას სწორება.

ხელმწიფეს გამოეღვიძა, ნახა გაწმინდილი მთა. და ძალიან გაუკვირდა. დაიბარა ისევ ვეზირები და ჰკითხა:

— როგორ მოვიშორო მონადირე თავიდანაო?

ახლა მეორე ვეზირმა ურჩია:

— უბრძანე, ზღვის გაღმა ქალაქი რომ არის, ის ხვალ დილაშდის გამოღმა გამოიტანოსო.

ხელმწიფემ დაიბარა მონადირე და ის დაავალა, რაც ვეზირმა ურჩია.

მონადირე დალონდა და ისევ ცოლს დაეკითხა:

— რა მეშველება, როგორ მოვიქცეო?

ქალმა ისევ ვაშლი მისცა და უთხრა:

— გაჰყევი ამ ვაშლს, სადაც გაჩერდება, იქ მოითხოვე საყვირი, როცა მინდორში გამოხვალ, დაიყვირე და რაც ქვეყანაზე ნადირი არის, ყველა მოგროვდება და უთხარი შენი გასაჭირიო,

მონადირე ასედაც მოიქცა. საყვირის ხმაზე მოცვივდნენ ნადირები და უთხრეს:

— რაზე დაგჭირდით, ბატონოო?

მონადირემ უთხრა ნადირებს:

— ასე და ასე არის ჩემი საქმე, ეს ქალაქი, წყლის გაღმა რომ არის, ხვალი დილაშდის გამოღმა გააშენეთო.

ნადირებმა მოისმინეს მონადირის დავალება და წავიდნენ.

მონადირე დაბრუნდა შინ. მეორე დღეს გაიხედა და დაინახა წყლის გამოღმა გაშენებული ისეთი მშვენიერი ქალაქი, რომ უკეთეს კაცის თვალი ვერ ნახავდა.

ხელმწიფეს ეწყინა ეს, მაგრამ რას იზამდა. ბოლოს ერთმა ვეზირმა ურჩია:

— დაავალე მონადირეს „არ ვიცია“ მოგიტანოსო.

მეფემ მოიხმო მონადირე და უთხრა:

— გაძღვე სამი დღის ვადას, თუ მოგიტანია „არ ვიცია“ ხომ მოგიტანია, თუ არა და მოგკლავ და შენ მზეთუნახავს მე წავიყვანო.

წავიდა მონადირე „არ ვიცია“-ს საშოვნელად. იარა, იარა, ბევრი იარა თუ ცოტა იარა, მივიდა ერთ უდაბურ ტყეში. იქ ერთი ქოხი ნახა. ქოხში ერთი ბებერი იჯდა და იძახდა:

— პილტონ აბა სადილი მომიტანეო.

მაშინვე სადილი გაჩნდა.

— აბა, პილტონ, ღვინო დამისხიო, — თქვა ბებერმა. ღვინოც დაუსხა რაღაცამ.

მონადირე გაოცებული იდგა და ფიქრობდა, — ნამდვილად ეს უნდა იყოს „არ ვიციაო“.

ბებერი გარეთ გამოვიდა. მონადირე ჩუქად შევიდა ქოხში, ისადილა და ბოლოს დაიძახა:

— პილტონ, მოდი, ღვინო დალიეო.

მონადირეს მოესმა ხმა:

— არა ბატონო, მადლობას გწირავ, მე ღვინოს არა ვსვამ; რამდენი ხანია ბებერს ვემსახურები, იმას ჩემთვის ერთი წვეთი ღვინო არ მოუწოდებია და შენ-კი მოსვლისთანავე მომაწოდეო.

მონადირეს უკვირდა, — რა სულდგმულია, რომ ლაპარაკობსო. ბოლოს დაიძახა:

— პილტონ წამოხვალ ჩემთან თუ არაო?

— კი ბატონოო, — მოესმა ხმა.

წამოვიდა შინ და გზაზე მალემალ გაიძახოდა:

— პილტონ!

— რაა, ბატონოო? — ესმოდა პასუხი.

გზაზე ერთი კაცი შეხვდა, რომელსაც ყუთი მიჰქონდა. ახადა ამ კაცმა ყუთს თავი და უცბად ჯარი ამოცვივდა. კაცმა ისევ ჩარეკა ჯარი ყუთში, დახურა, მოიკიდა ხურგზე და წასვლა დააპირა.

მონადირემ უთხრა:

— მოდი, კაცო დავჯდეთ, პური ვჭამოთო.

მგზავრმა უპასუხა:

— არც შენა გაქვს რაიმე, არც მე, რა უნდა ვჭამოთო.

მონადირემ დაიძახა:

— პილტონ, სუფრა გაშალეო!

გაიშალა სუფრა ნაირ-ნაირი საჭმელებით. დასხდნენ და ისაუბმეს.

— პილტონ, აალაგე სუფრაო, — დაიძახა მონადირემ, და სუფრა გაქრა.

მგზავრს გაუკვირდა ყველაფერი ეს და სთხოვა მონადირეს:

— გამიცვალე შენი პილტონი ჩემს ყუთშიო.

მონადირეს ჩასჩურჩულა ხმამ:

— გაატანე ჩემი თავი, ცოტაზე გავყვები და ისევ შენთან დავბრუნდებიო.

მართლა გაცვალეს.

ცოტა მანძილი გაიარა მონადირემ და მოესმა ხმა:

— დავბრუნდიო.

მონადირე მივიდა ხელმწიფესთან. ხელმწიფემ ჰკითხა:

— რა ჰქვნი, მომიხვანე „არ ვიციო“?

ამ დროს შეუეს სტკიცა რალაცამ სილა და ჰკითხა:

— აბა სთქვი, ვინ შენოგკრა სილაო?

გაოცებულმა მეფემ უბასუბა: — არ ვიციო.

— მე გახლავარ „არ ვიციო“, — მიუგო ხმამ.

ხელმწიფე საშინლად გაბრაზდა, უნდოდა მოეკლა მონადირე, მაგრამ მონადირემ ახადა ყუთს თავი, ამოცვივდა ჯარი და დახოცა მეფე და მისი ვეზირები.

მონადირე დაჯდა მეფეზე, მზეთუნახავი დედოფლად და „არ ვიცია“ უფროს ვეზირად.

გუშინ იქ ვიყავი,
დღეს აქ მოვედი.





ყო და არა იყო რა, იყო ერთი კომბლე, ჰყავდა სამი ცხვარი. ერთხელ ცხვრები ტყეში გარეკა, თითონ კომბლეს დაუწყო კეთება.

კაცყვასა აკითხეს:

— კომბლე, რა სულ კომბლებს აკეთებო?

კომბლემ უპასუხა:

— მე ეს ხელობა ვიცი და ამან უნდა მაცხოვროსო.

გააკეთა კომბლები და ადგა. გაიღო ერთი დიდი კომბალი მხარზე და წავიდა ცხვრების საქებნელად. მიადგა ერთი მგლის სოროს და დაუძახა:

— შენ შეჭამე ჩემი ცხვრებიო?

— არაო, — უპასუხა მგელმა.

— აბა პირი დაადე, კბილებში ჩაგრჩენია ხორციო.

მგელმა უთხრა:

ოდონდ ნუ შომკლავ და ბედსა გწევო.

— რა ბედსა? — ჰკითხა კომბლემ.

— აგე, აქ მეცხვარეებს ბევრი ცხვარი ჰყავთ, იმ ცხვარეში ერთი ოქროს ბატკანი ურევია, იმ ოქროს ბატკანს მე მოვიტაცებ და სულ ყველანი მე დამედევნებიან, შენ მოუარე და ცხვრები გარეკეო, — უთხრა მგელმა.

მგელი წავიდა და მოიტაცა ოქროს ბატკანი. მართლაც სულ ყველა მწყემსი იმას დაედევნა. მოუარა კომბლემ ცხვარსა და გარეკა.

კომბლეს გზაზე კაცები შემოხვდნენ და ჰკითხეს:

— კომბლე, შენ სამი ცხვარი გყავდა, აგრე როგორ გაამრავლე ერთ თვეშიო?

კომბლემ უპასუხა:

ტყეში გაუშვი და გამრავლდებიანო.

იმათაც იყიდეს სამი ცხვარი, გაანებეს ტყეში თავი და წამოვიდნენ შინ. ერთი თვის შემდეგ წავიდნენ საძებნე-შელად, ცხვრები უნდა ეპოვნათ, მაგრამ ცხვრები მგელს შეეჭამა.

წამოვიდნენ შინ და თქვეს:

— რა ვუყოთ კომბლესაო?

— სახლი დავუწვათო.

დაუწვეს სახლი.

კომბლემ გაანელა ცეცხლი და აიღო ერთი საცალო ნახშირი, დაახურდავა სამი მანეთი და თავზე გადააშალა ნახშირს. მოუკრა პირი, აიკიდა საცალო და წაიღო. მივიდა ერთ სალაროსთან და უთხრა ყარაულს:

— ამაღამ აქ დამაყენეთ და ეს საცალოც შემინახეთო.

— დადექიო, — უთხრა ყარაულმა.

იმ ღამეს იქ იყო. გათენდა დილა და ეუბნება კომბლე სალაროს ყარაულს:

— ჩემი საცალო მომეცითო.

მოუტანეს საცალო, კომბლემ გახსნა და ნახა, შემდეგ შარი მოუღო:

— მე საცალო ფულით სავსე მქონდა, თქვენ კი ნახშირი ჩაგიყრია. და ხევიდან. თერთი ფული გადაგიშლიათო; თუ მომცემთ, მომეცით, თუ არა და წავალ ხელმწიფესთან და გიჩივლებთო.

— ოღონდ ნუ გვიჩივლებ ხელმწიფესთან და საცალოს ფულით აგივსებთ და გაგატანთო, — უთხრეს ყარაულებმა.

აუვსეს საცალო ფულით და გაატანეს.

კომბლემ მოიტანა შინ ფული.

კაცებმა ჰკითხეს:

— კომბლე, შენ ნახშირი წაიღე და ფული როგორ მოიტანეო.

— სახლი დავწვი, ნახშირი გავაქრე, წავიღე და ფულზე გავცვალეო.

დაწვეს თავიანთი სახლები იმათაც, აიღეს ნახშირი, ჩაყარეს საცალოებში, დაჰქონდათ სოფელში და იძახდნენ:

— ნახშირი ფულზედო!

ნახშირზე ფულს ვინ გაუცვლიდა და აკი არავინ გაუცვალა, წამოვიდნენ შინ და თქვეს:

— რა ვუყოთ კომბლესაო?

— ცოლი მოვუკლათო.

მოუკლეს ცოლი.

კომბლემ წამოიღო თავისი მკვდარი ცოლი და მივიდა ერთ კაცთან. ამ კაცს ჰყავდა სამი ქალი, ძალიან კარგები.

კომბლემ უთხრა:

— ამაღამ აქ დამაყენეო.

— დადექიო.

თავისი მკვდარი ცოლი იქით მიაყუდა და თითონ მივიდა.

— იქ ვინლა დადგაო? — ჰკითხეს.

— ჩემი ცოლია, ჰკვიანია, რცხვენია და იქ დადგაო. წადით, ხელი მოსჭიდეთ და წამოიყვანეთო.

წავიდა ერთი ქალი, ხელი მოსჭიდა—და მკვდარი გადაიქცა. ქალი მამასთან მივიდა და უთხრა:

— ხელი მოვსჭიდე, გადაიქცა და მოკვდაო.

წამოხტა კომბლე და დაიწყო ყვირილი.

— ჩემი ცოლი ცოცხალი იყო, რად მომიკალით; თუ მომცემთ, მომეცით ერთერთი ქალი, თუ არა და—წავალ ხელმწიფესთან გიჩივლებთო.

ოღონდ ნუ გვიჩივლებ ხელმწიფესთან და აი ამ სამ ქალს დავამწკრივებ და რომელიც გინდა წაიყვანეო.

დამწკრივდნენ სამთავე ქალები და კომბლეს რომელიც მოეწონა, აიყვანა და წაიყვანა.

შინ რომ მიიყვანა ქალი, ჰკითხეს:

— კომბლე შენ მკვდარი ქალი წაიღე და ცოცხალი ვინ მოგცაო?

— მკვდარს ცოცხალზე ცვლიანო,— უპასუხა კომბლემ. იმათაც დახოცეს თავიანთი ცოლები, წაიღეს სოფლებში და იძახიან:

— მკვდარი ცოცხალზედაო.

მკვდარზე ცოცხალი მათ არავენ არ გაუცვალა, წამოვიდნენ შინ და თქვეს:

— რა ვუყოთ კომბლესო?

— მოგკლათო.

წამოვიდნენ, კომბლე უნდა მოეკლათ.

კომბლემ უთხრა:

— ოღონდ ახლა ნუ მომკლავთ და მე თითონ მოგაკლევინებთ ჩემ თავსაო.

წავიდა კომბლე მინდორში, გაქრა სამი თხრილი, მერე წამოიყვანა ორი კაცი და თან ხმლები წამოაღებინა. შუა თხრილში კომბლე დადგა, იქით-აქეთ კი ის კაცები დააყენა, ხმლები დააქერინა და უთხრა:

— როცა დავიყვირო, მაშინ შემომკარით ხმლებიო. უცებ დაიყვირა და თითონ თხრილში ჩახტა.

მათი ხმლები ერთმანეთს მოხვდა და ორივენი დაიხოცნენ, კომბლე კი მშვიდობით გადარჩა.



კურდინი ღებუბი და ოქროსთიანი ბიჭი



ყო ერთი გლეხი და ჰყავდა
პატარა ვაჟი. ერთხელ, რო-
ცა გლეხი ყანაში მიდიოდა,
პატარა ბიჭიც გაედევნა.

სუკონი ცხელი ხალა, მუკი აღინაო, მაგრამ ბიჭმა არ დაი-
შალა და წაჰყვა. გზაზე ბავშვს მოსწყურდა და წყაროსა-
კენ შეუხვია. წყალი რომ დალია, მალა აიხედა და წი-
თელი ვაშლებით დასუნძლული ვაშლის ხე დაინახა. ვე-
ლარ მოითმინა, კბილები აუკაწაწდა და ხეზე აფორთხდა.
დაკრითა ვაშლები და დაუწყო ქამა.

სად იყო და სად არა, ვაშლის ხის ძირას გაჩნდა მო-
კუზული, კუდიანი დედაბერი.

— შვილო, ერთი ტოტი ჩამოხნიქე ფეხით, ორიოდე
ვაშლს მოვწყვეტო, — შესძახა დედაბერმა.

ბავშვმა დახნიქა ვაშლის ტოტი; დედაბერმა მოხიდა
თავისკენ, წაავლო ბავშვს ფეხში ხელი, ჩამოიყვანა ძირს, ჩა-
სვა გულაში, თავი მოუკრა და კუნკულ-კუნკულით შინი-
საკენ გაარბენია.

გზაში დედაბერმა მოიხსნა გულა, გზის ნაპირს დადო
და თითონ გზას გადაუხვია. მის დაბრუნებამდის ბიჭი ამო-
ძვრა გუდიდან, შიგ ქვა და რიყე ჩაყარა, მოუკრა თავი და
თითონ ისევ ვაშლის ხეზე ავიდა.

დაბრუნდა დედაბერი, ისევ წამოიკიდა გულა, შინ მიი-
ტანა და რძალს დაუძახა:

— რძალო, რძალო, მოიტანე გობი, ოქროსთმიანი ბიჭი მოგიყვანეო.

რძალმა ქოხიდან სიხარულით გამოარბენია გობი. დედაბერმა მოხსნა თავი გუდას და საშინლად გაოცდა: როცა გობი ქვითა და რიყით აივსო.

დედაბერი ისევ გაეჭანა ვაშლის ხისაკენ, მიკუნკულდა იქ და ისევ მოტყუებით ჩამოიყვანა ბიჭი ძირს და თავ-მოკრული გუდით მიიყვანა შინ. რძალმა ისევ გამოიტანა გობი, მოხსნა დედაბერმა გუდას თავი და გობზე ოქროს-თმიანი ბიჭი გააგორა.

ზრდიდნენ და ასუქებდნენ ოქროსთმიან ბიჭს რძალ-დედამთილი.

ერთხელ დედაბერი საღვაც მიდიოდა და რძალს ჩუმად დაუბარა:

— ეგ ბიჭი დაკალი, ქვაბით ცეცხლზე შემოდგი და სადილად მომიხარშეო.

ბიჭმა ყური მოჰკრა დედაბრის ნათქვამს.

პატარძალმა გაღესა დანა და ბიჭს დაკვლა დაუპირა. ბიჭმა უთხრა:

— მომეცი დანა, მე თითონ გამოვჭრი ყელსაო.

რძალმა დანა მისცა. ბიჭმა გაუქნია დანა რძალს და კიტრივით გააგორა. ნაწილ-ნაწილად აჭრა, ქვაბში ჩაყარა და ცეცხლზე შემოდგა, თითონ კი ქერში აძვრა.

დაბრუნდა დედაბერი და დაიწყო მოხარშული ხორცის ჭამა. ჩამოყარა ბიჭმა ქერიდან ქვარტლი და ხორცს დააყარა. დედაბერს თავი ეგონა და მიაძახა:

— ფრთხილად, თავუნა, თუ არა შენც შეგქამო.

კიდევ ჩამოყარა ბიჭმა ქვარტლი. დედაბერს ახლა კატა ეგონა და მიაძახა:

— ციც, ციცუნია, თუ არა მოგაჯდები ზურგზე და წელს გაგიშლიო.

ქვარტლი ისევ ჩამოცვივდა ქერიდან-დედაბერმა აიხელა ზევით და რას ხედავს? ოქროსთმიანი ბიჭი ქერში

არხეინად ზის შემოეყარა დედაბერს გული, ახლა კი მიხ; ვდა, რომ რძლის ხორცი შექამა.

— დედაშვილობას, როგორ ახვედი მანდ მასწავლეო, — შეეხვეწა ბიქს.

— როგორ ავედი და გავახურე კეცები, დავადე კე- ცი კეცზე, დავაჯექ და ამოვბტი ჭერზეო.

დედაბერი მართლაც ასე მოიქცა, დაიმტვრა, დაი- წვა, მაგრამ ჭერში ვერ ახტა.

მეორედ შეეკითხა:

— მასწავლე, მართლა როგორ ახვედი მანდაო?

— როგორ და გავახურე შამფურები, დავაწვევე შამ- უური შამფურზე, დავაჯექ და ამოვბტი ჭერზეო.

დედაბერმა ასეც სცადა ჭერზე ასვლა, მაგრამ გახუ- რებულ შამფურზე წამოეგო და ჭერზე ვერ ავიდა.

მესამედაც შეეხვეწა:

— სწორი მითხარი, რით ახვედი მანდაო?

— გავახურე თონე, ზედ დავაჯექი და აქ ამომახტუნაო. ესეც სცადა კუდიანმა დედაბერმა, დააჯდა ავარვარე- ბულ თონეს და შიგ ჩაიფუფქა.

ოქროსთმიანი ბიჭი ჩამოვიდა ძირს და შინისაკენ მოუსვია.



მონადირის შვილი



ყო და არა იყო რა, იყო ერთი გამოჩენილი მონადირე, რომელიც ყოველდღე ნადირსა ხოცდა და შინ მოჰქონდა. მონადირე ერთხელ ერთ ცარიელ მინდორზე გავიდა, უცებ წინ თეთრი ირემი ამოუხტა, გადაუღგა წინ და უთხრა:

— მესროლე თუ დამკარ,—ნეტავი შენ, და თუ ვერ დამკარ,—ვაი შენაო!

ესროლა მონადირემ და ააცდინა. ირემი გაიქრა. დაბრუნდა შინ მონადირე და ცოლს უთხრა:

— დღეს თეთრ ირემს თოფი ვესროლე, ვერ დავკარ მოვკვდები, სუდარა მომიწაადგო.

იმ ღამეს მართლა მოკვდა მონადირე. მონადირის ცოლი ორსულად დარჩა. გაუჩნდა ვაჟიშვილი, ისეთი ღონიერი და ყოჩაღი რამ იყო, რომ იმისი დარი ამ ქვეყანაში არავინ იყო.

ერთხელ აუჩემდა დედას მონადირის შვილი:

— დედავ, მამაჩემი რამ მოჰქალაო?

— წერამ, შვილო, — უპასუხა დედამ.

— არა, უნდა მითხრაო, — გადაეკიდა შვილი.

ბოლოს დედამ უამბო ყველაფერი. ადგა მონადირის შვილი, ჩამოიღო თოფი, გატენა, მოთალა ერთხეს, ესროლა სამი და ტყვია ნატყვიარში გაარტყა. გადაიკიდა თო-

მხარზე და გასწია იმ ირმის საძებნელად. გიარა ტყე-
ები, ხეები და იმ მინდორზე გავიდა, სადაც იმის მამას
ესროლა იმისთვის თოფი და აეცდინა. უცებ გამოუხტა
იმასაც თეთრი ირემი, დაუდგა წინ და უთხრა:

— მესროლე; თუ დამკარ,— ნეტავი შენ, და თუ ამა-
ცდინე,— ვაი შენაო!

დაუმიზნა ვაჟმა და შიგ გულში გაახელა. წაიქცა ირე-
მი და მოკვდა. მივიდა ვაჟი, ხორცი ამოაჭრა, გადაყარა,
ტყავი თავის კუდით, ფეხებით და თავით წამოიღო შინ
და მოვიდა დედასთან; დადო ტყავი და დაისვენა.

ვნახოთ, გაცოცხლებულა ირემი, ბეწვზე თვალ-მარ-
გალიტი ასხია, დადის და დააქლარუნებს. მონადირის შვილი
გაკვირვებული დარჩა. შეიყვანს მაშინვე ირემს სახლში და
დასტრიალებს თავს. შეიბერტყება ირემი, სულ თვალ-მარ-
გალიტი სცვივა; ერთ კვირაში ერთ სახლს აესებს.

გამდიდრდა ძალიან მონადირის შვილი; ისეთი სახ-
ლები დაიდგა, რომ ხელმწიფეს ეკადრებოდა. ერთხელ
შვილი ეტყვის დედას:

— დედავ, რად გვიხდა ამდენი სარჩო და ქონება, თუ
ხალხში არ გამოვალთ და ქვეყანაში არ გამოვჩნდებით;
დავაბატოთ ხელმწიფე და ჩვენი სიმდიდრე ვაჩვენოთო.

— არ გვინდა ხელმწიფე, ის ჩვენ აქ სიკეთეს არ მო-
გვიტანსო,— უთხრა დედამ შვილს.

მაგრამ შვილმა არ დაიჯერა: — უთუოდ უნდა დავ-
ბატოთო.

— რგორც გინდოდესო,— უთხრა დედამ.

ვაჟმა მაშინვე მშვენიერი სადილი მოამზადებინა, ჩაი-
ცვა მდიდრულად და წავიდა ხელმწიფესთან დასაბატოებ-
ლად. როგორც იყო წამოიყვანა ხელმწიფე, კარგი სადი-
ლი აჭამა და მერე თავისი ირემიც უჩვენა. ხელმწიფეს
თვალეები დაებრუცა ირმის ცქერით,

— ეგ ირემი მე უნდა წავიყვანოო,— უთხრა ხელმწი-
ფემ ვაჟს.

ვაჟი უარზე შედგა, მაგრამ რა გაეწყობოდა? წაართვეს და წაიყვანეს.

დარჩა ხახამშრალი მონადირის შვილი. გავიდა რამდენიმე ხანი და აი ერთ დღეს ეძახის ხელმწიფე ვაჟს თავისთან, ვაჟიც წავიდა.

ხელმწიფემ უთხრა:

— აი ეს ოთახები სავსეა თვალ-მარგალიტით, ისეთი სახლები უნდა ამიშენო, რომ კაცს არ ენახოსო.

ოთხი ოთახი სავსე იყო თვალ-მარგალიტით და მესხეთე ნახევარზე.

ვაჟი შეწუხდა და მოახსენა ხელმწიფეს:

— დიდებულო ხელმწიფევ, მე არც ხურო ვარ, არც კალატოზი, არც სხვა რამ ხელოსანი და როგორ ავაშენო სახლიო?

— როგორც გინდა, ისე ააშენეო, — უთხრა ხელმწიფემ.

ვაჟმა იფიქრა და უთხრა:

— კარგი, ორასი ურემი კირი მოატანინეთ, ორასი ურემი ლამი და მე ვიციო.

ყველაფერი მიუტანეს. ვაჟმა ერთი ალებების ტბა იცოდა. იმ ტბაზე სასმელად მთელი ალის ჯარი მოდიოდა, წაიღო ეს ამოდენა კირი და ლამი, ჩაყარა ტბაში და ამოლესა ტბის ძირი და გვერდები; მერე მიუშო შიგ ბანგი. მოვიდნენ ალები, დალიეს წყალი, დაითვრნენ და იქვე დაეყარნენ. მონადირის შვილმა მიუსია კაცები მთვრალ ალებს და ყველასათვის კბილები დაათხრევინა. წამოიღო ეს კბილები, მიიწვია ხელოსნები და ისეთი სახლი დადგეს ალების კბილებისა, რომ იმაზე საკვირველი არა იქნებოდა რა.

გამოვიდა ხელმწიფე, ნახა ეს სახლი და იქვე წაიქცა. ძლივძლივობით მოასულიერეს გულწასული ხელმწიფე და შეაბრძანეს შინ.

ამ ხელმწიფის მოსამსახურეებში ერთი ბებერი იყო. ის ადგა და ხელმწიფეს მოახსენა:

— დიდებულო ხელმწიფევ, დროს ნუ ჰკარგავთ, ეგ ბიჭი ყოჩალი ყოფილა, მაგას შეუკვეთე, რომ აღმოსავლეთის ხელმწიფის ქალი მოგიყვანოსო.

დაიბარა ხელმწიფემ მონადირის შვილი და უთხრა:

— შენ უნდა წახვიდე და აღმოსავლეთის ხელმწიფის ქალი მომიყვანოვო.

მონადირის შვილი ეტყვის:

— დიდებულო ხელმწიფევ! თუ აღმოსავლეთის ხელმწიფის ქალი გინდათ მოგიყვანოთ, ათასნაირი ფარჩა მომეცით და ერთი ხომალდიც გამიკეთეთო.

უშოვა ხელმწიფემ ათასნაირი ფარჩა, ისეთი ქრელი, რომ კაცს თვალს მოსჭრიდა. მონადირის შვილმა ჩააწყო ფარჩები ხომალდში და გასწია ზღვით. კარგა გზა რომ გაიარა, ერთი მსხუილი და ჭეჭა მოესმა, შეჰხედა და ნახა; ერთ თეთრ ქორს გამოუგდია წინ მტრედი და მოსდევს. დაიხარა მტრედი და შევარდა ხომალდში.

— ნუ მიმცემ, — ეხვეწება მტრედი ვაჟს.

— მომეცი და გამოგადგებო, — ეტყვის თეთრი ქორი მონადირის შვილს.

მისცა ვაჟმა მტრედი, და ქორმაც გასწია.

გავიდა ცოტა ხანი და უცებ საშინელი შხაპუნი და წყლის ხევა მოისმის. მოიხედა ვაჟმა და დაინახა, რომ ერთ თეთრ თევზს გამოუგდია წინ წითელი თევზი და მოსდევს. ამოხტა წითელი თევზი და შევარდა ხომალდში. თეთრი თევზი შეეხვეწა მონადირის შვილს:

— ეგ თევზი მომეც და, თუ დაგჭირდეს ჩემი თავი გამოგადგებო. მისცა ვაჟმა წითელი თევზი თეთრ თევზს და გასწია თავის გზას. ბევრი იარა თუ ცოტა იარა, მივიდა ქალის სახლთან. ამოალაგა რაც ფარჩა ჰქონდა და გაფინა ქალის კარებზე. გამოვიდა ქალი და გაკვირვებით შლის ფარჩას.

ვაჟმა უთხრა:

— ქალბატონო, ეგ რა არის, ფარჩები იქ არის, მე რომ გემი მაქვსო, თუ გნებავთ წამობრძანდით და ნახეთო.

ჩაიტყუა ამრიგად ვაჟმა ქალი, ჩაისვა ხომალდში და გააქანა. გზაზე ქალმა უთხრა:

— რა არის, რომ ერთი სანათურიც არ გიქნია, რომ ცა დაინახოს ადამიანმაო.

ვაჟმა მაშინვე გამოჰკრა ზევით ხომალდს. ქალი მტრედად იქცა და გაფრინდა. დარჩა ცარიელი მონადირის შვილი, გაატარა ხომალდი და ერთიც ვნახოთ, დაუჭერია თეთრ ქორს ეს მტრედი და მოუყვანა ვაჟსა, მტრედი ისევ ქალად იქცა. ამრიგად გაიარეს ქალმა და ვაჟმა კარგა გზა. ბოლოს ქალი ეტყვის:

— ცის ლაქვარდს ხომ აღარ მაჩვენებ, ეს ზღვის ტალღები მაინც მაჩვენეო.

გამოჰკრა ვაჟმა ხომალდი. ქალი დგას და ვითომ ზღვას უცქერის; უცებ იქცევა თევზად და დაიკარგება ზღვაში. დაიწყო მონადირის შვილმა თავპირში ცემა, მაგრამ რაღას გააწყობდა. წავიდა დაღონებული. უცებ შხლარტუნი მოესმის, გაიხედა და დაინახა: თეთრ თევზს დაუჭერია ეს თევზი და მოყავს. მოუყვანა თევზმა და შეუგდო ხომალდში.

ქალმა ჰკითხა მონადირის შვილს:

— ვისთვის გინდივარო?

— ხელმწიფისთვისაო,— უპასუხა ვაჟმა.

— არა, მე ხელმწიფეს ცოლად არ გავყვები, შენ ქმარი და მე ცოლიო,— ეტყვის ქალი.

— ეგ როგორ მოხერხდება, ხელმწიფე წამართმევს შენს თავსაო.

— ეგ მე ვიცი, შენ მარტო ის წაუღე ხელმწიფეს, რაც მე გაგატანო, და უთხარი: საჩუქარია, ქალის გამოგზავნილი, თქვენა და თქვენმა ნაზირ-ვეზირმა გახსენითთქო,— უთხრა ქალმა.

წაიღო ვაჟმა, რაც ქალმა გაატანა, და წავიდა, მიუტანა ხელმწიფეს და უთხრა:

— თქვენა და თქვენმა კაცებმა გახსენით, ქალმა მოგართვათო.

თითონ კი გაერიდა.

ხელმწიფემ და იმის ნაზირ-ვეზირებმა დაუწყეს გახსნა ქალის გამოგზავნილ საჩუქარს. უცებ იფეთქა და იქვე მიაწვინა ყველანი.

ქალიც მონადირის შვილს დარჩა და სახელმწიფოც.

ჭირი იქ დავაგდე,

ლხინი აქ მოვიტანე;

ქატო იქ დავაგდე,

ფქვილი აქ მოვიტანე.



ირმისა



ყო და არა იყო რა, იყო ერთი ბერიკაცი.

ეს ბერიკაცი უშვილოდ დაბერებულიყო. ისიც და

იმისი ცოლიც სულ იმას ევედრებოდნენ ღმერთს, რომ შვილი მიეცა მათთვის.

გავიდა ხანი და მიეცათ შვილი, მაგრამ უბედური ბერი კაცი მოკვდა.

ცოლის მწუხარებათ რძე დააკლდა და ბავშვის რჩენა არ შეეძლო. აიღო და ბავშვი ერთ კოჭლ ირემს მიაბარა და სთხოვა:

— შენ გამიზარდევო.

ბავშვი მიეჩვია ირემს, ტყეში თან დასდევდა და როცა მოუნდებოდა, ძუძუს წოვდა.

იმ არემარეში, სადაც ეს ირემი ცხოვრობდა, ხშირად დადიოდა სანადიროდ მეფის შვილი.

ერთხელ შეხვდა ბავშვი, რომელიც ირემს დასდევდა; ეს რომ ნახა მეფის შვილმა, დაანება ნადირობას თავი და გასწია შინისაკენ.

შინ რომ მივიდა მამამ ჰკითხა:

— შვილო, რატომ არ ინადირეო?

შვილმა არ უპასუხა, მხოლოდ სთხოვა ეშოვა მისთვის სამოცდაათი ფუთი ჯაჭვი და ასოცი კაცი ჯაჭვის მსროლელი.

მამამ წადილი აუსრულა, უშოვნა ჯაჭვიცა და კაცებიც.

წავიდნენ სანადიროდ.

ტყეში რომ მივიდა ხელმწიფის შვილი, ეძება ბავშვი და როცა იპოვნა, უბრძანა თავის კაცებს, რომ დაეჭირათ; ესროლეს სასროლი და შემოახვიეს ბავშვს, მაგრამ ბავშვი რომ გაინძრა, ჯაჭვი გაწყვიტა და გაიქცა.

გაწყვეტილი ჯაჭვი მოხვდათ კაცებს და მეფის შვილის მეტი ყველანი დაიხოცნენ.

შინ რომ მივიდა ხელმწიფის შვილი, მამას მოახსენა:

— ჩემი წადილი თუ არ ავისრულე, თავს მოვიკლავო. მამამ უთხრა:

— შვილო, რა არის მაგისთანა, რომ თავს იკლავო? შვილმა მიუგო:

ერთი პატარა ბავშვი ვნახე ტყეში, კოკლ ირემს დასდევდა და ვერ დავიჭირეო.

მამამ კიდევ გაატანა რამდენიმე ფუთი ჯაჭვი და კაცები, გაგზავნა ტყეში, მაგრამ ვერც ახლა დაიჭირეს:

ხალხი დახოცა, ჯაჭვი გაწყვიტა და გაიქცა. ასე ხუთჯერ.

ბოლოს დაიჭირეს და მოიყვანეს შინ; ირემიც თან მოჰყვა.

ბავშვი ტიტველა იყო და ლაპარაკი არ იცოდა.

ხელმწიფის შვილმა ეს ბავშვი ოთახში დასვა. როცა მოშივდებოდა, ძირს ჩამოვიდოდა, ირემთან მივიდოდა და ძუძუს მოსწოვდა.

ხელმწიფის შვილმა იფიქრა:

ვასწავლი საკმლის ჭამას და ტანთ ჩაცმასაო.

სადილობისას და ვახშობობისას შედიოდა მასთან, გაშლიდა სუფრას, მოიტანდა საკმელს, ხელ-პირს დაიბანდა და დაჯდებოდა პურის საკმელად. ასე მოდიოდა ახალ-ახალ ტანისამოს ჩაცმული და იქ ჭამდა პურს.

მერე ეს ბავშვიც ისე მოიქცა, როგორც მეფის შვილი. ადგებოდა, ჩაიცვამდა, კანკალით პირს დაიბანდა და დაჯდებოდა პურის საქმელად.

დიდხანს იყო ასე.

ერთხელ მეფის შვილმა თვალი მოჰკრა, სიხარულით შევარდა ოთახში და მამას შეატყობინა ეს ამბავი.

მამამ უთხრა:

— შემოიყვანეთ სახლში და ჩვენთან იცხოვროსო. ჯერ ვერ ლაპარაკობდა, მაგრამ მათთან ცხოვრებამ ლაპარაკიც ასწავლა და კიდევ შეეჩვია ამათ.

სანადიროდ ისა და ხელმწიფის შვილი ერთად დადიოდნენ, მაგრამ ირმისა უფრო ღონიერი იყო. ზევით ისარს აისროდა და მიწაზე ჩამოვარდნილი რომ დაესობოდა, მისი ამოძრობა ხელმწიფის შვილს არ შეეძლო, ირმისა კი ადვილად ამოაძრობდა ხოლმე.

ერთხელ ხელმწიფე სხვაგან წავიდა, კლიტე ირმისას ჩააბარა და დაუბარა:

— ჩემმა შვილმა თუ გამოიღვიძოს და გითხრას დამატარე ოთახებში, თერთმეტი ოთახი აჩვენე, მეთორმეტეში კი არ შეიყვანო, არ დაღუპოო.

წავიდა მეფე.

ადგა მეფის შვილი და უთხრა:

— ოთახები მაჩვენეო.

ირმისა დასთანხმდა, მხოლოდ მეთორმეტეში არ შეიყვანა:

— ეს შენი საქმე არ არისო.

ხელმწიფის შვილმა იშიშვლა სატევარი და უთხრა:

— თუ არ გააღებ, შენც მოგკლავ და თავსაც მოვიკლავო.

ირმისა ადგა და გააღო.

გააღო თუ არა, დაინახა სურათი ერთი უცნაური ქალისა.

ხელმწიფის შვილი ცოცხალ-მკვდარი დაეცა. ირმისამ წამოაყენა, დააწვინა ოთახში და უთხრა:

— შენ ოღონდ კარგად იყავი და მე გიშოვნე იმასო.
ხელმწიფე რომ მოვიდა, ნახა და თქვა:

— რად მომკალი, რად აჩვენე ის სურათიო.
ირმისამ უთხრა:

— მე მოვგვრი იმ ქალს, ოღონდ წასვლის ნება მო-
მეცითო.

ხელმწიფემ ნება დართო და ორნივე წავიდნენ.

იარეს დიდხანს, წელიწადს მოუწინდნენ გზაში. ბოლოს
შვიდნენ ერთ ზღვის პირას. აქ იდგა ერთი ძირი ვაშლის
ხე, ზედ ვაშლები ესხა..

ირმისამ უთხრა ხელმწიფის შვილს: ჩამოაგდე ვაშლიო.
ხელმწიფის შვილმა ვერ შეძლო.

მაშინ ირმისამ მუშტი ჰკრა, ჩამოყარა ვაშლები და
დასხდნენ საქმელად.

ზღვიდან ამოვიდა ერთი დევი და ყვიროდა:

— ვინ არის, რომ პაპიჩემის დარგული ვაშლის ხილს
ქამს, ახლავ გავათვეო!

ირმისამ უპასუხა:

აქ მოდი და საკადრისს მოგახსენებო.

დევი მოვიდა თუ არა, ირმისამ ჰკრა მუშტი და მო-
კლა.

ამოვიდა მეორე დევი. ისიც იმას ამბობდა, რასაც
პირველი.

ირმისამ ესეც მოკლა.

მესამე დევი სხვაგან ყოფილიყო და რომ მოვიდა,
იმანაც ისეთივე ყვირილი მორთო.

ირმისამ შესძახა:

— მოდი შენი ამხანაგები აქ არიან და ნახეო.

მოვიდა თუ არა, ირმისა ეცა და დაიწყეს კიდაობა.
დიდხანს იჭრდავეს; როგორც იყო, ირმისამ დასძლია და
მოკლა დევი.

აღვა, ჩამოყარა ვაშლი, ჩაიყარა უბეში და ზოგიც
ხელში დაიჭირა; ორი ხელმწიფის შვილს მისცა და წა-
მოვიდნენ თავიანთ გზაზე.

იარეს დიდხანს, მივიდნენ ერთი დღეის სახლში. აქ ნახეს მხოლოდ ორი დღეის ქალი. ამათ უთხრეს:

— ყმაწვილებო, გირჩევთ ახლავე წახვიდეთ, თორემ დევები მოვლენ და შეგჭამენო.

არ დაუჯერა ირმისამ და დაჯდა ჩრდილში. ამოიღო ვაშლები და მოჰყვნენ ჭამას.

დღეის ქალები მორბილდნენ და მუქარის მაგიერ, რაც-კი შეიძლებოდა, პატივი სცეს.

როცა ისინი ვაშლს შეეჭეოდნენ, სამი ძმა დევი მოვიდა.

— რა სულიერი ხართ, რომ ჩემს სახლში მოსულხართ და ჩრდილში დამჯდარხართო? — ჰკითხა ერთმა დევმა.

ირმისამ მიუგო:

— მოდი და გეტყვიო.

დევი მივიდა თუ არა, ირმისა ეცა, წააქცია და ზედ მუხლით შედგა.

მოვიდა მეორე დევი, განუმეორა პირველი დღეის სიტყვები. ესეც წააქცია ირმისამ და ერთიმეორეზე დააწვინა.

მოვიდა მესამე დევი და დაიკვება:

— ვინ არის იმისთანა, რომ ჩემი ძმები ერთმანეთზე დააწვინა და მოკვლას უპირებს, რომ აქვე გავათავოო!

ირმისამ უთხრა:

— მოდი აქ და მე გეტყვი ვინცა ვარო.

მოვიდა თუ არა, დაუწყო მუშტის ქნევა; ირმისამ სტაცა ხელი, წააქცია, სამივე ძმა ერთმანეთზე დააწვინა და უთხრა:

— მოგკლათ თუ არაო?

დევები შეეხვეწნენ, ღმერთი თავდებად მისცეს და მოახსენეს:

— დღეის ამასიქით ჩვენც თქვენი ძმები ვიქნებით და თქვენც ჩვენი ძმები იყავითო.

აუშვა ირმისამ და შევიდნენ სახლში.

დევებმა მასპინძლობა გაუმართეს ხელმწიფის შვილსა და ირმისას. მერე ურჩიეს, რა გზით უნდა წასულიყვნენ ქალთან.

— აქეთ თუ წახვალთ, ოცდაათ დღეს მოუნდებით, მაგრამ უშიშრად მიხვალთ, უკანა გზით თუ წახვალთ, ათ დღეს მიხვალთ, მაგრამ დევები არიან მძლავრები და შეგ-
ქამენ; თუ ამ დევებს გადაურჩით, მერე მიხვალთ იმ ქა-
ლთან, როცა დაღამდება, ლოგინს დაგიგებთ, საკმელს გა-
კმევთ და დაგაწვენთ. სწორედ მაშინ, როცა იმ ქალს შენ-
თან მოპარვა მოუნდება, მე აქედან მაშხალას ვისვრი. თუ
ის ქალი მოგეპარა და თითზე ბეჭედი ისე გაგიკეთა, რომ
ვერ გაგელვიდა, უსათუოდ მოგკლავს. ამისთვის ვახშმის
შემდეგ არ დაიძინოთ იმ ქალის სახლში. ჩვენ უთუოდ
მაშხალას ვისვრით და მაშინ დაიჭირეთ ის ქალიო.

წავიდნენ ორივე ძმები. დიდხანს იარეს და მივიდნენ
ერთი დევის სახლში.

აქ ერთი დევი იწვა და ტყვედ მოყვანილი ქალი
ბუზებს უგერებდა. დაინახა თუ არა ეს ყმაწვილები, ქალმა
უთხრა:

— აქედან წადით ჩქარა, თორემ როცა დევი გაიღვი-
ძებს, მეც შემქამს და თქვენცაო.

ირმისამ უთხრა:

— შენ აქ ჩამოდი და ის მე ვიცი, რასაც დევი მიზამსო.
ქალმა მიუგო:

— ბუზები დაეხვევა, გამოიღვიძებს და დაგვხოცავსო.
ირმისამ უთხრა:

— აქ ჩამოდი, აქაო.

ჩამოვიდა ქალი, დევს გამოიღვიძა და თქვა:

— ვინ წამართვა ჩემი საკბილო ცხოველიო?

ირმისამ უთხრა;

— მე გახლავარო.

გაბრაზებული დევი ჩამოვიდა და შეება ირმისას: და-
იწყეს ბრძოლა: დიდი ხნის შემდეგ ირმისამ დასძლია და
შოკლა დევი.

ირმისამ წაიყვანა ქალი და ჩააბარა იმ სამ დევს, როგორც თავიანთი და.

წამოვიდნენ ისევ, იარეს დიდხანს, მივიდნენ ერთ სასახლეში. ნახეს, რომ დევების ქორწილია.

შევიდნენ ეზოში. დაინახა თუ არა დევების უფროსმა, ჩამოგზავნა ერთი მათგანი იმათი ვინაობის შესატყობლად. შეიტყვეს, რომ სხვა რჯულისანი იყვნენ.

ჩამოგზავნა ხელმეორედ:

— დახოცეთ ეს კაცები, თუ არ ამოვიდნენ ჩვენთანაო. მაგრამ ირმისამ ეს დევი უცებ მოკლა.

როცა შეიტყვეს დევი მოკლესო, სხვა დევი ჩამოგზავნეს, მაგრამ ისიც მოკლა.

ასე რომ ყველა დახოცა. მიდგა რიგი ახლა უფროს დევზე.

ჩამოვიდა თუ არა უფროსი დევი, მაშინვე ეძგერა ირმისას, დაიწყეს ჭიდაობა, დიდხანს იჭიდავეს; დევმა მოიქნია ირმისა და მუხლებამდე ჩასვა მიწაში; შერე ირმისამ მოიქნია დევი და წელამდე ჩასვა მიწაში. ბოლოს მაინც ირმისამ აჯობა: ჩასვა მიწაში თავებამდე და მერე ხელი მიჰყო ამ თავების მოჭრას — დევი ასთავიანი იყო; მოსჭრა ოთხმოცდაცხრამეტი თავი და უთხრა:

— რა გირჩევნია — სიკვდილი თუ სიცოცხლეო?

დევმა მიუგო:

— სიცოცხლე მირჩევნია, ოღონდ ამიშვი და ჩემი საცხოვრებელი შენთვის მომიციაო.

ღმერთი თავდებად მისცა; როცა ამოვიდა, ისევ ჩხუბი დაუწყო, მაგრამ ისევ ირმისამ დასძლია.

მაშინ დევმა უთხრა:

— ცა და ღმერთი ზევით, მიწა და წყალი ქვეით თავდებად გქონდეს, ოღონდ ამიშვი და ჩემს ღონეს მეფის შვილს მივსცემო.

აუშვა და დაუტოვა მეფის შვილი ამას და თითონ წავიდა.

წასვლისას დევს უთხრა:

— შენ ამას ასწავლე სულ ყველაფერი შენი ხერხი და ღონე, თორემ როცა გამოვივლი მოგკლავო.

წავიდა ირმისა. მივიდა იმ ქალთან, რომელსაც ეძებდნენ. სალამო იყო. ქალმა ვახშამი აჭამა. დაუგო ლოგინი და დააწვინა.

როცა გავიდა ერთი საათი, მივიდა ის ქალი, აიღო ბეჭედი და უნდა თითზე გაეკეთებინა.

მაშინ სამმა დევმა მაშხალა ესროლა და ზურგში მოხვდა.

სტაცა უცებ ხელი ირმისამ ამ ქალს თითში.

ქალმა უთხრა:

— მე შენი ბედი ვყოფილვარო,—და გაიკეთა ბეჭედი თითზე.

ირმისამ მიუგო:

— ჩემთვის კი არა, ჩემი ძმისთვის მინდინხარ ცოლადო.

დილა რომ გათენდა, ქალმა გასცა ბრძანება დევების ქალაქში, რომ სულ ყველას მიეტანა მისთვის თითო ხელი ძვირფასი ქვეშსაგები ძღვნად, სხვა რჯულის კაცზე ვთხოვდებიო.

ყველამ მიუტანა, მხოლოდ ერთმა სახლობამ უარი უთხრა.

ირმისამ მოჰკიდა ხელი იმ დევს, წააქცია და უთხრა იმის ცოლ-შვილს:

— თუ არ მომიტანთ ძვირფას ქვეშსაგებს, მოვკლავ ამასაც და თქვენცაო.

იმათ უარი უთხრეს, მაშინ ირმისამ როგორც დევი, ისე მისი ცოლ-შვილი სულ ერთიან ამოწყვიტა.

მერე მშვიდობით წამოვიდნენ შინ.

მეორე დღე რომ გათენდა, დევები მოგროვდნენ ირმი-ასთან და ეს ქალი თავისი მზვითევეთ წამოიყვანეს მეფის შვილთან.

მაშინ მეფის შვილი ისევ დევის სახლში იყო ხერხისა და ღონის სასწავლებლად.

მეფის შვილთან რომ მივიდნენ, ნახეს, რომ ნაცარში იჯდა და ღონის მომატება კი არა, რაც ღონე ჰქონდა, ისიც წართმეოდა.

მივიდა ირმისა დევთან და უთხრა:

— რა არის ესა, რატომ პირობა არ აასრულებო?

დევმა თავისი ღონე მაშინვე მისცა მეფის შვილს ირმისას ბრძანებით.

ირმისამ მოკლა დევი, იმის ქონება მთლად წამოიღო და ყველანი ერთად წამოვიდნენ.

იმ სამ ძმა დევთან რომ მოვიდნენ, კიდევ გამართეს ქორწილი. სამ დღეს აქ დარჩნენ, მერე წამოვიდნენ.

დიდხანს იარეს და მივიდნენ იმ ვაშლის ძირში.

იმ ღამეს იქ იყვნენ დევები, მეფის შვილი, ირმისა და ხუთი ქალი: სამი ქალი იყვნენ სამი ძმა დევის დები, ერთიც ის, რომელიც დევს წაართვა, მეხუთე — ცოლი მეფის შვილისა.

იმ ღამეს ყველანი დაწვნენ და დაეძინათ; ირმისასაც მიეძინა.

ამ ღროს მოფრინდა ერთი რალაც ცხოველი და მეფის შვილის ცოლი ჰაერში აიტაცა, ირმისა უცებ წამოხტა, გაადვიდა ამხანაგები და უთხრა:

— ხომ ხედავთ, დევმა წაიყვანა მეფის შვილის ცოლიო.

მეფის შვილს, რასაკვირველია, ეწყინა, მაგრამ რას იზამდა.

ირმისამ უთხრა დევებს:

— თქვენ აქ იყავით, მანამ არ მოვიდეთ, თორემ ყველას დაგხოცავთო.

დევები დათანხმდნენ და იქ დარჩნენ, ირმისა და მეფის შვილი კი წამოვიდნენ.

დიდხანს იარეს და მივიდნენ ერთ დევის სახლში; ის დევი სანადიროდ წასულიყო. მოტაცებული ქალი იქ იყო და ეზოში დასეირნობდა. ირმისა და მეფის შვილი რომ დაინახა, ძალიან გაუხარდა და უთხრა:

— წადით ახლავე, თორემ მოვა ჩემი ქმარი დევი და ორივეს შეგჭამთო.

მაგრამ ირმისამ უთხრა:

— შენ იმას გეხვეწებით, რომ შეგვიტყვე, სადა აქვს იმას თავისი სულიო?

— კარგიო, — უთხრა ქალმა და ადგილი დაუნიშნა, რომ ერთი თვის შემდეგ მოსულიყვნენ.

წავიდნენ ირმისა და მეფის შვილი და დადგნენ ერთ გამოქვაბულ კლდეში.

როცა დევი მოვიდა, ჰკითხა თავის ცოლს:

— არავინ მოსულაო?

იმან უპასუხა:

— არავინაო.

ერთი კვირის უკან უთხრა ცოლმა დევს:

— შენი სული სად არის, შემოვწირო რამეო.

დევმა უთხრა:

— ჩემი სული შენ რად გინდაო?

ცოლმა უთხრა:

— როგორ რად მინდა, რასმე შემოვწირავ, რომ ცხონდე და ჩემთვისაც კარგი იყოსო.

დევმა უთხრა:

— ჩემი სული სვეტშიაო.

ქალმა ეს სვეტი ისე შელგბა, რომ იმის შეხედვას არა სჯობდა რა.

დევმა რომ ეს ნახა, უთხრა:

— ჩემი სული თუ ასე გიყვარს, ამ კატაში არისო.

ცოლმა ეს კატა ისე გაალამაზა, მეტი არ შეიძლებოდა. უკერავდა კარგსა და კარგს ტანისამოსს და აცმევდა. ეს რომ ნახა დევმა, უფრო მოუწონა და უთხრა:

— ჩემი სული ცხრა მთას იქით არის. ერთს ხეზე ჩამოკიდებულია ცხრათავიანი დევი, იმას შიგნით უზის ირემი, ირემში შველია, შველში კურდღელი, კურდღელში არის ბაჰია, ბაჰიაში კოლოფი და იმ კოლოფში სამი მერცხალი. ორი მერცხალი არის ჩემი თვალები და ერთი ჩემი სულიაო.

გაუხარდა ქალს, რომ ყველა შეიტყო, მეორე დღეს უნდა მოსულიყვნენ მეფის შვილი და ირმისა.

როგორც მოვიდნენ, ქალმა ყველაფერი უამბო, რაც დევისგან გაეგონა.

ამათ წასვლა დააპირეს, მაგრამ ქალმა უთხრა:

— ისევ თავი დაანებეთ, რადგან ის დევი, რომელიც ხეზეა ჩამოკიდებული, თუ სუნი მიუვიდა ადამიანისა, დიდ მანძილზე მიიზიდავს და შეგჭამსო.

ირმისამ უთხრა:

— ნუ გეშინიან, მე იმას მოვუხერხებ და ხელში ჩავიგდებო.

ორივენი წავიდნენ.

ირმისამ და მეფის შვილმა დიდხანს იარეს, მივიდნენ ერთ მთის სიახლოვეს, გაიარეს ცხრა მთა; მივიდნენ თუ არა მთის ძირში, მეფის შვილი ააკანკალა დევის შუქმა, მაგრამ ირმისამ დაიმაგრა. როცა ორიოდ აღდგა სიახლოვეს მივიდნენ, ორივენი გამოაგდო შუქმა. მაგრამ, როგორც იყო, ირმისამ გაქრა თოკი, ჩამოვარდა დევი, მოსქრა ამ დევს ცხრა თავი, გაქრა შუაზე, ამოიყვანა ირემი, ისიც გაქრა, ამოიყვანა შველი, ისიც გაქრა, გამოხტა კურდღელი, სტაცა ხელი კურდღელს და გაქრა, შიგ ნახა ბაქია, ისიც გაქრა ამოიღო კოლოფი.

ამ დროს გახდა, ავად დევი.

ირმისამ გააღო კოლოფი, ამოიყვანა ერთი მერცხალი და მოკლა.

მაშინ დევს ცალი თვალი დაეწყო.

მივიდა დევთან ირმისა და უთხრა:

— ეს ქალი რომ წამოიყვანე, ეგ იმიტომ მოგივიდაო. ირმისამ ამოიყვანა მეორე მერცხალი და ისიც მოკლა. დევი ორივე თვალით დაბრმავდა.

წამოიყვანეს ქალი და მოვიდნენ იმ ვაშლის ძირში. აქ დახვდათ იმათ სამივე დევი. იმ ღამეს იქ დარჩნენ, მაგრამ ირმისას არ დასძინებია, რადგან ეშინოდა, კიდევ არავინ წამართვას ქალიო.

როცა შეიქნა შუალამე, მოვიდა სამი ქაჯი, შემოსხდნენ ვაშლის წვეროზე და დაიწყეს ლაპარაკი. ერთმა თქვა:

— რა ბედი მიეცეს ამ ცოლ-ქმარსაო?

მეორემა თქვა:

— ის ბედი მივცეთ, რომ როგორც შევიდეს სიძე ეზოში და ცხენი გამოათამაშოს, ცხენიდან გადმოვარდეს და მოკვდესო.

მესამემ თქვა:

— თუ ამას გადარჩეს, ხელმწიფის ცოლმა რომ მიართვას ოქროს სარტყელი და ოქროს ფეხსაცმელი, მაშინ სარტყელი გველად გადიქცეს და ქალი შეჭამოს და თუ ამას გადარჩეს, ფეხსაცმელმა ფეხი მოსტეხოსო.

პირველმა კიდევ თქვა:

— თუ ამასაც გადარჩეს, ღამე მოვიდეს გველეშაპი და ორივე ჩანთქასო. თუ ამას ვინმე უურს უგდებდეს და გააცხადოს, ქვა-გრილად გადიქცესო.

ამას უურს უგდებდა ირმისა, მაგრამ მან არავის უთხრა.

მეორე დღეს წამოვიდნენ შინ. როგორც შევიდნენ ყველანი ეზოში, იმ დროს მეფის შვილმა გადაჰკრა ცხენს და უნდოდა გაეთამაშებინა, მაგრამ ირმისამ არ გაუშვა, ცხენს აღვირი დაუჭირა და ჩამოხტნენ ცხენიდან.

დედამთილმა მიართვა რძალს ოქროს სარტყელი და ფეხსაცმელი, მაგრამ ირმისამ გამოართვა, დაამტვრია და გადაყარა.

ამას ყველაფერს გადარჩნენ, მაგრამ ის ღამე კი საშიში იყო.

ირმისამ იმ ღამეს არ დაიძინა, საცა ცოლ-ქმარი იწვნენ, იმ ოთახს ჰყარაულობდა. შუალამისას მივიდა გველეშაპი, ირმისამ მოკლა ის, გამოიტანა, ერთ სახლში შეიტანა და იქ დააგდო, თითონ კი დაწვა და დაიძინა.

როცა ადგა, ეს სახლი შელესა.

გაიმართა ქორწილი და გასტანა სამ დღეს.

ქორწილის შემდეგ დევები წავიდნენ თავიანთ სახლში. ერთხელ დღესასწაულში ხელმწიფე და მისი შვილი სალოცავად წავიდნენ, მაშინ დედამთილმა და რძალმა დაუწყეს გამოკითხვა ირმისას:

— რატომ არ მიეცი ნება მეფის შვილს ცხენი გაეთამაშებინა და ოქროს სარტყელი და ფენსაცმელი რად დაამტვრიე და გადააყარეო?

მაგრამ ირმისამ არაფერი უთხრა, მხოლოდ სთხოვა:

— დამეხსენითო.

დიდხანს ეხვეწნენ და ბოლოს ირმისამ უთხრა:

— ჩემი სიკვდილი გინდათ და აი გეტყვითო.

ირმისამ ყველაფერი უამბო, რაც ქაჯებმა ილაპარაკეს, და როგორც გაათავა, ქვა-გრილად გადაიქცა.

დაიწყეს ტირილი დედამთილმა და რძალმა.

ადგა რძალი და გაიქცა მკითხავთან. მივიდა და შეეხვეწა:

— მირჩიე რამე ქვა-გრილისაო.

მკითხავმა უთხრა:


— შენი შვილი მოხარშე ძღუდარე წყალში და გადაასხი იმ ქვა-გრილსა, ის ბავშვი და ქვა-გრილი ერთად მოვლენ შენთანაო.

წამოვიდა და მოხარშა თავისი შვილი, გადაასხა ირმისას და თითონ შევიდა თავის ოთახში.

ცოტა ხანს უკან ამოვიდნენ ორივენი მღერით და დაიწყეს ამის შემდეგ ყველამ ერთად მშვილობიანად და ბედნიერად ცხოვრება.



სასწაულმოქმედი პეჩანები



ყო და არა იყო რა, იყო დასავლეთის ხელმწიფე და ჰყავდა სამი ვაჟი. ერთ-ხელ ხელმწიფე ძლიერ ავად გახდა, დაიბარა შვილები და უთხრა:

— ვიცი, ველარ მოვრჩები, სიკვდილის დღე მომიახლოვდა, ჩემს შემდეგ თუ რაიმე გაგიჭირდეთ, აღმოსავლეთის ხელმწიფესთან მიდიოთ და შემწეობა სთხოვეთო.

გარდაიცვალა ხელმწიფე და ისე დაასაფლავეს, როგორც შეეფერებოდა. გაიგეს შორეულმა სახელმწიფოებმა ეს ამბავი და დაესიენ ობლების ქონებას. ობლებმა ძლივს გაასწრეს მტრებს ცოცხლად და აღმოსავლეთის ხელმწიფეს შეათარეს თავი.

აღმოსავლეთის ხელმწიფემ კარგად მიიღო ობლები, მისცა საკუთარი სახლი, მიუჩინა მოსამსახურე და კეთილად ეპყრობოდა. ერთ მეთვალყურეს დაავალა:

— ხელმწიფის შვილები კარგად აღზრდილები ჩანან; ყური უგდე დღეს სადილზე რას იტყვიან. და ამბავი მომიტანეო.

დასხდნენ სადილად დასავლეთის ხელმწიფის შვილები. უფროსმა ძმამ აიღო პური ხელში და თქვა:

— ამ პურს ადამიანის სისხლი ურევიაო.

საშუალომ აიღო ბატკნის ხორცის ნაჭერი და თქვა:

— ეს ბატკახი თავისი დედის რძით არ არის გაზრდილი, ძაღლის ძუძუ უწოვიაო.

უმცროსმა თქვა:

— ხელმწიფე ხელმწიფის შვილი არ არისო.

ამათი ნალაპარაკევი მეთვალყურემ ხელმწიფეს მოახსენა.

ხელმწიფემ ბრძანა:

— მოიყვანეთ გუთნისდედაო.

გამოცხადდა გუთნისდედა.

ხელმწიფემ ჰკითხა:

ამ პურს ადამიანის სისხლი რად ურევიაო?

— თესვის დროს ხელი გავიჭერი და მუქით რომ ხორბალს ვაპნევიდი, სისხლიც თან ჰყვებოდაო, — უპასუხა გუთნისდედამ.

დაიბარეს მეცხვარეებიც. ხელმწიფემ ამათაც ჰკითხა:

— ამ ბატკანს ძაღლის ძუძუ რად აწოვეთ, თავის დედას რად მოაშორეთო?

მეცხვარეებმა უპასუხეს:

— დედა მოუკვდა, რძით ვზრდიდით და ძაღლსაც შესჩვეოდლაო.

ბოლოს ხელმწიფე მივიდა დედასთან და უთხრა:

— დედი, წუხელის სიზმარში მასწავლეს, თუ ძუძუს მომაწოვებ, სიბერემდის ვიცოცხლებო.

დედამაც მისცა ძუძუ. ხელმწიფემ ძუძუ პირში ჩაიდვა, კბილები მოუჭირა და უთხრა:

— ვიცი, ხელმწიფის შვილი არა ვარ; მითხარ, ვინ იყო მამაჩემი, თორემ არ აგიშვებო.

რალას იზამდა დედა, გამოუტყდა და უთხრა:

— მეჯინიბის შვილი ხარო.

აღმოსავლეთის ხელმწიფე დარწმუნდა დასავლეთის ხელმწიფის ვაჟები მართლაც პატივისცემის ღირსნი არიანო და ამასიქით კიდევ უფრო კარგად ეპყრობოდა. გამოზარდა და როდესაც სრულწლოვანნი შეიქნენ, გაისტუმრა თავის სახელმწიფოში; სამივეს თითო ცხენი დაუტვირთა ფულითა და თვალ-მარგალიტით.

წავიდნენ ძმები. ბევრი იარეს თუ ცოტა იარეს, მია-
დგნენ ერთ ჯვარედინ გზას. დაისვენეს. იქ ერთი დიდი
ქვა იდო, რომელზედაც სამივე მხარეზე ეწერა:—ამ გზით
წავიდეს მგზავრი, — დაბრუნდეს; ამ გზით წავიდეს,—
ან დაბრუნდეს ან არა; ამ გზით წავიდეს,—სულ აღარ
დაბრუნდესო. ქვა შუა ალაგას იდო და წარწერები გზები-
სკენ ჰქონდა მიქცეული.

ძმებმა ირჩიეს სხვადასხვა გზით წასვლა. შინ რომ მი-
ვიდეთ, მტერი სულ გაანადგურებდა იქაურობასო და და-
იწყეს მსჯელობა, ვინ რომელი გზით წასულიყო.

ურთოსმა ძმამ აირჩია ის გზა, რომელზედაც ეწერა:
წავიდეს, ისევ დაბრუნდესო; საშუალომ აირჩია—ან და-
ბრუნდეს, ან არაო; უმცროსმა—კი — წავიდეს, ველარ და-
ბრუნდესო.

ბევრი ეხვეწნენ უმცროს ძმას, შენც ჩვენი გზა აირჩიე,
მანდეთ ნუ წახვალო, მაგრამ არ გაიგონა. ძმებმა ქვის ქვეშ
დააწყვეს ბეჭდები და პირობა დადეს,—ვინც უწინ გამოიარ-
ოს, თავისი ბეჭედი გამოიღოს და მამის ბინაზე წავიდესო.

უმცროსი ძმა შორს წავიდა უგზოუკვლოდ, თითონ
არ იცოდა სად მიდიოდა. გავიდა ერთ დიდ გზაზე. გზამ
ზღვის პირას მიიყვანა და კიდევაც დაღამდა. იქ ერთი ქო-
ხი ნახა. გაუკვირდა, —ამ უდაბურ ალაგას რა უნდა ვინმე-
სო. ახლოს მივიდა და ნახა ქოხში ერთ დედაბერი იყო.
დედაბერს გაუკვირდა ვაჟის მისვლა და ჰკითხა:

— შვილო, რამ მოგიყვანა ამ უდაბურ ადგილსო?

— დედაშვილობას, ბინა მომეცი, ღამე გავათიოო, —
შეეხვეწა ხელმწიფის შვილი დედაბერს.

დედაბერმა შეიწვია ვაჟი სახლში. ყმაწვილმა მოხსნა
ცხენს ხურჯინები, ქოხში შეიტანა და ცხენი გარეთ დაა-
ბა. როცა დაბნელდა ხელმწიფის შვილმა გამოხედა ცხენს
გარეთ, ქოხს ირგვლივ შემოუარა და უცნაურმა სანახავემა
შეაჩერა: ზღვაში ერთი დიდი სასახლე იყო გაბრწყინებუ-
ლი, როგორც ცეცხლი, ისე ანათებდა. ძალიან შეშინდა

ხელმწიფის შვილი, მაგრამ ძალ-ღონე მოიკრიფა, შევიდა დედაბერთან და ჰკითხა:

— რა არის ის, ზღვაში რომ ანათებსო?

— ეგ ოქროს სასახლეა, შიგ მზეთუნახავი ხელმწიფის ქალი ცხოვრობს, პირზე მრავალკეცი საბურველი აქვს ჩამოთარებული, მაგრამ მაინც ასე ანათებს მისი სილამაზე მთლად ამ მიდამოსო, — უპასუხა დედაბერმა.

— როგორ ცხოვრობს, გვერდით ვინ ახლავს, ან როგორ შეიძლება მასთან ასვლა, გეცოდინება და მასწავლეო, — შეეხვეწა ვაჟი.

დედაბერმა უამბო:

— როდესაც ხელმწიფე ცოცხალი იყო, აქ ქალაქი იყო გაშენებული; ხალხიც მრავლად ვცხოვრობდით; ეგ ქალი რომ შეეძინა, თილისმისმცოდნე პირები შეკრიბა და ეს სასახლე ასე გააჩერა ჰაერში დაკიდული; ხმელეთიდან კიბე გააკეთებინა იმ სახლამდის და თითონ იმით აღიოდა ქალთან; კიბეს ათასი მეომარი ყარაულობდა, სხვას არავის შეეძლო იქ ასვლა; ერთხელ ზღვა აღელდა და ქალაქში რაც სახლები იყო, ან ხალხი ცხოვრობდა, სულ ზღვაში შეიტანა; მე ზევით მთაზე ვიყავი წასული საზრდოს საშოვრად და გადავჩჩი. მას აქეთ აქა ვარ, არც სიკვდილი მეღირსა და ასე ვიტანჯები მარტოკა. იმ ქალს განგება თუ უგზავნის საზრდოს, თორემ არა ვიცი რა. ის კი ვიცი რომ ცოცხალია, რადგანაც ღამე ანათებს. მეც ციდან საზრდო მეძლევა და ასე ვცხოვრობო.

ხელმწიფის შვილმა მოისმინა ეს ამბავი. ისე გაერთო ფიქრებში, რომ მთელი ღამე ძილი არ მოსვლია. მეორე დღეს შეჯდა ცხენზე, წაიღო ფული და წავიდა. იარა, იარა და მიადგა ერთ ქალაქს. დაიჭირავე ხურო, ღურგლები, იყიდა ხის მასალა, მოიტანა იმ ზღვასთან და გააკეთებინა კიბე სასახლემდის. ოსტატებს ბევრი ფული აჩუქა და სთხოვა:

— როცა სასახლეში ავალ, კიბე დაშალეთ და ზღვაში ჩაყარეთო.

გამოეთხოვა დედაბერს და ქალის სახლში ავიდა. ოსტატებმა კიბე დაშალეს და ზღვაში ჩაყარეს. ხელმწიფის შვილმა დაიწყო ბანზე წინ და უკან სიარული. ქალს ფეხის ხმა მოესმა და დაიძახა:

— რა ხარ, რა სულიერი ხარ, აქ აღამიანს არასოდეს არ გაუვლია და შენ საიდან მოხვედიო?

— ბედმა შენთან გამომგზავნა შენ ამხანაგადაო, — მიუგო ვაჟმა.

— მე ზეციდან ჩამომდის, საზრდო, თუ შენთვისაც ჩამოვა, მოდი ჩემთან, თუ არა და მანდ გაჩერდიო, — დაუძახა ქალმა.

გავიდა ცოტა ხანი და მალლიდან ორივესთვის ჩამოეშვა პურ-ღვინო.

ქალმა და ვაჟმა ისადილეს და შეჰფიცეს სიკვდილამდის არ ელალატნათ ერთმანეთისთვის.

ცხოვრობდნენ ტკბილად და უზრუნველად. ქალმა ვაჟს აჩვენა რვა ოთახი, სავსე სხვადასხვა სანახაობით; ერთში ფრინველები იყო და ტკბილ ხმაზე გალობდნენ; მეორეში იყო თუთიყუში და აღამიანივით ტიტინებდა; მესამეში აუარებელი თვალ-მარგალიტი და ოქრო-ვერცხლი იყო; მეოთხეში — ქალის ტანისამოსი; მეხუთე, მდიდრულად მოწყობილი, საცხოვრებლად ჰქონდა. დახარჩენ ოთახებში ბალი იყო გაშენებული ათასნაირი ყვავილითა და ხეხილებით. ისეთი ხეხილები მთელ დედამიწაზე არ იყო; ყვავილები ლაპარაკობდნენ; ერთი ამბობდა: „მე რომ დამყნოსო, მოვკვდები“ მეორე ამბობდა: — მკვდარს რომ დამადო, გავაცოცხლებო და სხვა. მეცხრე ოთახი არ აჩვენა ქალმა ვაჟს და უთხრა:

— ნუ მთხოვ მაგის ჩვენებასო.

ერთხელ, როცა ქალს ეძინა, ხელმწიფის შვილმა მოიპარა მეცხრე ოთახის გასაღები და წავიდა ოთახის სანახავად. გააღო, შევიდა და გაოცდა. ოთახში კიდევ პატარა ოთახი იყო. გაოცებული ვაჟს კარები ღია დარჩა. გააღო პატარა ოთახიც და შიგ ნახა, პატარა ჩიტი ნისკარ-

ტით პერანგს ქსოვდა. უცხო კაცის დანახვაზე ჩიტი გაფრინდა და პერანგიც თან წაიღო. დაღონებული ვაჟი მივიდა ქალთან და დაჯდა.

გაიღვიძა ქალმა. მაშინვე გაიგო ყველაფერი და ვაჟს უთხრა:

— თუ ასე ძალიან გინდოდა ოთახის დათვალიერება, მეტყობდი და გაჩვენებდი; ის ისეთი პერანგი იყო, რომ მცბოდა, მთელი ქვეყანა რომ შემბმოდა, ვერას დამაკლებდა, ახლა-კი მუდამ შიშში უნდა ვიყოთო.

დაღონდნენ ორივენი, მაგრამ რას იზამდნენ.

ჩიტმა პერანგი შორს გაიტაცა ტრიალ მინდორზე, ერთ ალაგს დაუვარდა, მიატოვა და გაფრინდა.

გაზაფხული იყო. მწყემსებს ცხვარი მიყავდათ იალღზე. ღამის გათევა მინდორში მოუხდათ. ცეცხლი არა ჰქონდათ, რომ აენთოთ. იცქირეს იქით-აქეთ, იქნებ სხვა მწყემსებია სადმე, რომ ცეცხლი გამოვართვათო. შორს წერტილივით დაინახეს ცეცხლი და ერთი მწყემსი გაგზავნეს მოსატანად. წავიდა მწყემსი. მიუახლოვდა იმ ადგილს და ხედავს რაღაც ანათებს, მაგრამ ცეცხლი არ არის. მეცხვარე შიშმა აიტანა, მაგრამ ცნობისმოყვარეობამ დასძლია და ახლო მივიდა. ნახა პერანგი, აიღო და წამოვიდა. მოაქვს და უხარია:

— ეს რა კარგი რამე ვიშოვნე, ჩვენს ხელმწიფეს მივუტან და დამასაჩუქრებსო.

მიიტანა ამხანაგებთან პერანგი. მწყემსები გაკვირდნენ; პერანგი არც ნაქსოვი იყო, არც ნაქარგი, არც ხელით ნაკერი ჰქონდა სადმე.

წაიღო მწყემსა პერანგი ხელმწიფესთან. ხელმწიფეც ძალიან გაკვირდა:

— ხელოვნური რამე არ არის, ცით მოწყვეტილი უნდა იყოსო.

ხელმწიფემ მწყემსი დაასაჩუქრა და

შეყარა ნაზირ-ვეზირები.

— გამიგეთ, რა არის ეს, ან ამის ჩამცმელი ციურია თუ ქვეყნიურიო.

წავიდნენ სხვადასხვა მხარეს საძებრად. მთელი წელიწადი ეძებეს, მაგრამ ვერაფერი გაიგეს და დალონებულები დაბრუნდნენ შინ.

ხელმწიფემაც მოიწყინა. ისევ გასცა ბრძანება:

— ვინც იმ ქალს იპოვის და მომიყვანს, ჩემი სახელმწიფოს ნახევარს იმას დავუმტკიცებო.

მოვიდა ერთი ბებერი და ხელმწიფეს მოახსენა:

— ილღეგრძელეთ, ხელმწიფევ! რად სწუხდებით აგრე; მომეცით ერთი პატარა ნავი; ერთი ჩარქვა ბანგი და ერთი ჩარქვაც ღვინო და მე მოვიყვან იმ ქალსაო.

გაეხარდა ხელმწიფეს, მისცა ყველაფერი და გაისტუმრა.

მივიდა დედაბერი ზღვასთან. ჩაუშვა ნავი ზღვაში და წავიდა. იმდენი იარა, რომ მივიდა ქალის სასახლესთან და დაუწყო გარს შემოვლა. ქალი და ვაჟი ბაღში დასეირნობდნენ. გადმოიხედეს და დაინახეს ბებერი ზღვაში, მალლა იშვერს ხელებს და ყვირის.

— მიშველეთ, ამიყვანეთ, ვილუპებიო.

ვაჟი გაიქცა და თოკები მოარბენინა.

ქალი არ უშვებდა:

— ნუ შვრები, არ ამოიყვანო, თორემ დავილუპებითო.

ვაჟმა არ გაუგონა, ჩაუშვა თოკი და ამოიყვანა ბებერი.

ბებერმა მოხერხებულად მიამაგრა ნავი სახლზე, ისე რომ ქალსა და ვაჟს არ შეუმჩნევიათ; ამოყვანისათვის მალლობა შესწირა ვაჟს და იმათთან დარჩა; ემსახურებოდა და ათასნაირი ქვეყნიური ამბით ართობდა ქალ-ვაჟს.

ერთ დღეს ბებერმა ამოიღო ხელმწიფის მიერ გამოტანებული ღვინო და ბანგი; ღვინო თითონ დალია, იმათკი ბანგი შეაპარა და დააძინა. ვაჟს დანით ყელი გამოსქრა, ქალი-კი თოკით ნავში ჩაუშვა, თვითონაც ჩაეშვა, აუშვა ნავი და წავიდა. მივიდა ხელმწიფესთან და მიიყვანა მძი-

ნარე ქალი. ქალი მისთვის საგანგებოდ მორთულ ოთახში მოათავსეს.

ქალმა გაიღვიძა და საშინლად გაოცდა, რომ უცხო სახლში ნახა თავისი თავი. პირისფარეშებმა ხელმწიფეს მოახსენეს:

— ქალმა გაიღვიძაო.

ხელმწიფეს გაეხარდა და ქალისაკენ გაეშურა. უცხო კაცის დანახვაზე ქალმა ამოიღო ჯიბიდან დანა, გულზე დაიდვა და დაუძახა:

— არ მოხვიდე ახლოს, თორემ თავს მოვიკლავო.

ხელმწიფე შეჩერდა.

ქალმა დაუწყო გამოკითხვა:

— ვინა ხარ, რა ჰქვია აქაურობას, ან მე ვინ მომიყვანა აქაო?

ხელმწიფემ უთხრა:

— მე ამ ქვეყნის ხელმწიფე ვარ, შენ ბებერმა მოგიყვანა, შენი ქმარი მოკლა, ახლა მე უნდა შეგიერთო ცოლად; შენი პერანგიც აქა მაქვს, როდესაც ჯვარს დავიწერთ, მაშინ მოგართმევ, მინამდის კი მე მექნებაო.

— კარგი, შენ ხელთა ვარ, რას გავაწყობ; მომეცი ერთი წლის ვადა, რომ ქმარი ვიგლოვო; არავინ შემოხვიდეთ ჩემთან, თუ ვინმე გაბედავთ შემოსვლას, თავს მოვიკლავ; მთელ შენს სახელმწიფოს შავი ჩააცვი და სახლსაც შავი გადააკარო, — უთხრა ქალმა.

ხელმწიფე ყველაფერზე დაეთანხმა.

დასავლეთის ხელმწიფის უფროსმა ვაჟმა, რომელიც სხვა გზით წავიდა, ვაჭრობაში ბევრი ფული მოიგო; ბოლოს მობეზრდა აქეთ-იქით სიარული და წამოვიდა ძმების შესახვედრად. მოვიდა ჯვარედინ გზაზე. ასწია ქვა და ნახა, საშუალო ძმას ბეჭედი წაეღო, უმცროსს — არა. წავიდა უმცროსი ძმის სამებრად. ბევრი სიარულის შემდეგ მივიდა ბებერთან, რომელიც ზღვის განაპირას ქოხში ცხოვრობდა და ჰკითხა:

— ოთხი წლის წინ ერთი ვაჟი წამოვიდა აქეთ და ხომ არა იცი რა?.

— ბებერმა ყველაფერი უამბო, რაც იცოდა, და ბოლოს დაატანა:

— რაც იმ ქალთან ავიდა, აღარა ვიცი რა და აგერ ცხრა დღე იქნება აღარც სინათლე დამინახავსო.

ეს ხელმწიფის შვილი წავიდა ერთ ქალაქში, დაიქირავა ხურო-ღურგლები, მოატანინა მასალა, გააკეთებინა კიბე და ავიდა სასახლეში. ავიდა და ნახა საუცხოვო ქალაქი, მდიდრულად მორთული; ნახა თავისი ძმა ყელგამოჭრილი ხრიალებს; ბებერს სიჩქარით მთლიანად ვერ გამოეჭრა ყელი. ადგა უფროსი ძმა, დაიარა ყველა ოთახი, ნახა მშვენიერი ბალი სხვადასხვა ხეხილითა და ყვავილე-ბით; ნახა ყვავილი, რომელიც იძახოდა: „მე რომ მკვდარს დამადო, გავაცოცხლებო“; მოწყვიტა ეს ყვავილი, მიიტანა ძმასთან, დაადო და გააცოცხლა. უმცროსმა ძმამ გაახილა თვალები და ჩაილაპარაკა:

— უჰ, რამდენი ხანი მძინებიაო!

ძმა რომ დაინახა, გაუკვირდა და ჰკითხა:

— როგორ მოხვედი აქ, ან ქალი სად არისო?

ძმამ უამბო, თუ როგორ ამოვიდა აქ, როგორ იპოვა ის ყელგამოჭრილი, როგორ გააცოცხლა და სხვა და ისიც უთხრა ქალი არ მინახავსო.

უმცროსს ძმას მოაგონდა ყველაფერი, მიხვდა, — ბებერი იზამდა ამასო და წასასვლელად დაიწყო მზადება. შევიდა ბაღში, დაქრა ხის კენწეროები, შეკრა კონები, ჩაუშვა წყალში, დასხდნენ ზედ ძმები და წავიდნენ. როცა ნაპირს გავიდნენ, უფროსს ძმას უთხრა:

— წადი, ძმაო, შინ, მე სანამდის იმ ქალს არ ვიპოვი, მის გზაზე უნდა მოვკვდეო.

გაშორდნენ ერთმანეთს. უფროსი შინ წავიდა, უმცროსი-კი ქალის საძებრად. ბებერი ძებნის შემდეგ მივიდა იმ ქალაქში, სადაც ქალი იყო. ნახა — ყველაფერს შავი აქვს

გადაკრული, ყველას შავი აცვია და მზეც რიგიანად არ ანათებს. იკითხა ამის მიზეზი და უამბეს:

— ხელმწიფემ ერთი ქალი მოიყვანა. ქალი ქმარზე არის მგლოვიარე, არასოდეს არ იცინის, სულ დარდიანია; ყველას შავები ჩაგვაცვებს და მზეც აღარ გვინათებს.

წავიდა ვაჟი, ხელმწიფის კარზე ჩაიარა და დაიძახა:

— კარგი ნამყენების გაკეთება ვიცი, საუკეთესო ტოტები მაქვს, ხომ არ ინებებთო.

— მებაღედ აიყვანეთო, — გასცა ბრძანება ხელმწიფემ.

ვაჟი დადგა მებაღედ, გააკეთა ნამყენები. ნამყენებმა იმავე ზატხულს დაისხა საუკეთესო ხილი. მებაღემ აავსო ერთი კალათა ხილით და ხელმწიფეს მიართვა. გააკვირვა ხელმწიფე ხილის სიდიდემ და მშვენიერებამ. აიღო და ქალთან გაატანა მებაღეს, იქნებ ესიამოვნოსო.

მებაღე მივიდა ქალის ფანჯარასთან. ქალმა მაშინვე იცნო ქმარი და კარები გააღო. გაიხარეს ირივემ და უამბეს ერთმანეთს თავიანთი თავგადასავალი.

ხელმწიფეს მოახსენეს:

— ქალს ძალიან მოეწონა ხილი და მებაღე მიიღოო.

ამის შემდეგ ხელმწიფემ ნება დართო მებაღეს — ყოველდღე მიეთავაზებინა ქალისთვის არჩეული ხილი. ამგვარად დაიწყო ვაჟმა ქალთან სიარული.

ქალმა უთხრა ვაჟს:

— წელიწადი რომ შესრულდება, მაშინ მე თითქოს ხელმწიფეზე ჯვარი უნდა დავიწერო. იმ დღეს მომიტანენ ჩემს პერანგს. მე მოვიტხოვ წინასწარ ბაღში გავლას. მოვალ ბაღში; შენც იქ შენს დამყნილ ხეებს კენწეროები დასკერი, მზად გქონდეს; გავშლი პერანგს, დავსხდეთ ზედ და გაგვაფრენსო.

შესრულდა წელიწადი. ხელმწიფემ გამოუგზავნა ქალს პერანგი და სთხოვა:

— გამოდი, ჯვარი დავიწეროთო.

ქალმა შეუთვალა:

— დიდი სიამოვნებით, მხოლოდ ერთი თხოვნა ამი-
სრულეთ და მეტს აღარას გთხოვთო.

მოვიდა ხელმწიფე და ჰკითხა ქალს:

რასა მთხოვო?

ქალმა უთხრა:

— თქვენ თქვენის ჯარით ბალის კარებში გაჩერდით; მე ბალში შევალ მარტოკა, ვნახავ დასხმულს იმ ხილს, რომელსაც აქამდის მიგზავნიდით; მინდა ჩემის თვალით ვნახო როგორ ასხია, დავსტკბე იმის ცქერით და შემდეგ თქვენი ნებაა, მე წინააღმდეგი არა ვარ ქორწინებისაო.

ხელმწიფემ ნება დართო ქალს ბალში შესულიყო. ქალმა ჩაიცვა პერანგი; ხელმწიფე და ჯარი ბალის კარებში ჩადგა. ქალი შუა ბალში შევიდა, გაიხადა პერანგი, დაჯდა ზედ, მებაღეც გვერდით მოისვა და პერანგს უთხრა:

— აბა, პერანგო, ამწი და ჩემს სასახლეში მიმიყვანეო.

აიწია პერანგი მაღლა-მაღლა და გაფრინდა.

დარჩნენ ხელმწიფე და ჯარი პირდაღებულები.


ქალ-ვაჟი მივიდა შინ, რაც საუკეთესო რამ ჰქონდათ წამოიღეს, ზღვის პირს მცხოვრები დედაბერიც არ დაი-
ვიწყეს, თან წაიყვანეს და წავიდნენ უფროს ძმებთან. იმათ ახალი სახლები აეშენებინათ. ძმებს გაეხარდათ ერთმანეთის ნახვა და ცხოვრობდნენ ბედნიერად.

ქირი იქა,

ლხინი აქა.



ერთი აბაზის კვარცხი



ყო და არა იყო რა, იყო ერთი სოვდაგარი *). ერთხელ ჩვეულებისამებრ წავიდა ეს სოვდაგარი უცხო

ქვეყანაში. ივაჭრა, ნავაჭრი ჯორ-აქლემებს აპყიდა და წამოვიდა.

იარა, იარა და მიაღგა ერთ სოფელს. სოვდაგარი სოფელში არ შევიდა, სოფლის განაპირას მინდორში ჩამოხსნა ჯორ-აქლემებს ტვირთი და დაბინავდა.

სალამოთი სოვდაგარმა სოფელში ბიჭი გაგზავნა საკმელის საყიდლად. ბიჭმა ვერაფერი იშოვა; ბოლოს, როცა უკან ბრუნდებოდა, შეხვდა ერთი დედაკაცი, რომელსაც მოხარშული კვერცხები მიჰქონდა გასაყიდად.

ბიჭმა გამოართვა დედაკაცს ერთი აბაზის კვერცხები და უთხრა:

— ხვალ აქეთ გამოვივლით და ფულს მაშინ მოგცემთო.

სოვდაგარმა და მისმა მხლებლებმა ერთი აბაზის კვერცხებით ივახშმეს და დაიძინეს.

მეორე დღეს აპყიდეს ჯორ-აქლემებს ტვირთი და გაუდგნენ გზას.

ერთი დღის სავლელი გზა რომ გაიარეს, სოვდაგარს მოაგონდა, რომ ღარიბ დედაკაცს კვერცხების ფასი ერთი

*) სოვდაგარი ვაჭარი.

აბაზი არ გადაუხადა. შეწუხდა, მაგრამ რას იზამდა. იფიქრა, იფიქრა და თქვა:

— ამ დედაკაცის კუთვნილ აბაზს ჩემ ფულში არ გავურევ, ცალკე ვაბრუნებ და ვასარგებლებო.

ასედაც მოიქცა. გაიარა ხუთმა წელმა. სოვდაგარმა ის ერთი აბაზი ისე ასარგებლა, რომ ოთხმოცი თუმანი გახდა. მეექვსე წელს სოვდაგარს ისევ იმ ქვეყანაში მოუხდა წასვლა სადაც ხუთი წლის წინათ იყო სავაჭროდ.

გამოიარა იმ სოფელში, სადაც დედაკაცისაგან ერთი აბაზის კვერცხი იყიდა, ჩამოხსნა ჯორ-აქლეშებს ტვირთი და სოფლის განაპირას დაბინავდა.

სოვდაგარმა უთხრა ბიჭებს:

— წადით იპოვეთ ის დედაკაცი და უთხარით, სოვდაგარი გეძახის, ძლიერ საჭირო საქმე აქვს შენთანთქო.

ბიჭები მაშინვე წავიდნენ სოფლისკენ; ბევრი კითხვის შემდეგ იპოვნეს ის დედაკაცი და გადასცეს სოვდაგარის დანაბარები.

დედაკაცი მაშინვე გაჰყვა ბიჭებს.

სოვდაგარმა უთხრა დედაკაცს:

— დედი, მე ამ ხუთი წლის წინათ ვიყავი აქ, შენგან ერთი აბაზის კვერცხები ვიყიდე, ფულის გადახდა დამავიწყდა; ის აბაზი მასაქეთ ვასარგებლე შენ სახელზე, ოთხმოცი თუმანი გახდა, აი ახლა მოგიტანე ეს ოთხმოცი თუმანი და მიიღეო.

ამაზე ღარიბმა დედაკაცმა მიუგო სოვდაგარს:

— გექებდი და გიპოვნე, შენ მაგით ველარ გადამირჩები; ჩემს კვერცხზე კრუხს დავსვამდი, წიწილებს გამოჩეკდა, წიწილები დაიზრდებოდნენ, კვერცხებს დადებდნენ; ისინიც წიწილებს გამოჩეკდნენ და ამგვარად ამ ხუთი წლის განმავლობაში მათი მოგება სამასი თუმანი გახდებოდა; თუ გინდა ნებით გადაიხადე სამასი თუმანი, თუ არა და სასამართლოს საშუალებით გადაგახდევინებო.

სოვდაგარი არ მოელოდა ამას, სახტად დარჩა, იფიქრა მადლი მატლად მიქციაო და დედაკაცს ველარაფერი უთხრა.

წავიდა დედაკაცი სასამართლოში და სოვდაგარს სამას თუმანზე უჩივლა.

დაიბარეს სოვდაგარი. მსაჯულმა გამოუცხადა:

— ამ დედაკაცისაგან ხუთი წლის წინ აბაზის კვერცხები წაგიღია, ფული არ მიგიცია; ხუთი წლის განმავლობაში ერთი აბაზის კვერცხები სამას თუმანს ისარგებლებდა და შენ სამასი თუმანი უნდა გადაუხადო ამ დედაკაცსაო.

დალონდა სოვდაგარი, მსაჯულს სამი საათის ვადა — სთხოვა.

რჩევა უნდა ვკითხო ვისმესო.

მსაჯულმა მისცა სამი საათის ვადა.

სოვდაგარი გამოვიდა გარეთ და დაინახა ერთი პატარა ბიჭი, შეაჩერა ბიჭი და უთხრა:

— პატარა ბიჭო, ერთი რამ უნდა გკითხოვო.

— ბრძანე, მამობილოვო, — მიუგო ბიჭმა.

სოვდაგარმა დიწყო:

— ასეა, შეილო, ჩემი საქმე; ხუთი წლის წინ ერთი დედაკაცისაგან ვიყიდე ერთი აბაზის კვერცხი; ფულის გადახდა დამავიწყდა; ის ერთი აბაზი ვაბრუნე, ვასარგებლე, ოთხმოცი თუმანი გავხადე, ვაძლევ დედაკაცს და აღარ მჯერდება; იძახის: ჩემი კვერცხები აქამდის სამას თუმანს მასარგებლებდა და სამასი თუმანი უნდა მომცეო; სასამართლოში მიჩივლა, მსაჯულმაც ასე გადამიწყვიტა და აღარ ვიცი რა ვქნაო.

— მამობილო, დედაკაცმა კვერცხები მოხარშული მოგყიდა თუ მოსახარშიო? — ჰკითხა პატარა ბიჭმა.

— მოხარშულიო, — მიუგო სოვდაგარმა.

— მაშ მამობილო, წადი, იყიდე ერთი აბაზის მოხარშული კვერცხი, დააწყე თეფშზე, წაიღე და მსაჯულის წინ დადგი; როცა გკითხოს მსაჯულმა ეს რა არისო, შენ უთხარი: ამ კვერცხებით წიწილები გამოაჩეკინეთ და მაგ

დედაკაცს სამასი თუმნის მაგივრად ექვსას თუმანს მივცემთქო,—დაარიგა პატარა ბიჭმა სოვდაგარი.

სოვდაგარს მოეწონა ბიჭის რჩევა-დარიგება, საჩქაროდ იყიდა ერთი აბაზის მოხარშული კვერცხები, დააწყო თეფშზე, წაიღო და მსაჯულს დაუღო წინ.

— ეს რად მოიტანეო?—ჰკითხა მსაჯულმა სოვდაგარს.

— გთხოვთ, ბატონო მსაჯულო, ამ კვერცხებიდან წიწილები გამოაჩეკინოთ, მაშინ მე სამასი თუმნის მაგივრად ექვსას თუმანს მივსცემ ჩემს მომჩივანსო,—მიუგო სოვდაგარმა.

— მოხარშულია თუ მოუხარშავი ეგ კვერცხებო?—იკითხა მსაჯულმა

— მოხარშულიაო,—უპასუხა სოვდაგარმა.

— როგორ იქნება, მოხარშული კვერცხებიდან წიწილები როგორ გამოიჩეკებაო?!—გაიკვირვა მსაჯულმა.

— დალოცვილო, მაშ რაში მადებთ სამას თუმანს გადასახადსო?—მიუგო სოვდაგარმა.

— როგორ, შენ დედაკაცისაგან მოხარშული კვერცხები იყიდე, თუ მოუხარშავო?—ჰკითხა მსაჯულმა.

— თითონ დედაკაცს ჰკითხეთ და იმან თქვასო,—უპასუხა სოვდაგარმა.

მსაჯული დაეკითხა დედაკაცს.

— სოვდაგარს მოხარშული კვერცხები მიჰყიდე თუ მოუხარშავო?

— მოხარშულიო,—მიუგო დედაკაცმა.


მსაჯულმა დაადგინა:

— იყიდოს სოვდაგარმა ერთი აბაზის მოხარშული კვერცხები და მისცეს დედაკაცსაო.

ამგვარად პატარა ბიჭის რჩევით გამართლდა სოვდაგარი; დედაკაცს აღარც ოთხმოცი თუმანი მისცა და აღარც ოთხმოცი კაპეიკი. „ბევრის მძებნელი ცოტასაც დაჰქარგავსო, და ასე მოუვიდა იმ დედაკაცსაც.



სოვედგარის შვილი



ყო ერთი სოვედაგარი, ჰყავდა ცოლი და ერთი ვაჟი. ეს სოვედაგარი წინათ მდიდარი ყოფილიყო და შემდეგ გაღარიბებულიყო.

ერთხელ ვაჟმა უთხრა დედას:

— დედი, იქნებ მამაჩემის სიმდიდრიდან ცოტა ფული გადავირჩა, მომეცი, ქარავანი მიდის სავაჭროდ და მეც გავყვებიო.

— ოცი თუმანი გვაქვს, შვილო, სამკვდროდ შენახული, სხვა არაფერი გაგვაჩნიაო,—უპასუხა დედამ.

— მომეცი ის ოცი თუმანი, ვასარგებლებ, იმედია, მოგებით მოგიტანო,—უთხრა ვაჟმა.

დედამაც აიღო ოცი თუმანი და მისცა შვილს, ქმარს კი არაფერი უთხრა.

წააღო ფული ვაჟმა და დაფიქრებული მიდის ქუჩებში. ერთი სახლიდან წიგნის კითხვის ხმა მოესმა. ავიდა, ნახა, რომ სასწავლებელია.

— თქვენსავით წიგნის კითხვა და წერა მასწავლეთ და რასაც მთხოვთ, მოგცემთო,—უთხრა ვაჟმა მასწავლებელს.

— ათი თუმანი მომეცი და გასწავლიო,—მიუგო მასწავლებელმა.

— ოც თუმანს მოგცემ ოღონდ ჩქარა მასწავლეო.

— კარგიო.

მალე მართლა ისე კარგად შეისწავლა ვაჟმა წერა-კითხვა, რომ მასწავლებელს სჯობნიდა. მისცა მასწავლებელს ოცი თუმანი, გამოართვა წიგნები, ქალაქი და საწერ-კალამი და წამოვიდა შინ. მივიდა დედასთან და უთხრა:

— კარგი საქონელი ვიყიდეთ და მოვდიოდით, გზაზე მეკობრეები *) დაგვესხენ თავს და რაც გვქონდა სულ წაგვართვეს; მე გავექეცე და ჩემი ამხანაგები იქვე დახოცესო.

— ნულარ იღარღებ, შვილო, რადგან შენ ცოცხალი გადარჩიო,—უთხრა დედამ.

გავიდა რამდენიმე დღე და კიდევ უთხრა შვილმა დედას:

— დედი, ფული აღარა გაქვს? მომეცი, ახლა სხვა ქარავანი მიდის, გავყვები, ვაჭრობაში გამოცდილი ვარო.

— ოცი თუმანი-ღა მაქვს, შვილო, რომ მოგცე, ვაი თუ მამაშენმა მოიკითხოს და რა ვუთხრაო?—უპასუხა დედამ.

— არა, დედი, ჯერ არ მოიკითხავს, მომეცი, მოგებას მოვიტანო,— შეეხვეწა შვილი.

მისცა დედამ ის ოცი თუმანიც. წაიღო ვაჟმა ფული და წავიდა. გზაზე ნახა კოჭებს თამაშობდნენ. ყოველ თამაშის დროს ერთი იგებდა. მივიდა ვაჟი კარგ მოთამაშესთან და უთხრა:

— მასწავლე კოჭის თამაში, ისე რომ ვერავინ მაჯობოს, და რასაც მთხოვ, მოგცემო.

— ათი თუმანი მომეცი და გასწავლიო,— მიუგო მოთამაშემ.

— ოცი თუმანი წაიღე, მხოლოდ კარგად და ჩქარა მასწავლეო.

ასწავლა მოთამაშემ ვაჟს კოჭის თამაში. ორ დღეში ისეთი მოთამაშე შეიქნა ვაჟი, რომ მასწავლებელს უგებდა. წამოიღო ორი კოჭი და წამოვიდა. მივიდა შინ და დედას უთხრა:

*) მეკობრე--ავაზაცი, ყაჩაღი, ქურდი.

— კაცი რომ უბედურ ღღეს დაიბადება, ის არის; ვივაქრეთ, გავემგზავრეთ და ღამით კლდის ძირას დავდექით; მოზვავდა კლდე, ჩემი ამხანაგები და ნავაქრი საქონელი ქვეშ მოიტანა; მე განზე ვიდექი და გადავრჩიო.

— რადგანაც შენ გადამირჩი შევილო, საქონელს აღარ დავეძებო—უთხრა დედამ.

რამდენიმე ღღის შემდეგ ვაჟმა ისევ უთხრა დედას:

— დედი, იქნება კიდევა გქონდეს ფული, ყოველთვის ხომ არ ვიზარალებ, ახლა მოგებას ვნახავო.

— რა ვქნა, შევილო, მამაშენმა სულ სამოცი თუმანი მომაბარა; ოცი თუმანი-ღა დამრჩა, ისიც რომ მოგცე, მამაშენს რაღა ვუთხრაო?

— განა, დედი, კიდევ ვიზარალებ? ვეგცა ვცადოთო.

მისცა დედამ ის ოცი თუმანიც და გაისტუმრა. წავიდა ვაჟი. ბევრი იარა თუ ცოტა, მივიდა ერთ ბაღთან. იქ ხალხი შეკრებილიყო; ზოგი დაფა-ზურნას უკრავდა და ზოგიც თამაშობდა; თამაშობდა აგრეთვე ხე, ქვა, ფოთოლი, ბაღახი; სულიერი და უსულო ყველაფერი მხიარულობდა.

— რა მოგცე დაფა-ზურნის დაკვრის ასე კარგად შესწავლაშიო?—ჰკითხა ვაჟმა მედაფაზურნეს.

— ათი თუმანი მომეცი და ძალიან კარგად გასწავლიო.

— ოცი თუმანი იყოსო.

სამ ღღეში ისე შეისწავლა ვაჟმა დაკვრა, რომ მედაფაზურნეს სჯობნიდა. წამოიღო დაფა-ზურნა და წამოვიდა შინ, მოვიდა დედასთან და უთხრა:

— უბედურ კაცს ქვა აღმართში მიეწევაო რომ იტყვიან, ისეა ჩემი საქმეო. ძალიან კარგად ვივაქრეთ, დიდი მოგება ვნახეთ; ზღვით დავბრუნდით; ერთ ღღეს ძლიერი ქარი ამოვარდა, ხომალდი დაიმსხვრა; ჩემი ამხანაგები ზღვაში დაიღუპნენ; მე ერთ ფიცარზე შევრჩი, ზღვამ ნაპირს გამომავლო და გადავრჩიო.

— რადგან შენ გადამირჩი, შევილო, ფულს ვინა ჩივისო, — უთხრა დედამ.

რამდენიმე ღღის შემდეგ ვაჟმა მამას უთხრა:

— ჩვენს ქალაქში ერთი მდიდარი სოვდაგარი მოვიდა. ჩამატარე იმის კარზე და დაიძახე:— ბიჭი ვის უნდა ერთ

ტომარა ოქროზე გასაყიდი-თქო, ის უარის თქმას არ იკადრებს და მიყიდისო.

მამამ აიღო ტომარი, მოჰკიდა ხელი შეიღოს, წაიყვანა: მდიდარი სოვდაგრის ქარზე ჩაატარა და დაიძახა:

— ვის უნდა ბიჭი, ერთ ტომარა ოქროზე ვყიდიო.

მდიდარ სოვდაგარს გაეცინა და ჩაილაპარაკა:

— ვინ მისცემს ბიჭში ერთ ტომარა ოქროსაო?

შვილმა მამას ხმამაღლა უთხრა:

— აბა აქ რისთვის მომიყვანე, სადა აქვს მაგას აშდენი ოქრო, რომ გაიმეტოსო?

ითაკილა მდიდარმა ეს, მაშინვე აავსო ტომარა ოქროთი, მისცა მამას და ბიჭი დაიტოვა.

ბიჭმა ჩუმად უთხრა მამას:

— ეგ ფული დიდხანს გეყოფათ, შემდეგ მე მოგეშველებითო.

წამოიღო კაცმა ფული, მოუტანა ცოლს და იწყეს ცოტ-ცოტა ხარჯვა.

სოვდაგარი ნანობდა, — ასე ძვირად ვიყიდე ბიჭი და რა უნდა გავაკეთებინო ისეთი, რომ ღირდესო. იფიქრა, იფიქრა და ბოლოს გადაწყვიტა შინ გაეგზავნა და იქ ემუშავებინა. დაწერა წერილი: ეს ბიჭი ძვირად ვიყიდე, ამუშავეთ, სულ ქვა და ქვიშა აზიდვინეთო. წერილი ბიჭს გადასცა ცოლისთვის გადასაცემად. აჰკიდა ჯორ-აქლემს საქონელი, ერთი ნოქარი გაატანა და ბიჭიც გააყოლა. ზღვა უნდა გაევიდნენ. ჩახდნენ გემში და წავიდნენ. გზაში ნოქარმა და გემის პატრონმა კოჭი ითამაშეს. ნოქარმა ყველაფერი წაგო: თავისიც, სოვდაგრის მიერ გატანებულიც, ბიჭიც და თავისი თავიც.

— რაც მე მაქვს ჯიბეში, ის ჩემია თუ მოგებულაო? იკითხა ბიჭმა.

— მე შენი თავი მოვიგე, რაც ჯიბეში გაქვს, შენიაო, — უპასუხა გემის პატრონმა.

ბიჭმა ამოიღო ჯიბიდან ორი კოჭი და ორი შაურო ფული. ეთამაშა გემის პატრონს და მოუგო. დაიხსნა თა-

ვისი თავი; კიდევ ეთამაშა და ნოქარი დაიხსნა; ეთამაშა და დაიხსნა სოვდაგრის მიერ გამოტანებული საქონელი და ბოლოს გემის პატრონს მოუგო ყველაფერი, გემიცა და თვითონ გემის პატრონიც მოიგო.

როცა ნაპირს მივიდნენ, ბიჭმა უთხრა გემის პატრონს:

— შენ გამითავისუფლებიხარ, გემიც შეხი იყოს, მხოლოდ თუ ჩემი გვარის კაცმა გამოიაროს, უფასოდ გამოიყვანო.

— კარგიო, — მიუგო გემის პატრონმა.

ბიჭი და ნოქარი გაუდგნენ გზას. გზაზე ბიჭმა ჰკითხა ნოქარს:

— ვისთან მივდივართ, შინ ვინა ჰყავს ჩვენს ბატონსაო?

— ცოლი და სამი ქალიშვილი, ერთი გასათხოვარი და ორი პატარაო, — უთხრა ნოქარმა.

ბიჭმა ჩუმად გახსნა სოვდაგრისაგან გამოტანებული წვრილი და წაიკითხა, რაც შიგ ეწერა. დახია და ისეთივე ხელით სხვა ქალაღზე დაწერა: ეს ბიჭი რომ მოვიდეს, ჩვენს უფროს ქალზე ჯვარი დასწერეო.

მივიდნენ სოვდაგრის სახლში. ბიჭმა გადასცა წვრილი სოვდაგრის ცოლს. დასწერეს ჯვარი ბიჭს სოვდაგრის ქალიშვილზე.

მოახლოვდა სოვდაგრის მოსვლის დრო. ბიჭი დაფიქრდა, რა უნდა ვუთხრაო? მთელი დღეები დაღონებული დადიოდა. ერთ დღეს ქალაქგარეთ გაიარა. ნახა — ერთი ყმაწვილი¹ დგას და ერთ შენობას შეჰყურებს. ბიჭი მიესალმა, მაგრამ პასუხი ვერ მიიღო. ყმაწვილმა არ მოიხედა. ვაჟი მივიდა ახლოს, მოჰკიდა ხელი და ჰკითხა:

— რას შეჰყურებ ასე, რატომ არ მოიხედავო?

— იმ შენობაში ერთი ქალი დავინახე. მინდა ერთხელ კიდევ დავინახო, მაგრამ აღარ გამოდისო, მამაჩემი ამ ქვეყნის ხელმწიფეა, ჩემს მეტი შვილი არა ჰყავს; ვინც იმ ქალს დამახახვებს, თავის საცხოვრებელს გავუყოფო, — მიუგო ყმაწვილმა.

— იმისი საცხოვრებელი არ მინდა, ერთი თხოვნა ამისრულოს და მე გაჩვენებ იმ ქალსაო, — მიუგო სოვდაგრის შვილმა.

— ისეთი რა უნდა მოსთხოვო, რომ მამაჩემმა ვერ შეგისრულოსო, — უთხრა ხელმწიფის შვილმა.

სოვდაგრის შვილმა ამოიღო თავისი დაფა-ზურნა, დაუკრა და დაუკრა. ყველამ და ყველაფერმა ცეკვა დაიწყო. თითონ ხელმწიფის შვილიც ცეკვავდა. ქალი შენობიდან ცეკვით გამოვიდა და მოაჯირზე გადმოდგა. ბიჭმა შეწყვიტა დაკრა.

ქალმა დაუძაა:

— კიდევ დაუკარო.

— რა საკადრისია ჩვენ აქ დაუკრათ და თქვენ მანდიცეკვოთო.

ქალმა ყმაწვილები სახლში მიიწვია და სოვდაგრის შვილს უთხრა:

— ქონება ბევრი მაქვს და შენ უნდა იყო ჩემი ქმარიო.

— მე ცოლი ძყავს, აი ეს ჩემი ძმა არის და ეს შეერთეო, — უთხრა ხელმწიფის შვილზე სოვდაგრის შვილმა.

ქალი დაეთანხმა.

ხელმწიფის შვილმა მამასთან მახარობელი გაგზავნა და დააბარა:

— ცოლი შევირთე, ის ქალი, ვისი ნახვაც მენატრებოდაო.

ხელმწიფეს ძალიან გაეხარდა და ბრძანება გასცა:

— ჩემი შვილის მხსნელი აქ მომიყვანეთო!

წაიყვანეს სოვდაგრის შვილი ხელმწიფესთან.

ხელმწიფემ უთხრა:

— სამი წელია ჩემი შვილი იქ იდგა და იმ სახლს შეჰყურებდა; ღღეს ის შენ გამიბედნიერე და რას მთხოვ, რომ შეგისრულოო.

— სხვა არაფერი მინდა, ესა და ეს სოვდაგარი რომ მოვიდეს ამ ქვეყანაში, თავის სახლში მისვლამდის დააქვრინეთ და ჩამოხრჩობა გადაუწყვიტეთ. ბევრი მოვა და გთხოვს მის განთავისუფლებას; ნურავის თხოვნას ნუ შეი-

წყნარებ, მხოლოდ ჩემი თხოვნა შეიწყნარეო,—მიუგო სოვდაგრის შვილმა.

ხელმწიფე შეჰპირდა:

— ეგ ადვილი საქმეა და აგისრულებო.

ხელმწიფემ დასწერა ჯვარი შვილსა და რძალს, მოიწვია მრავალი ხალხი და დიდი ლხინი გადინადა.

მოვიდა სოვდაგრის მოსვლის დრო. ხელმწიფის განკარგულებით ყველა გზაზე დარაჯები დააყენეს. შემოვიდა ქალაქში სოვდაგარი თუ არა, დაიქირეს და ხელმწიფეს წარუდგინეს.

ხელმწიფემ ბრძანა:

— განუკითხავად ჩამოახრჩვეთო.

უკვირს სოვდაგარს:

— არათერი დამიშავებია, რას ემმართლებითო?

— განუკითხავად ჩამოახრჩვეთ, დიდი დანაშაული აქვსო!— გაიძახის ხელმწიფე.

ამართეს სახრჩობელა, აიყვანეს ზედ სოვდაგარი, უნდა ჩამოახრჩონ. მიდიან ხელმწიფესთან დიდი პირები და სთხოვენ აპატიეთო.

— არ შეიძლება, ჩამოახრჩვეთო!— ამბობს ხელმწიფე.

ბოლოს მოვიდა ხელმწიფესთან სოვდაგრის შვილი და სთხოვა.

— ჩემი ხათრისათვის აპატიეთო.

ხელმწიფემ ბრძანა:

— ჩამოხსენით ამ ვაჟის ხათრისთვისაო.

განთავისუფლეს სოვდაგარი. გადახედა თავის მხსნელს და შინისაკენ წავიდა. შიშისგან ავად გახდა და ლოგინში ჩაწვა. ამ დროს თანჯარასთან გაიარა სოვდაგრის შვილმა. დაინახა სოვდაგარმა და თქვა:

— აი ის არის ჩემი მხსნელი, მაგან გამათავისუფლაო.

— ეგ ხომ ჩვენი სიძეაო,— მიუგო ცოლმა.

— რა სიძე, რას ამბობო?— გაუკვირდა სოვდაგარს.

— ჩვენი ქალიშვილის ქმარია, შენ ხომ მოიწერე უფროს ქალზე დასწერე ჯვარიო, და მეც დავსწერეო,— უთხრა ცოლმა.

— მე ეგ არ მომიწერია, მე მოგწერე, — ძვირად ვიყიდე და ქვა და ქვიშა აზიდინე მეთქი, მაგრამ ეს ჩემი მსხნელია და ასე იყოსო.

დაუძახეს ვაჟს. სოვდაგარმა დალოცა სიძე-ქალიშვილი და უთხრა:

— გინდ აქ იცხოვრეთ, გინდ წაიღეთ რაც გინდოდეთ და წადითო.

ვაჟმა თავის დედ-მამასთან წასვლა ირჩია. სოვდაგარმაც აუკიდა ჯორ-აქლემებს უამრავი სიმდიდრე და გაისტუმრა.

ვაჟი მივიდა მშობლებთან. იმათ ძალიან გაიხარეს შვილის დაბრუნებით და მშვიდობით ცხოვრობდნენ.



გლეხი და კაჭრეზი



არბი ცოლ-ქმარს ერთი ძროხა ჰყავდა. ერთ დღეს კაცმა თავის ვაჟს უთხრა:
— შეილო, წაიყვანე ძროხა, ბაზარში აატარ-ჩაატარე, სამ თუმნად იქნება თუ ოთხად გაჰყიდე;

მშვივრები ვიხოცებით, სანოვავე ვიყიდოთო.

შეილმა მოაბა თოკი ძროხას და ბაზარში ჩაიყვანა. აატარ-ჩაატარა.

დინახა ერთმა ვაჭარმა და დაუძახა:

— ბიჭო, ბიჭო, მოყვანე ეგ ხბო, მომყიდე, სამ მანეთს მოგცემო,

— ხბო კი არა, ძროხა არის, სამ მანეთად როგორ მოგყიდო!— გაიკვირვა ბიჭმა და გაშორდა ვაჭარს.

მეორე ვაჭარმა დაუძახა:

— ბიჭო, სად მიგყავს ეგ თხა, მომყიდე, ორ მანეთს მოგცემო.

— თხა კი არა ძროხა არის, ორ მანეთად ძროხას ვინ მოგცემსო!— მიუგო ბიჭმა და ამასაც გაშორდა.

დაედევნა მესამე ვაჭარი და ახლა დაუძახა:

— რას ახეტიალებ ამ ციკანს, მომყიდე, მანეთს მოგცემო.

— ციკანი კი არ არის, ძროხაა, მანეთად ვინ მოგ-
ცემს ძროხას, სამ მანეთადაც არ გავეყიდიო!— უპასუხა ბიკმა.

ბიკმა იფიქრა: ვაი თუ ის მუშტარიც დავეკარგო, სამი
მანეთი რომ მაძლია ძროხაში და სხვებმა ათი შაური ან
აბაზი შემაძლიონო, აატარა ისევ პირველ ვაჭართან და
სამ მანეთად მიჰყიდა ძროხა.

დაბრუნდა ბიკი შინ. მშობლები ძალიან შეწუხდნენ,
რომ ძროხაში მხოლოდ სამი მანეთი აიღო, მაგრამ რას
იხამდნენ.

იფიქრა, იფიქრა ბიკის მამამ და გადაწყვიტა, რადაც
არ დასჯდომოდა ვაჭრები შინ მიეპატიუნა. იშოვა ფული,
გააკეთა ნაირ-ნაირი სასმელ-საჭმელი, ამოთხარა სამ ადგი-
ლას ორმო, ჩადგა საჭმელი შიგ და მიწა წაათარა.

მოიწვია ვაჭრები, გაშალა სუფრა; დაჰკრა ერთ ორ-
მოს ბარი, — ამოიღო საჭმელი; დაჰკრა მეორეს — ამოიღო
საჭმელი; დაჰკრა მესამეს — კიდევ ამოიღო საჭმელი.

ვაჭრები ხარბად შეექცეოდნენ ნაირ-ნაირ სასმელ-საჭ-
მელს, თანაც უკვირდით, ასეთი გემრიელი საჭმელები საი-
დან ჩნდება მიწაშიო.

— ეს თილისმიანი ბარია; როცა მინდა, დავეკრავ მი-
წას და ამოვა საჭმელებიო, — უთხრა მასპინძელმა ვაჭრებს.
ვაჭრებს მოეწონათ ბარი და შეევაჭრნენ.

— ჩვენ მოგვეყიდე, რამდენსაც გინდა მოგცემთო.

მასპინძელი ჯერ ვერ იმეტებდა ბარს გასაყიდად, ბო-
ლოს ათ თუმნად მიჰყიდა.

წაიღეს ვაჭრებმა ბარი და ერთი-მეორეში ჩხუბი მოუ-
ვიდათ: არა ჩემი უნდა იყოს, არა ჩემიო. ბოლოს ოოგორც
იყო მორიგდნენ, რიგ-რიგობით უნდა ეხმარათ ბარი,

მიიტანეს შინ ბარი, დაჰკრეს მიწას, მაგრამ საჭმელი
არ აღმოჩნდა. დაჰკრეს მეორე ალაგას, მესამეს, ბოლოს
სულ გადაბარეს მთელი კარმიდამო, მაგრამ საჭმელი არ
გაჩნდა.

მიხვდნენ, რომ მოატყუა ღარიბმა კაცმა და წავიდ-
ნენ მასთან საჩხუბრად.

კაცმა წინასწარ იყიდა ორი კურდღელი. ერთი ცოლს დაუტოვა სახლში და უთხრა:

— საქმელი დაამზადე, სუფრა გაშალე, სადილი მზად გქონდესო. ვაჭრები თუ მოვიდნენ, ჩემთან გამოგზავნე მინდორშიო.

წაიყვანა მეორე კურდღელი და წავიდა მინდორში.

მოვარდნენ ყვირილით გაბრაზებული ვაჭრები. ცოლმა ისინი მინდორში გაგზავნა ქმართან,

ვაჭრებმა ჩხუბი და ყვირილი დაუწყეს კაცს:

— რად მოგვატყუე ბარი თილისმთანიაო, კარმიდამო გადავთხარეთ და საქმელები არ გაჩნდაო.

კაცმა თავი იმართლა:

— თქვენ გდომებიათ ბარი ყოველდღე გაძლევდეთ საქმელს, ის კი კვირაში ან თვეში ერთხელ აჩენს საქმელსო.

ვაჭრებმა დაიჯერეს.

კაცმა ისევ თავისთან მიიწვია ვაჭრები, გაუშვა კურდღელი და დაუბარა:

— ჩემ ცოლს უთხარი, სტუმრები მომყავს და სუფრა გაშალეთქო.

კურდღელმა მოუსვა და ვინ იცის საით გაკურცხლამივიდა კაცი შინ, მიიყვანა ვაჭრებიც. სუფრა გაშლილი დაუხვდათ.

ვაჭრები განცვიფრდნენ კურდღელის განიერებაზე და სთხოვეს კაცს, კურდღელი მოგვყიდეთო.

კაცი ჯერ თითქოს უარზე იყო, არ უნდოდა კურდღლის გაყიდვა. ბოლოს მორიგდნენ, და ათ თუმნად გაყიდა კურდღელი.

წაიყვანეს ვაჭრებმა კურდღელი. გზადაგზა სტუმრები დაპატიყეს. გაუშვეს კურდღელი და დააბარეს:

— აბა, კურდღელო, გასწი ჩვენს ცოლებს უთხარი: სტუმრები მოგვყავს და სუფრა გაშლილი დაგვახვედრეთქო. კურდღელმა გაკურცხლა.

მივიდნენ შინ—არც სუფრაა გაშლილი და არც კურდღელია.

ცოლებს ჰკითხეს:

— სუფრა რად არ გაშალეთ, კურდღელი სად არის, რომ გამოგიგზავნეთო?

— რა კურდღელი,—რას ამბობთ, ჩვენთვის კურდღელი არავის მოუყვანიაო,—გაიკვირვეს ქალებმა.

ვაჭრებს შერცხვათ სტუმრებისა: გზადაგზა სულ კურდღლის გონიერებზე და გაწვოთნაზე იკვებდნენ.

დამუქრებულები წავიდნენ ისევ კაცთან.

კაცმა წინასწარ გააკეთა სტვირი. ცოლს ყელზე სისხლით სავენე ნაწლავი შემოახვია და დაარიგა:

— ვაჭრები. ისევ მოვლენ, მე სტვირს დავუკრავ, შენ იმდერე; მე დანას გაგისვამ ყელში, ნაწლავს გავჭრი, სისხლი გადმოგივა; შენ წაიქეცი და თავი მოიმკვდარუნეო; ერთხან სამგლოვიარო ხმაზე დავუკრავ, შემდეგ—სამხიარულლოზე, შენ წამოხტი და ცეკვა დაიწყეო.

გაათავა დარიგება თუ არა, ვაჭრები ჩხუბით, აყალმაყალით მოადგნენ კარებს.

— კაცი ისევ თავის მართლებას მოყვა:

— თქვენ აღბათ შორს გაუშვით კურდღელი, ჯერ უნდა მოგეშინაურებიათ, რა იცოდა კურდღელმა თქვენი სახლი, სხვასთან მივიდოდა.

ვაჭრებმა ესეც დაიჯერეს.

ცოლ-ქმარმა გაშალა სუფრა. ვაჭრები მიიწვიეს. მასპინძელმა დაუკრა სტვირი, ცოლმა დაამდერა. კაცი გაუჯავრდა ცოლს, კარგად არ ძღერო, მივარდა გამოუსვა დანა ყელში, სისხლის ღვარი წავიდა, ქალი დავარდა ძირს, მოკვდა. კაცმა დაუკრა სამგლოვიარო, შემდეგ სამხიარულო დაუკრა, ქალი წამოხტა, ცეკვადა; ხტოდა.

ვაჭრები კინალამ გააგიჟა ამ ამბავმა.

დაუწყეს ხვეწნა-მუდარა კაცს:

— კურდღელი დავკარგეთ, სტვირი მაინც მოგვყიდეო.

მასპინძელი ჯერ თითქოს ვერ იმეტებდა სტვირს გასასყიდად, ბოლოს მიჰყიდა კარგ ფასად.

წაიღეს ვაჭრებმა სტვირი სახლში, მიიწვიეს სტუმრები, დაუკრეს სტვირი, დაამღერეს ცოლებმა. ვაჭრებს გული მოუვიდათ, რატომ კარგად არ მღერითო, მივარდნენ ცოლებს, გამოკრეს დანით ყელები; ქალები უსულოდ დაეცნენ ძირს. დაუკრეს ვაჭრებმა სამგლოვიარო, შემდეგ სალხინო, მაგრამ ქალები არ ინძრეოდნენ.

ვაჭრებს ეკვი შეეპარათ, ასულიერეს ქალები, მაგრამ მკვდრებს რა გააკოცებდა! შექნეს ტირილი, თავში ცემა. დაწნეს გოდორი, მიიტანეს კაცთან ლანძღვა-გინებით, ცოლები რად დაგვახოცინეო. აიყვანეს კაცი, ჩასვეს გოდორში, გადაუხლართეს თავი, და წამოკიდეს ზურგზე და წავიდნენ მთისაკენ: უნდოდათ კლდეში გადაეჩეხათ.

გავიდნენ მინდორში, წყალი მოსწყურდათ. დადგეს გოდორი მინდორში და წავიდნენ წყლის საძებრად.

კაცმა დაიწყო გოდორში ბუტბუტი:

— არ წავალ, არ მინდა, არ მინდა!

ამ დროს მინდორზე მეცხვარე ცხვრის ფარას მორეკავდა. დაინახა, გოდორი ინძრევა; მივიდა ახლოს, გაიგონა გოდორიდან კაცის ბუტბუტი.

— ვინა ხარ გოდორში, ან რას ბურტყუნებ? — ჰკითხა მეცხვარემ.

— როგორ თუ რას ვბურტყუნებ, ჩამაცივდნენ, გინდა თუ არა ხელმწიფის ქალი შეირთეო. რად მინდა ხელმწიფის ქალი, რა ჩემი საქმეა ხელმწიფის სიძე გავხდეო, — მიუგო გოდორიდან კაცმა.

— ამოგიყვან, ეს ცხვრის ფარა შენი იყოს, გოდორში მე ჩავჯდები, ხელმწიფის ქალსაც მე შევირთავო, — უთხრა მეცხვარემ.

— კარგი, გადაუხსენ გოდორს თავი, — ამოსძახა კაცმა. ამოვიდა გოდორიდან გლეხი, მის მაგივრად გოდორში მეცხვარე ჩავჯდა. გადაუხლართა თავი გოდორს გლეხმა, გაირეკა ცხვარი და წავიდა.

ვაჭრები დაბრუნდნენ წყაროდან, წამოიკიდეს გოდორი, აიტანეს კლდეზე და დაბლა გადაუძახეს. არხინად წამოვიდნენ უკან, ჯავრი ამოვიყარეთო.

მოდინ და წინ შეხვდათ გლეხი, ცხვრის ფარას მოირეკავს.

ვაჭრები განცვიფრდნენ და ჰკითხეს;—ისეთი მალალი კლდიდან გადავაგდეთ და ცოცხალი როგორ გადარჩა, ან ამდენი ცხვარი სად იშოვეო?

— თქვენ გეგონათ მოვეკვდებოდით? დაბლა სულ ლამაზი მინდვრებია და ფარა და ფარა ცხვარი დადის, აი ეს ცხვარი იქილინ წამოვასხიო,—უთხრა კაცმა.

ვაჭრებმა სთხოვეს:

— რადგან ეგრე ყოფილა, გოდორი დაგვიწანი, ჩვენ შიგ ჩავჯდებით და იმ კლდიდან გადაგვაგდეო.


გლეხსაც ეს უნდოდა, თითონ ვაჭრებს დააწნევენა დიდი გოდორი, აატანინა კლდეზე; ვაჭრები ჩასხდნენ გოდორში, გლეხმა გადაუხლართა კარგად თავი, კრა ხელი, გადაუძახა უფსკრულში და მიაძახა:

— კიდევ გაყვლეთ და მოატყუებთ ხალხს?

გამორეკა ცხვრის ფარა და წამოვიდა შინისაკენ; თავის მაგიერ დაღუპული მეცხვარე ენანებოდა, მაგრამ იმის ცოდვას ვაჭრებს ახვევდა თავს.



ღარბი კაცი და სოვდაგარი



ყო ძალიან ღარბი კაცი, ჰყავდა ძალიან ლამაზი ცოლი და ორი ვაჟი.

ქვეყანაზე საცხოვრებლად არა გააჩნდათ რა.

კაცი დღეში თითო გუდურა შეშას მოჭრიდა, გაყიდდა და იოლად მიდიოდნენ.

ერთხელ ცოლმა უთხრა:

— კაცო, შეიღებო წამოვევხარდნენ, ტყეში დავსახლდეთ. ჩვენც ხელს წაგახპარებთ, შეშის მოჭრას გიშველითო.

კაცმა მოიწონა ცოლის რჩევა. წამოიკიდეს ძველ-ძულები; ჩადგეს ქოხი ტყის პირში და დასახლდნენ.

კაცი სანამ ერთ გუდურა შეშას გაყიდდა, მეორე გუდურაც მზად იყო. ცოტა უკეთ დაიწყეს ცხოვრება.

ერთ საღამოთი სოვდაგარი დასაპანებული ჯორ-აქლემებით ტყის ახლო მინდორში ღამის გასათევად დაბინავდა. მოჰკრა თვალი ქალს, მოეწონა. მოიფიქრა ქალის მოტყუებით გატაცება.

ღამე რომ კარგად გატყდა, ბიჭი მიგზავნა ქოხში:

— ქალს მუცელი გვიტკივა და თუ მანდილოსანი გყავთ, ღვთის გულისთვის მოხედოსო.

ქალი არ მიდიოდა, არ გვატყუებდნენო. ქმარი არ მოეშვა, გაგზავნა:

— რად მოგვატყუებენ, რა ჯავრი სჭირთ ჩვენიო.

სოვდაგარმა მაშინვე ჩასვა ქალი ყუთში, დაკეტა, წა-
მოჰკიდა აქლემს და აღხეინად გაემგზავრნენ.

დილით ქალი რომ აღარ დაბრუნდა შინ, ქმარი ხან-
აქეთ ეცა, ხან იქით. ასავალ-დასავალი ვერ გაიგო. მოჰ-
კიდა შვილებს ხელი და წავიდა უგზოკვალოდ. ტირილ-
ღრიალით მიაღვა ერთ მდინარეს. წყალი დიდი იყო. იფი-
ქრა:—ჯერ ერთს გავიყვან, მერე მეორესაო. უფროსი შვი-
ლი ნაპირზე დატოვა, უმცროსი აიყვანა ხელში, შევიდა
წყალში. კაცი ფიქრებში წავიდა, გაუშვა ხელი. ბავშვი
წყალში ჩაუვარდა. სდია, სდია, ვერ დაიჭირა ბავშვი.

გამობრუნდა—ეს ხელიდან წამივიდა, ის მაინც გამო-
ვიყვანო მშვიდობითაო.

მიატანა ნაპირს, მივარდა მგელი, დაავლო ბავშვს პი-
რი, გაიტაცა დაიწყო კაცმა თავში ცემა, ტირილი:

— ვაიმე, ცოლო, ვაიმე, სიღარიბით გაზრდილო შვი-
ლებო, მოგიკვდეთ მამა, სად მოგნახოთ, სადღა გიპოვნით,
მგლის შექმულებო, წყალში დამხრჩვალეებო!!

მიაღვა ღუქანს. მელუქნეს ჰკითხა:—მოჯამაგირე ხომ
არ გინდა, დამიყენო.

მელუქნემ უთხრა:—გოდრის დაწვნა თუ იცი, დაგი-
ყენებო.

კაცმა უთხრა:—შე დალოცვილო, სოფლელ კაცს გოდ-
რის დაწვნა როგორ არ მეცოდინებო?

— მაშ შენი სიგრძე დაწანი, — უთხრა მელუქნემ.

დაწნა კაცმა გოდორი.

მელუქნემ უთხრა:—აბა ჩაჯექი, როგორ მოგივაო.

კაცი ჩახტა. მელუქნემ სწრაფად გადაუხლართა თავი
და, წამოიკიდა ზურგზე, სირბილით აიტანა მთის წვერზე.
თუმცა მთის წვერზე არწივი ბუდობდა და ვინც აღამიანს
მოუყვანდა, სასყიდელს კარგს აძლევდა.

მელუქნემ დადგა გოდორი და უთხრა:—იცოდე თუ
გაჩერდები, არწივი შეგქამს, თუ გაანძრევ გოდორს, და-
გორდება და აღიდებული წყალში ჩავარდები.

კაცმა იფიქრა:—არწივის შექმას ისევ წყალში დავინ-
ხოო. შეინძრა, დაგორდა გოდორი, კაცი შიგ ხელებს
აფათურებდა; ცდილობდა გოდორი როგორმე დაემტვრ.ია.
კალათი ოღრო-ხოღრო ქვა-გორახებზე იმტვრეოდა.
დაიშალა. კაცი გამოვიდა.

— ეჰ, ამ სიალაღმართლემაც კეთილი არ დამაყარაო.
შეხვდა მისებრ საწყალი კაცი. ტანისამოსი შეიცვა-
ლა, წვერი მოიპარსა, მივიდა მეღუქნესთან და ჰკითხა.

— მოჯამაგირედ მინდა დავდგე და ხომ არ დამი-
ყენებო?

— დაგიყენებ, თუ კალათის დაწვნა იციო,—უთხრა
მეღუქნემ.

— როგორი კალათიც გნებავდეს; დავწნავო—მიუგო
კაცმა.

— მაშ შენი სიგრძე გოდორი დასწანიო,—უთხრა მე-
ღუქნემ.

გოდორის დაწვნა გაათავა.

მეღუქნემ უთხრა:—აბა ჩაჯექ, როგორ მოთავსდებიო.

— ჯერ შენ ჩაჯექი, დაგინახო, რომ მეც ისე ჩა-
ჯდეო.

ჩაჯდა მეღუქნე. კაცმა გადაუხლართა თავი, წამოიკი-
და, სულ სირბილით აიტანა მთის წვერზე, დატოვა იქ და
არხენინად ჩამოვიდა. დაიწყო ღუქანში ვაჭრობა.

ერთხელ ორი ბიჭი მივიდა მეღუქნესთან და სთხოვეს—
ბიჭებად აგვიყვანეო.

მეღუქნემ აიყვანა.

ერთ დილით ერთი სოვდაგარი მივიდა ღუქანში, მოი-
თხოვა სასმელ-საქმელი და ბიჭები, ღუქნის ახლოს ჩამო-
ხადა ჯორ-აქლემიდან საპალნე, ბიჭები დაუყენა და თი-
თონ ღუქანში შევიდა დასასვენებლად.

ბიჭები ჩამოსხდნენ ერთ ყუთზე.

ერთმა თქვა:

— ერთად ვართ ორივე ამდენი ხანია და ჯერ არა
ვიციოთ რა ერთმანეთისა, ვინა ვართ, სადაურეო.

ერთმა დაიწყო თავგადასავალი:

— მამაჩემი ძალიან ლატაკი იყო. ღღეში თითო გუ-
ლურა შეშის ფასით გვაცხოვრებდა ცოლ-შვილს; ორი ვა-
ჟი ვყვანდით; ჩვენ რომ წამოვიზარდენით, დედაჩვენმა უთ-
ხრა მამაჩვენს:

— ტყეში დავსახლდეთ, ჩვენც მოგეხმარებით შეშა
ფიჩხის მოჭრაში და ღმერთი გვიშველისო. ავაშენეთ ქოხი,
ტყის ნაპირას დავდექით. ღღეში თითო გულურა შეშას
თითოს კიდევ ვუმატებდით და წინათ თუ ნახევარზე მშვი-
რები ვიყავით, ახლა მუცელს ვიძღობდით. ერთ საღამოთი
ვიღაც მგზავრები დადგნენ ჩვენი ქოხის შორიახლო. შუა-
ღამისას დედაჩვენი წაიყვანეს: ქალს მუცელი გვიტკივა და
უშველყო. დედაჩემი წაიყვანეს. ის იყო და ის, დაიკარგა,
სად წაიყვანეს და სად არა, ველარა გავიგეთ რა. მამაჩემი
ველარ დადგა სახლში, ტირილით დაგვიჭირა ხელი
შვილებს და წაგვიყვანა. ერთგან წყალი დაგვხვდა გა-
სასვლელი. ჩემი უფროსი ძმა ნაპირზე დასვა, ორივეს ერ-
თად ვერ გაგიყვანთო. მე ამიყვანა, ჯერ მე უნდა გავეყვანე,
მერე ჩემი ძმა. მამაჩემს ხელი გაეშვა, წყალში ჩაუვარდი.
ტირილით მდია, ველარ მომეწია. მატარა, მატარა წყალმა
და წისქვილის სათავესთან მიმიყვანა. მეწისქვილემ ამომი-
ყვანა, აქამდის ვიყავ, მაცხოვრებდა, ახლა ამ მედუქნესთან
დავდექო.

მეორე ბიჭი გადაეხვია:

— მე ვარ შენი ძმა, მეც მგელმა მომიტაცა, სანამ მა-
მაჩემი ამიყვანდა; მაგრამ მონადირემ გამოგლიჯა მგელს
ჩემი თავი და აი, როგორც ხედავ, მეც მედუქნესთან
დავდექო.

ყუთიდან ხმა გაისმა:

— თქვენ გენაცვალოთ, შვილო, დედა, ჩქარა ამო-
მიყვანეთო.

ბიჭებმა ყუთს მტვრევა დაუწყეს.

სოვდაგარს შეესმა რახუნი, მტვრევა და გამოვარდა.
მედუქნეც გამოჰყვა. დაუწყეს ლანძღვა ბიჭებს.

ბიჭებმა უთხრეს:

— დედაჩვენი ზის ყუთში, სოვდაგარმა მოგვტაცაო. იცნო მედუქნემ, რომ მისი ცოლი იყო, შვილებიც გამოემცნაურნენ მამას, უამბეს თავიანთი თავგადასავალი, მეწისქვილემ როგორ გადაარჩინა დახრჩობას, მგელს მეცხვარემ როგორ გამოსტაცა.

მოეხვივნენ ერთმანეთს.

სოვდაგარი გაიპარა და იმისი იმოდენა სიმდიდრე, ფარჩეულობა, ჯორ-აქლემები სულ მათ დარჩათ და დაიწყეს ტკბილი, ბედნიერი ცხოვრება.



პ/მგ. რედაქტორი მ. ჩიქოვანი
გადაეცა წარმოებას 26/III—37 წ.
ხელმოწ. დასაბუქდათ 20/V—37 წ.
კალ. ზომა 70 x 105

ანაწყოების ზომა 6¹/₂ x 10¹/₂.
მთავლიტი № 1929
შეკვეთა № 314
ტირაჟი 7000

საქბიომედიკამის სტამბა, აკ. წერეთლის ქ. № 3/5.